

# LAI PINGNYAP

## (Deuteronomy)

---

### **1** *Grawng Laig Haktiex Khanan*

In mawh lox pa hoik krai Mose ka pui Isarelaux daux tiag hawt praok rawm klawng Yawdan, daux lung toi veng Suphax, sinax veng Paran, veng Tawphelax, veng Laban, veng Hazarot mai veng Izahat khankix. <sup>2</sup> Jah khaing Hawrax, gawng Sina mai hoek ka Kadeshhabana koe kao tix ngaix krax. <sup>3</sup> Ka daux tixpon num, khix kao tix tix ngaix, Mose krai lox tawm pingnyap pa dex mai pui Isarelaux, awm pa tawm Simiang Siyiex ka nawh khawmuik, <sup>4</sup> khaix hoik pex nawh Sihon simiang Amawrix, pa ot daux veng Heshabon mai Awgax simiang Bashan, pa ot daux Ashatarot mai ka veng Edarix. <sup>5</sup> Mose jah tix nihnai krai lao lox tat jhawm prawng plak sivoe rawm klawng Yawdan ka haktiex Mawbax ah nin, <sup>6</sup> "Simiang Siyiex hoik sikah ka ex baoh Hawrax ah nin, pex hoik ot piang gawng in tom rheeng bawgyam, <sup>7</sup> veeh pex mai deeh hu krax mai hu pianggawng Amawrix, deedexhawtan daux lung, piang gawng mai daux ngawd, plak jee mai praok rawm sigrit sigra daux meung Khanan mai daux Lebanon tom hoek dee singai rawm klawng ting Yufrethix. <sup>8</sup> Jhak heue, Aux hoik deuh haktiex an sivoe pex, laig ka haktiex an mai teei ti cie haktiex pa hoik tiextu Simiang Siyiex ka keeing pex, Abraham, Icak mai Yakop sonsang tawx ka kix mai doehru pa plud khaix kix.

### *Laug Cao Kaing Doehru* (Lih 18:13-27)

<sup>9</sup> Aux hoik krai ah nin ka pex yam an, aux ang pon klawm beeh glawm ka son pex nongnong, <sup>10</sup> Simiang Siyiex pex, hoik kieh pex haohhun ka daux in ngaix, pex hoik haohhun awm simuing raoma. <sup>11</sup> Kieh Simiang Siyiex keeing pex baoh kieh pex koe kaing rheng son, khaing pa nie haohhun pex yam in mainawb buanpiangpexawm hoik

yuh Nawh Cao sijax mukheu ka pex. <sup>12</sup> Aux sang pon klawm pa taug mao pex, beeh glawm pex mai pa thungthiang pex nongnong yuh ka mawx? <sup>13</sup> Laug pui koe pingnya cuyi, pui lhakhiem mai pui koe krax tawng yung khankix khaing sinax ru pex mai aux tak yaog nawh mawh cao kaing piang pex, <sup>14</sup> pex hoik pawk ka aux ah nin, ceu pa hoik krai maix ka yix, mawh pa mhawm sonsang yuh yix kah. <sup>15</sup> Aux tom laug cao kaing khaing daux doehru pex, ka pui pa koe pingnya cuyi mai pa koe krax tawng yung mai kieh kix mawh cao kaing piang pex, pa mawh cao kaing piang pui kaing rheng kaux, kaing tixyieh kaux, kaing tixphuan kaux, kaing pui kao kaux heue. <sup>16</sup> Yam an, aux tawx lox ka cao prawngsee pex khankix, nghiet ka grawng see pa koe sinax puxaik pex mai prawngca pa rahsee ka sinax pui mai puxaik nawh mai nyosinie pa ot tau mai nawh. <sup>17</sup> Pex tak ang pon jhak pakngai pui tix kaux kawx ka daux pa prawngsee, pex tak nghiet ka see pa iak mai see pa ting awm paox tix, pex paw lhat ka pui tix kaux kawx, mawh kheu krax prawngca mawh cie Siyiex, can see pa nu ka pex viex hoek ka aux mai aux tak nghiet ka see an, <sup>18</sup> yam an aux tak tawx lox son ceu pa khaw pex ti yuh khawmuik.

### *Tiang Tix Laig Daux Haktiex* (Si 13:1-33)

<sup>19</sup> Ex lih khaing Hawrax mai hu phlat daux tiag ting pa koe krax lhat awm pa hoik yaox pex ka krax hu gawng haktiex Amawrix, awm pa hoik tawm Simiang Siyiex ka ex mai ex hoek ka haktiex Kadeshhabana. <sup>20</sup> Aux ah nin ka pex, pex hoik hoek ka gawng Amawrix pa tawx Simiang Siyiex ex ka ex. <sup>21</sup> Jhak heue, Simiang Siyiex pex hoik deuh haktiex ka plak sivoe pex, haok mai teei ti cie awm hoik krai Simiang Siyiex keeing pex ka pex, paw lhat graung mai paw lauxrhawm, <sup>22</sup> pex kukaux greed tix dex aux ah nin, kieh ex ploj pui hu sivoe

ex mai jiang ka haktiex son ex mai kieh kix deeh viex lox satang hoek ka ex, sonsang tawng ex krax pa sang khaw ex ti haok mai sonsang hoek ex ka veng yuh ka mawx. <sup>23</sup> Aux khawrhawm ka grawng an, aux tom laug pui kao ra kaux khaing dau ru pex tix cub tix kaux, <sup>24</sup> kix veeh tix mai haok piang gawng tom hoek dau ngawd Eshakawlax mai jiang ka dee an. <sup>25</sup> Kix pieh ti viex plix khaox hoek dau taix tix tiblah mai viex hoek ka ex mai kix viex lox satang hoek ka ex ah nin, an mawh haktiex pa mhawm pa sang tawx Simiang Siyiex ex ka ex. <sup>26</sup> Viang mawh nan, pex ang cu ti haok mai tiehfeen ka lox tawm Simiang Siyiex pex <sup>27</sup> mai pex bawgbe ka dau nyiex gox tix ah nin, mawh kheu Simiang Siyiex koeng ka ex, Nawh Cao hoik viex ex lih khaing dau meung Ejiptux, sonsang ap ex dau tawm taix pui Amawrix, sonsang yuh ex lauxleeing. <sup>28</sup> Ex sang haok yuh ka mawx? Puxaik ex khankix hoik kieh ex lauxrhawm ah nin, pui haktiex an kied ting lhaong khaing ex, veng kix kawx ting mai guh veng lhaong cux raoma, lheu khaing an yix hoik yaox kawn simex Anakax khankix ot tan. <sup>29</sup> Khaix an, aux ah nin ka pex, paw yaohyee, paw lhat ka kix. <sup>30</sup> Simiang Siyiex pex pa hu sivoex pex, tak puing son pex awm hoikyuh Nawh Cao ka son pex dau meung Ejiptux plak sivoex ngai pex <sup>31</sup> mai dau tiag, pex hoik yaox kliien Simiang Siyiex ka tix, awm kliien pui ka kawn tix, dau krax pa hoik lawng pex tom sidah hoek pex dee in. <sup>32</sup> Viang yuh nan kawx, pex ang yumrhawm ka Simiang Siyiex tix, <sup>33</sup> Cao pa hoik hu sivoex pex sonsang jhi krax hu pex ka plak ponsawm ka rong ngu, ka plak ponngaix ka rong paiawm mai sawg dahdee sum pex nyiex gox heue.

***Krax Ciyang Siyiex Ka Isarelaix*** (Si 14:20-35)

<sup>34</sup> Simiang Siyiex mhong ka lox pex mai Nawh Cao songrhawm mai tiextu ah nin, <sup>35</sup> Haktiex mhawm pa tiextu Aux ti tawx ka keeing pex khankix, doehru ceu pui pa caox inkix tak ang ponti yaox ka tix kaux kawx,

1:26 Pi 9:23, He 3:16. 1:31 Kawn 13:18. 1:34-35 He 3:18. 2:1 Si 21:4.

<sup>36</sup> mawh ngie Kaliep kawn simex Yephunie pa yaox ka haktiex an mai Aux tak tawx haktiex pa hoik dig nawh, ka nawh mai kawn praix nawh khankix, mawh kheu nawh hoik hawt grawng lawng khaix Simiang Siyiex khawm rhawmri tix, <sup>37</sup> mawh kheu jao pex, Simiang Siyiex songrhawm ka aux ah nin, maix tak ang pon ti laig tan, <sup>38</sup> Yawsux kawn simex Nun, pa cung ka sivoex maix, tak yaox ti laig tan, tawx riang rao ka nawh, mawh kheu nawh takkieh pui Isarelaixteei ti cie sinngao an. <sup>39</sup> Lheu khaing an, kawn nyawm iak maix khankix, pa ah maix mawh pa tudrhim, pa mawh kawn praix maix pa ang nyang tawng pa mhawm mai pa caox dau in singaix, kix tak laig ka dee pa sang tawx Aux ka kix mai kix tak pon ti cie an. <sup>40</sup> Viang mawh nan, phan mawh pex, deeh veeh ti hu ka dau tiag, ka krax rawm sigrit sigra raoh, pa mawh rawm sigrit sigra Edom. <sup>41</sup> Khaix an, pex deeh pawk lox ah nin ka aux, yix hoik lud ka Simiang Siyiex, yix tak haok puing awm lox pa hoik tawm Simiang Siyiex ex ka yix, pui kukaux nhawt ka kraung naing tix mai khrierien ti haok piang gawng. <sup>42</sup> Simiang Siyiex ah nin ka aux, krai ka kix, pawhaok, paw puing mawh kheu Aux ang ot sinax pex, phan ang mawh nan pex tak som ka pui koeng tix, <sup>43</sup> aux hoik krai ka pex, viang mawh nan, pex ang nghiet kah, mai pex tiehfeen lox tawm Simiang Siyiex mai haok piang gawng tau mai rhawm kuarhawm vao tix. <sup>44</sup> Pui Amawrix pa ot piang gawng puing mai pheet ka pex awm pheet phung hia ka pui mai yuh pex laux, jah ka Sirax tom hoek ka veng Hawm. <sup>45</sup> Pex deeh ing mai yiem ka plak sivoex Simiang Siyiex, viang mawh nan, Simiang Siyiex ang cu ti nghiet ka lox pex mai ang lai daong yhaok ka pex. <sup>46</sup> Pex dah tix ot ka Kadasha tom rheeng singaix awm bawgyam pa yaox pex tix ot tan heue."

***Yam Ot Kix Dau Tiag***

**2** "Khaix an, awm pa krai Simiang Siyiex ka aux, ex deeh veeh ti hu krax dau tiag ka plak rawm sigrit sigra raoh mai ex hoik vungviang hawt gawng Sirax tom rheeng singaix, <sup>2</sup> Simiang Siyiex ah nin ka aux, <sup>3</sup> pex vungviang hawt gawng in, hoik rheeng

bawgyam, veeh ti hu plak blaong. <sup>4</sup>Tawm lox ka pui khankix ah nin, pex tak tiang ti hu ka mee haktiex puxaik pex pa mawh doehru pex Esaw pa ot ka haktiex Sirax, mai kix tak lhat graung ka pex. Viang mawh nan, yuh satix mhawm mhawm, <sup>5</sup>paw doh cheeik ka kix, mawh kheu Aux tak ang tawx haktiex kix ka pex pie ceeix kawx, pie tix tiag caong dig kawx ang tawx ka pex, mawh kheu hoik tawx Aux gawng Sirax mawh cie Esaw. <sup>6</sup>Pex tak yaox ti liag pa ih khaing kix ka mau sonsang yaox pex ti ih mai pex tak liag rawm khaing kix ka mau, sonsang yaox pex tix nyaux. <sup>7</sup>Mawh kheu Simiang Siyiex pex hoik nawb buan piang kaing jhaw pa yuh pex ka taix tix khawmuik, Nawh Cao hoik tawng pex vungviang daux tiag ting in, daux tixpon num, Simiang Siyiex hoik ot tau mai pex mai pex ang lai koe ceu pa cudcha. <sup>8</sup>Ex tiang ti hu krax khaing dee ot puxaik ex kawm praix Esaw daux haktiex Sirax, khaing krax hu ex daux lung, khaing veng Elat mai veng Eziyongaba, ex deeh veeh ti tiang ka krax hu daux tiag Mawbax. <sup>9</sup>Simiang Siyiex ah nin ka aux, paw yuh krax tuktiak ka pui Mawbax mai paw yuh naing ka kix, mawh kheu Aux tak ang tawx pex cie ka haktiex kix ceeix kawx, mawh kheu Aux hoik tawx kawm simex Lotax cieka haktiex Arax. <sup>10</sup>Pui Emim hoik dawg ot tan tom dix mai kix mawh ceu pui pa ting mai kied nie mai kied lhaong awm ceu pui Anakax, <sup>11</sup>pui ceu in khankix baox kok ceukaux kix mawh Rephem awm pui Anakax, viang mawh nan, pui Mawbax kok kix mawh ceu pui Emim. <sup>12</sup>Can pui Hawrix khankix hoik dawg ot ka haktiex Sirax tom dix, viang mawh nan, kawm simex Esaw khankix grheu kix mai yuh kix lauxleeing plak sivoie kix mai kawm praix Esaw ot ka dee ot kix, awm yuh pui Isarelaux ka haktiex tawx Simiang Siyiex ka kix pa pon kix ti cie. <sup>13</sup>Yam in kaoh mai tiang plak klawng Zeriet, ex tiang plak toi rawm klawng Zeriet. <sup>14</sup>Bawgyam jah ex ti lih khaing Kadeshabana tom sidah tiang ex ka rawm klawng Zeriet, hoik koe tixgoe daix num mai tom sidah hoek bawgyam lauxleeing doehru pui

**2:4** Yam 36:8. **2:9** Yam 19:37. **2:14** Si 14:28-35. **2:19** Yam 19:38.

naing khaing daux tab, awm hoik tiextu Simiang Siyiex ka kix. <sup>15</sup>Mawh kheu plawng taix Simiang Siyiex teei ti tikka kix khaing daux tab, tom sidah lauxleeing kix. <sup>16</sup>Pui naing khankix hoik lauxleeing mai yum sinax pui hun khankix, <sup>17</sup>Simiang Siyiex ah nin ka aux, <sup>18</sup>in singaix pex tak tiang ka mee haktiex Arax mai Mawbax, <sup>19</sup>yam hoek pex dex pui Amon, paw tuktiak mai paw cheeik ka kix, mawh kheu Aux tak ang tawx pex cie haktiex kawm simex Amon ceeix kawx, mawh kheu Aux hoik tawx an mawh cie kawm simex Lotax. <sup>20</sup>Ka dee ankix sawn mawh haktiex pui Rephem, mawh kheu pui Rephem hoik dawg ot ka dee an, viang mawh nan, pui Amon kok kix mawh Zamzummim, <sup>21</sup>ceu pui an mawh pa ting mai kied nie mai kied lhaong awm pui Anakax, viang mawh nan, Simiang Siyiex yuh kix lauxleeing ka plak sivoie kix mai grheu kix mai kix plud ti ot dee ot kix, <sup>22</sup>Nawh Cao hoik yuh ka doehru Esaw awm an pa ot ka Sirax, yam yuh Nawh Cao pui Hawrix lauxleeing khaing ka sivoie kix, kix grheu kix mai kix plud ti ot ka dee an tom hoek in singaix, awm an, pui Amon yuh pui Zamzummim lauxlak pakleeing mai plud ti ot dee ot kix heue. <sup>23</sup>Pui Avin pa ot ka yaong pa singai khaing veng Gaza, ceu pui Katawren pa kaoh khaing veng Katawrax, yuh kix lauxleeing mai plud ti ot ka dee ot kix. <sup>24</sup>Kaoh mai lih hu krax mai tiang rawm Anon, Jhak heue, Aux hoik ap Sihon pui Amawrix pa mawh simiang Heshabon mai haktiex nawh ka daux tawm taix pex, jah pex teei ti cie mai puing ka kix. <sup>25</sup>Jah ka daux in singaix, Aux tak kieh pui kuceu piang haktiex yaohyee mai lhat graung ka pex, pui pa mhong ka grawng pex tak lhat graung mai khirhawm kheu jao pex.

***Grawng Som Simiang Sihon*** (Si 21:21-30)

<sup>26</sup>Aux hoik ploix kawncaw khankix hu ka Sihon simiang meung Heshabon khaing daux tiag Kedemot mai lox pa nhim ah nin, <sup>27</sup>kieh aux tiang ka haktiex maix, aux tak lawng ngie ka daux krax ting mai aux tak ang veh ka plak khawn dawm mai ka plak khawn goix. <sup>28</sup>Maix coh pa ih son aux ka mau, sonsang pon aux ti ih mai coh rawm son aux ka mau, sonsang nyaux aux, kieh ngie

aux tiang ka caong tix nongnong, <sup>29</sup> awm yuh kawn simex Esaw pa ot ka Sirax mai pui Mawbax pa ot ka Arax ka son aux, tom sidah tiang aux rawm klawng Yawdan mai hoek ka meung pa tawx Simiang Siyiex ex ka ex. <sup>30</sup> Sihon simiang Heshabon ang kieh ex tiang ka haktiex tix, mawh kheu Simiang Siyiex hoik kieh rhawm nawh kiien mai rhawm nawh kied kua sonsang pa nawh daux taix pex, awm pa hoik yaox pex in singaix. <sup>31</sup> Simiang Siyiex ah nin ka aux, jhak heue, Aux hoik jah tix ap Sihon mai haktiex nawh ka pex, pex puing mai teei ti cie kah. <sup>32</sup> Khaix an, Sihon mai pui nawh khankix hoek ti puing ka ex ka veng Yahat. <sup>33</sup> Simiang Siyiex ex ap nawh ka ex mai ex hoik pex ka nawh mai kawn simex nawh mai khawm pui nawh khankix. <sup>34</sup> Yam an ex hoik teei veng nawh khawmuik mai ex hoik yuh simex, sibun mai khawm kawn nyawm pa ot daux veng ku veng lauxlak pakleeing mai ex ang lai prah tix ceu kawx, <sup>35</sup> ex teei ngie tobrie awm kraung pa rhim son cao ex tau mai kraung pa pon ex khaing daux veng khankix. <sup>36</sup> Jah khaing veng Araw praok rawm klawng Anon mai khaing veng pa koe hawt rawm klawng khankix tom singai hoek ka veng Gilat, ang lai koe veng pa ang ex pex tix veng kawx, Simiang Siyiex ex hoik ap daux tawm taix ex khawmuik. <sup>37</sup> Pex paw hu dex haktiex kawn simex Amon mai hawt rawm klawng Yabok mai ka veng pa koe piang gawng khankix pa tiebtie Simiang Siyiex ex ka exheue.”

### **3** *Isarelix Pex Bashan* (Si 21:31-35)

“Ex deeh veeh ti hu ka krax Bashan, Awgax simiang Bashan mai pui nawh khankix hoek ti puing ka ex dee Edarix. <sup>2</sup> Simiang Siyiex ah nin ka aux, paw lhat graung ka nawh, mawh kheu Aux hoik ap nawh mai pui nawh mai haktiex nawh khankix ka daux tawm taix pex, pex tak yuh ka nawh awm hoik yuh pex ka Sihon simiang pui Amawrix pa ot ka veng Heshabon. <sup>3</sup> Simiang Siyiex ex hoik ap Awgax simiang Bashan mai pui nawh khawmuik, ex pah nawh tom ang pui nawh lai klawd tix kaux kawx. <sup>4</sup> Yam an ex teei veng nawh khawmuik mai veng pa ang ex teei ang koe tix veng kawx, ex teei

veng tixgliah veng pa koe hawt Agawbax khankix, meung haktiex Awgax simiang Bashan. <sup>5</sup> Veng in khawmuik mawh veng pa lhaong pa kaux guh veng tau mai sivix veng mai jhong, lheu khaing an yaong kawn koe tomnie ka plak praix veng. <sup>6</sup> Ex hoik yuh kix lauxlak pakleeing awm hoik yuh ex ka Sihon simiang Heshabon mai yuh veng ku veng, simex, sibun mai kawn nyawm khankix lauxlak pakleeing. <sup>7</sup> Tobrie mai kraung pa rhim ex khaing daux veng khankix, ex hoik teei mawh cie tix. <sup>8</sup> Yam an ex hoik teei haktiex khaing daux taix simiang pui Amawrix ra kaux pa ot ka rawm klawng Yawdan plak in, khaing rawm klawng Anon tom hoek ka gawng Heramon. <sup>9</sup> Ceu pui Sidon kok ceukaux gawng Heramon mawh Sirion mai kok ceu pui Amawrix mawh Sinirax. <sup>10</sup> Ex hoik teei veng pa koe ka daux lung khawmuik mai pa koe hawt haktiex Gilat mai pa koe hawt haktiex Bashan tom singai hoek ka veng Salaka mai veng Edarix mai veng meung haktiex Awgax simiang Bashan. <sup>11</sup> Mawh ngie Awgax simiang Bashan ceu pui Rephem tix kaux pa kawn deuk, jhak heue, ku it nawhmawh ku rhiem, an koe ka veng Rabat dee ot pui Amon ang mawh lie? Krax lang koe dim sawk, krax vieh koe pon sawk, awm pa khaw mai sawk cie pui hun.

### *Goih Haktiex Plak Lih Singaix* (Si 32:1-42)

<sup>12</sup> Yam hoik teei ex ka haktiex yam an, jah khaing veng Araw pa koe hawt rawm klawng Anon mai gawng Gilat tix plak mai veng an khankix Aux hoik tawx ka Rubin mai Gat. <sup>13</sup> Pa deuk khaing gawng Gilat mai Bashan meung haktiex simiang Awgax, Aux hoik tawx ka Manashe tix plak. Haktiex pa koe ka daux Bashan khawmuik kok mawh haktiex pui Rephem. <sup>14</sup> Ya-irax doehru Manashe teei ti cie haktiex baoh Agawbax pa mawh meung Bashan, tom singai ka mee praix Geshurix mai Makhatix, khaix ankix kok ceukaux mawh Havot Ya-irax tom in singaix. <sup>15</sup> Aux tawx veng Gilat ka pui Makhirax. <sup>16</sup> Ka pui Rubin mai pui Gat khankix, Aux tawx haktiex ka kix jah khaing veng Gilat tom hoek rawm klawng Anon tau mai sigreung klawng an, tom hoek rawm klawng

Yabok mee haktiex pui Amon khankix. <sup>17</sup>Daux lung tau mai rawm klawng Yawdan tom mee haktiex jah khaing Ginesariet ka plak toh rawm sigrit sigra Arabat, nhawng kih, ka caong gawng Pisaga. <sup>18</sup>Aux hoik tawm lox ka pex, yam an ah nin, Simiang Siyiex pex hoik tawx pex cie ka haktiex in, pui kua pui vao khankix tak tiang tau mai kraung naing sivoie puxaik pex pui Isarela. <sup>19</sup>Viang mawh nan, moeng pex, kawm praix pex mai tobrie pex khankix, Aux tawng ka hoik nie, tobrie pex tak ot ka daux veng pa hoik tawx aux ka pex. <sup>20</sup>Tom hoek bawgyam tawx Simiang Siyiex puxaik pex lauxlee tix, awm tawx nawh ka pex, tom hoek bawgyam teei kix ka haktiex pa tawx Simiang Siyiex pex ka kix, plak toi rawm klawng Yawdan, khaix an pex kukaux tak deeh hoek ka dee ot tix pa hoik tawx Aux ka pex. <sup>21</sup>Yam an, Aux hoik tawm lox ka Yawsux ngai pex hoik yaox ka ceup hoikyuh Simiang Siyiex pex, ka simiang ra kaux mai Simiang Siyiex tak yuh ceu in ka meung haktiex can dee hoek maix. <sup>22</sup>Paw lhatgraung ka kix mawh kheu tokaux Simiang Siyiex pex tak puing son pex.

#### **Mose Ang Pon Laig Meung Khanan**

<sup>23</sup>Aux khiokhaw ka Simiang Siyiex, yam an ah nin, <sup>24</sup>Simiang Siyiex eue, Maix Cao hoik jah ti jhi kawncau ti yaox pa ting lhaong Tix mai pa ting riang rao taix Tix, piang raoma mai piang haktiex mawh siyiex mawx pa chix yuh awm kaing jhaw Maix mai pa ting siawp sibrawm pa yuh Maix Cao lie? <sup>25</sup>Kieh aux hu ka plak an mai jhak ka haktiex mhawm pa koe toi rawm klawng Yawdan mai gawng pa jiet mhawm gawng Lebanon. <sup>26</sup>Mawh kheu jao pex, Simiang Siyiex hoik songrhawm ka aux mai ang lai nghiet ka lox aux mai Simiang Siyiex ah nin ka aux, ding heue! paw lai kraigrawng an ka Aux. <sup>27</sup>Haok piang choek gawng Pisaga mai jhak plak toh, plak klip, plak jee mai plak blaong mai jhak ankix ka ngai tix, maix tak ang pon tiang ka plak toi rawm klawng Yawdan. <sup>28</sup>Maix tawm lox ka Yawsux mai tawx riang rao mai johjhan ka nawh, mawh kheu nawh tak hu sivoie pui in khankix mai nawh tak kieh kix pon ti cie haktiex pa hoik

yaox maix. <sup>29</sup>Mawh kheu nan, ex hoik ot ka daux ngawd see veng Betpegurax heue.”

#### **Mose Tawm Lox**

**4** “Yam in pui Isarela eue, nghiet ka been prawngsee mai lox tat jhawm prawng pa gau aux pex yuh khankix, sonsang im ju pex mai hu laig teei ti cie haktiex pa tawx Simiang Siyiex keeing pex ka pex. <sup>2</sup>Pex tak ang pon baoux ka gumlox tawm Aux ka pex mai ang pon ti tieh khaing an, pex tak priex ka lox tawm pingnyap Simiang Siyiex pex awm pa tawm Aux ka pex. <sup>3</sup>Pex hoik yaox pa yuh Simiang Siyiex ka Balaxpegurax ka ngai tix, mawh kheu Simiang Siyiex pex hoik yuh pui pa hawt khaix Balaxpegurax khawmuik lauxlak pakleeing khaing sinax pex. <sup>4</sup>Pex pa een rhawm ka Simiang Siyiex tix tom kauxcong, hoik yaox ti im ju kukaux tom in singaix. <sup>5</sup>Aux hoik gau pex ka been prawngsee mai lox tat jhawm prawng awm pa hoik tawm Simiang Siyiex aux ka aux, sonsang hawt yuh pex awm an ka daux haktiex pa teei pex ti cie. <sup>6</sup>Priexrien mai hawt ti yuh, mawh kheu in tak mawh pingnya cuyi mai krax tawng yung son pex ka sivoie ngai pui pa mhong ka lox tat jhawm prawng in khankix tak ah nin, ceu pui pa ting haohhun in, mawh pa koe pingnya mai koe krax tawng tete. <sup>7</sup>Mawh Siyiex mawx pa ot dex ceu pui pa ting haohhun in awm ot Simiang Siyiex ex dex ex, yam kokyo ex ka Nawh Cao lie? <sup>8</sup>Mawh ceu pui pa ting haohhun mawx pa koe been prawngsee mai lox tat jhawm prawng pa rahsee khankix, awm koe lox pingnyap pa deuh Aux ka sivoie pex daux in singaix lie? <sup>9</sup>Yuh satix pex mai rien rhawm pex, hax pex krox, tak piawm ka ceu pa hoik yaox pex ka ngai tix khankix mai ankix tak lih khaing daux rhawm pex ka daux singaix pa im ju pex mai kieh kawm praix pex mai kawm saux kawm sex pex tawng ka ceu in khankix. <sup>10</sup>Daux singaix cung pex ka plak sivoie Simiang Siyiex pex ka baoh Hawrax, Simiang Siyiex ah nin ka aux, khrawm pui hoek ka Aux mai Aux tak kieh kix mhong ka lox Tix, sonsang gau kix ti lhatgraung ka Aux yam im ju tix piang haktiex mai sonsang gau kix ka kawm praix tix khankix. <sup>11</sup>Pex hoek dex mai cung hawt caong gawng mai ngu gleeing ka gawng tom hoek ka

sigreung raoma tau mai pa hoik naog ka grang pa faik, mai paiawm pa kied faik.<sup>12</sup> Simiang Siyiex hoik sikah ka pex khaing daux sigreung ngu, pex hoik mhong sinum lox sikah khankix, viang mawh nan pex ang yaox ka rieanggrang mai pex mhong ngie lox sinum khaing.<sup>13</sup> Nawh Cao hoik krai lox sijax mukheu pa hoik tawm Nawh Cao ka pex sonsanghawtyuh pex ka, pa mawh lox tawm pingnyap kao gum, mai Nawh Cao hoik tiem khankix piang khlawp simaox ra khlawp.<sup>14</sup> Simiang Siyiex hoik tawm lox ka aux yam an sonsang gau aux pex ka lox been prawngsee mai lox tat jhawm prawng sonsanghawt yuh pex ka an daux haktiex pa tiang pex ti hu teei ti cie.

### ***Tawx Satix Ka Pa Krub Rieanggrang***

<sup>15</sup>Yuh satix pex mhawm mhawm. Mawh kheu singaix an pex tak ang yaox rieanggrang tix ceu kawx, yam sikah Simiang Siyiex ka pex baoh Hawrax khaing daux sigreung ngu,<sup>16</sup> phan ang mawh nan, lhat pex yuh krax pa ludloe mai yuh rieanggrang pa hoik saik son tokaux tix mai pa koe rieanggrang tix ceuceu, pa mawh rieanggrang simex, sibun,<sup>17</sup> pa awm rieanggrang tobrie pa koe piang haktiex mai pa awm rieanggrang sim koe prui pa po ka raoma,<sup>18</sup> pa awm rieanggrang pa chix mu piang tiex tix ceuceu mai pa awm rieanggrang kax tix ceuceu pa koe daux rawm greem tiex.<sup>19</sup> Yuh satix tix, lhat pex maong ti jhak ka raoma mai yam yaox pex ka singaix, khix, simuing mai kraung khrai raoma khawmuik, pex tak krub mai yuh kaing son an, ka pa hoik goih Simiang Siyiex son kawm pui pa koe greem raoma khawmuik.<sup>20</sup> Simiang Siyiex hoik teei pex lih khaing daux glah ngu rhiem meung Ejiptux sonsang mawh pex pui cie Nawh Cao awm pa koe pex daux in singaix.<sup>21</sup> Lheu khaing an Simiang Siyiex hoik songrhawm ka aux kheu jao pex mai tiextu son ang aux pon tiang toi rawm klawng Yawdan mai son ang aux pon laig ka daux haktiex mhawm pa tawx Simiang Siyiex pex, mawh sinngao cie pex.<sup>22</sup> Aux tak yum daux haktiex in, aux tak ang

yaox ti tiang ka toi rawm klawng Yawdan, viang mawh nan pex tak tiang ka plak an mai teei ti cie ka haktiex mhawm an.<sup>23</sup> Yuh satix tix, son ang pex piawm ka sijax mukheu Simiang Siyiex pex, pa hoik yuh Nawh Cao mai pex mai paw yuh rieanggrang pa saik tix mai pakpeung rieanggrang tix ceuceu pa ang Simiang Siyiex cu pex yuh.<sup>24</sup> Mawh kheu Simiang Siyiex pex mawh ngu pa gleeing mai mawh Siyiex pa bak viang.<sup>25</sup> Yam pon pex kawm praix tix mai kawm saux kawm sex tix khankix mai hoik ot ka daux haktiex an tom rheeng, phan pex ludloe mai yuh rieanggrang pa saik ti mawhrieanggrang tix ceuceu mai baox yuh pa caoxcaig ka plak sivoie ngai Simiang Siyiex pex, sonsang so krax songrhawm Nawh Cao.<sup>26</sup> Aux tak kok yo raoma mai haktiex mawh mhairug sonsang puing ka pex daux in singaix mai pex tak graigrhup dommawx doman khaing haktiex pa tiang pex plak toi rawm klawng Yawdan, pa pon pex ti cie, pex tak ang yaox ti ot rheeng daux haktiex an, viang mawh nan pex tak lauxlak pakleeing.<sup>27</sup> Simiang Siyiex tak kieh pex prungprang rairuad ka sinax ceu pui khankix mai pex tak deuk ka sinax pui tang ceu ceeix khaing ka dee grheu Simiang Siyiex ka pex.<sup>28</sup> Ka dee an, pex tak yuh kaing jhaw siyiex pa yuh ka taix tix, pa mawh khaox, simaox, pa ang chix yaox, pa ang chix mhong, pa ang chix ih mai pa ang chix ngheet.<sup>29</sup> Phan pex sawg ti yaox Simiang Siyiex tix baoh an, phan pex sawg Nawh Cao khawm rhawm mai khawm ju tix, pex tak yaox kah.<sup>30</sup> Yam yaox pex krax lauxrhawm mai ceu inkix hoek piang pex, ka daux singaix pa sang hoek pex tak deeh hoek ka Simiang Siyiex tix mai cu nghieng ka lox Nawh Cao,<sup>31</sup> mawh kheu Simiang Siyiex pex mawh Siyiex pa cauxrhawm, Nawh Cao ang tikvud pex mai ang kieh pex lauxleeing mai ang piawm sijax mukheu pa tiextu Tix ka keeing pex khankix.<sup>32</sup> Mawh kheu nan, yam in chawk pex yaox grawng singaix pa hoik luan mai pa hoik koe sivoie pex, jah ka singaix hoik phan Siyiex kawm pui piang haktiex mai chawk

4:11-12 Lih 19:16-18, He 12:18-19. 4:13 Lih 31:18.  
4:14 Lih 21:1. 4:16 Lih 20:4, Krub 26:1, Pi 5:8, 27:15.

4:20 Lih 19:5, Pi 7:6, 14:2, 26:18, Ti 2:14, 1Pe 2:9.  
4:21 Si 20:12. 4:24 He 12:29. 4:27-28 Pi 28:36. 4:29 Ye 29:13.

khaing daog caong majee, tom hoekka daog caong ma blaong, hoik sax koe grawng pa ting lhaong awm in phan ang mawh nan, hoik sax mhong pex grawng ceu in lie? <sup>33</sup> Hoik sax mhong pui lox sikah Siyiex khaing daux sigreung ngu, awm hoik mhong pex mai im ju awm pex lie? <sup>34</sup> Mawh siyiex mawx pa hoik hu taoh ceu pui tix cub khaing daux sinax pui tang ceu tix cub, ka daux pa cheukcheu ti yuh mhairug, ka daux pa daoxdeng, ka daux naing mai ka plawng taix pa ting riang pa nih tix mai ka daux pa lhatgraung, awm pa hoik yuh Simiang Siyiex pex son pex ka daux meung Ejiptux ka plak sivoie ngai pex? <sup>35</sup> Pa jhi Nawh Cao pex yaox khankix mawh sonsang tawng pex Simiang Siyiex mawh Siyiex, lheu khaing Nawh ang lai koe Siyiex tang kaux. <sup>36</sup> Nawh Cao kieh pex mhong lox Tix khaing raoma, sonsang pon sidiex gau ka pex, Nawh Cao hoik jhi pex yaox ngu pa ting lhaong Nawh Cao piang haktiex mai pex hoik mhong lox Nawh Cao khaing daux sigreung ngu. <sup>37</sup> Mawh kheu hoik moh Nawh Cao ka keeing pex mai laug doehru pex mai viex pex lih khaing meung Ejiptux ka sivoie ngai Tix tau mai pa ting siawp sibrawm Nawh <sup>38</sup> mai grheu ceu pui pa ting lhaong mai pa ting riang rao khaing pex, ka sivoie pex, sonsang viex pex laig ka daux mai tawx pex cie haktiex kix tom hoek ka daux in singaix, <sup>39</sup> mawh kheu nan kieh pex tawng daux in singaix mai een ka daux rhawm tix, Simiang Siyiex mawh Siyiex pa koe piang raoma mai piang haktiex, ang lai koe Siyiex tang kaux. <sup>40</sup> Pex tak priex lox tat jhawm prawng mai lox tawm pingnyap Nawh Cao, pa tawm aux ka pex in singaix, sonsang hu mhawm hoek mhawm pex tau mai kawn praix pex mai kawn saux kawn sex pex, sonsang lang singaix ju pex, daux haktiex pa tawx Simiang Siyiex pex ka pex leeingju.”

### **To Plak Toh**

<sup>41</sup> Mose goih ti deuh vengloe veng ka plak sivoie rawm klawng Yawdan, <sup>42</sup> sonsang to pui pa ludloe ti pah ka pui ti klawd tan, pa mawh pui pah ka paox plawg tix ka daux pa ang su ti yuh mai pa ang koe kraxkoeng ka nawh ka **4:35** Mak 12:32. **4:41-43** Yaw 20:8, 9. **5:8**, **9** Lih 34:17, Krub 19:4, 26:1, Pi 4:15-19, 27:15.

bawgyam pa hoik luan mai yam to nawh ti hoek ka veng an tix veng veng, nawh tak im ju. <sup>43</sup> Veng an khankix mawh veng Beza pa koe ka daux tiag dee lung, mawh son pui Rubin, veng Ramok pa koe daux haktiex Gilat, mawh son pui Gat mai veng Golan pa koe daux haktiex Bashan, mawh son pui Manashe. <sup>44</sup> In mawh lox pingnyap pa deuh Mose plak sivoie kawn praix Isarelax, <sup>45</sup> in khankix mawh lox kham mhairug ka lox been prawngsee mai lox tat jhawm prawng pa hoik kraik Mose ka kawn praix Isarelax yam lih kix khaing meung Ejiptux, <sup>46</sup> plak sivoie rawm klawng Yawdan ka ngawd see veng Betpegurax, daux haktiex Sihon simiang Amawrix, pa ot veng Heshabon pa hoik pex Mose mai kawn praix Isarelax yam lih kix khaing meung Ejiptux. <sup>47</sup> Kix tee ti cie haktiex nawh mai haktiex Awgax pa mawh simiang Bashon mai kiex mawh simiang pui Amawrix pa ot ka plak lih singaix rawm klawng Yawdan, <sup>48</sup> jah ka veng Araw pa koe praok rawm klawng Anon tom hoek ka gawng Sirion, pa mawh gawng Heramon, <sup>49</sup> khawm Arabax khawmuik, pa koe plak lih singaix rawm klawng Yawdan, tom hoek ka rawm sigrit sigra Arabax mai caong gawng Pisagaheue.

### **Lox Tawm Pingnyap Kao Gum (Lih 20:1-17)**

**5** Mose kok ka pui Isarelax khankix ah nin, “Pui Isarelax khankix nghiet heue, lox been prawngsee mai lox tat jhawm prawng pa sang kraik aux pex mhong daux in singaix, pex tak gau tix kah mai yuh satix ka yuh tix an khankix. <sup>2</sup> Simiang Siyiex ex hoik yuh sijax mukheu mai ex piang gawng Hawrap. <sup>3</sup> Simiang Siyiex ang yuh sijax mukheu tau mai keeing ex nongnong, viang mawh nan yuh tau mai ex can pui pa ot tin pa im ju in singaix. <sup>4</sup> Simiang Siyiex hoik sikah tau mai pex pakngai taw pakngai, piang gawng daux sigreung ngu, <sup>5</sup> aux hoik cung sinax Simiang Siyiex mai pex yam an, sonsang kraipao gumlox Simiang Siyiex ka pex, mawh kheu pex hoik lhat ka ngu, pex ang cu ti haok piang gawng. Nawh Cao ah nin, <sup>6</sup> Aux mawh Simiang Siyiex pex pa hoik viex pex lih khaing meung Ejiptux mai ka dee yuh pex siliex. <sup>7</sup> Lheu khaing Aux ang pon ti koe siyiex tang kaux. <sup>8</sup> Ang pon ti yuh rieanggrang pa saik tix, tix ceuceuson

tokaux tix, pa mawh rieanggrang tix ceuceu, pa koe daux raoma angah, pa koe plak greem mai piang haktiex angah mai pa koe daux rawm greem haktiex angah,<sup>9</sup> ang pon ti krub mai ang pon ti yuh kaing kix, mawh kheu Aux mawh Simiang Siyiex pex, mawh Siyiex pa bak viang mai pa tawx phimap keeing pex piang kawm praix tom hoek loe pon ju doehru ka pui pa koeng ka Aux,<sup>10</sup> viang mawh nan, Aux jhi krax moh Tix ka pui pa moh ka Aux mai pui pa hawt ka lox tawm pingnyap Aux tom hoek kaing rheng ju.<sup>11</sup> Ang pon kok ceukaux Simiang Siyiex maix giexgoing, mawh kheu pui pa kok ka ceukaux Siyiex giexgoing Siyiex takang deuh nawh mawh pa ang koe phimap.<sup>12</sup> Dohkeud ka singaix tuah mai een mawh singaix singax singeh awm lox tawm Simiang Siyiex pex ka pex.<sup>13</sup> Maix tak yuh kaing jhaw son tokaux tix liah ngaix,<sup>14</sup> viang mawh nan, daux ngaix aliah, mawh ngaix tuah Simiang Siyiex maix, maix tak ang pon ti yuh kaing tix ceu kawm maix khawm kawm simex, kawm sibun maix, siliex simex siliex sibun maix, khawm tobrie pa mawh mawie, la maix, nyosinie maix pa ot daux diang siviex veng maix khankix, kawncau simex, kawncau sibun maix khankix tak lauxlee tix awm maix.<sup>15</sup> Maix tak dohkeud ka hoik sax mawh tix siliex ka daux meung Ejiptux mai Simiang Siyiex pa mawh Siyiex pex viex pex lih khaing tan ka taix pa ting riang Tix mai ka plawng taix pa hoik nih Tix, mawh kheu nan Simiang Siyiex pex tawm lox kieh pex priex ka singaix tuah.<sup>16</sup> Yungyi ka miex keeing maix awm lox pa hoik tawm Simiang Siyiex maix ka maix, sonsang langju maix mai sonsang hu mhawm hoek mhawm pex tau ka daux haktiex pa tawx Simiang Siyiex maix ka maix.<sup>17</sup> Maix tak ang pon pah pui yum.<sup>18</sup> Maix tak ang pon ti ludvao mai moeng kawm pui.<sup>19</sup> Maix tak ang pon ti briex.<sup>20</sup> Maix tak ang pon ti kham mhairug pa ang mawhmeh ka paox plawg tix.<sup>21</sup> Maix tak ang pon ti ghoing ka moeng paox plawg maix mai paw simie ti cie ka nyiexma paox plawg tix, kaung nawh,

siliex simex, siliex sibun nawh, mawie nawh, la nawh mai kraung tix ceuceu khaing paox plawg maix.

***Krax Lhat Pui Hun*** (Lih 20:18-26)

<sup>22</sup>Gumlox in khankix mawh pa krai Simiang Siyiex ka pui hun khawmuik piang gawng khaing sigreung ngu, daux paiawm mai ka daux pa faik sigrien sigre tau mai lox ting sinum mai ang lai baoux tittix. Nawh Cao hoik tiem piang khlawp simaox ra khlawp mai tawx an ka aux.

***Pui Khankix Lhatgraung Ka Siyiex***

<sup>23</sup> Yam mhong pex lox pa kaoh khaing sigreung pa faik, yam gleeing ngu ka gawng, hoek ka dex aux, pa mawh cao kaing doehru pex mai kuad song khawmuik <sup>24</sup> mai pex ah nin, jhakheue, Simiang Siyiex ex hoik jhi min plakngai mai pa ting lhaong Tix ka ex mai ex hoik mhong lox Nawh Cao khaing daux sigreung ngu, ex hoik yaoux kawm im ju pui pa hoik sikah mai Siyiex ka daux in sigaix.<sup>25</sup> Yam in ex lai sang yum yuh ka mawx lie? Mawh kheu ngu pa ting lhaong in tak gleeing ka ex, phan ex baoux mhong ka lox Simiang Siyiex ex tak yum.<sup>26</sup> Awm mhong ex lox sikah Siyiex pa im ju khaing sigreung ngu, mawh pui mawx pa mhong mai im ju lie? <sup>27</sup> Maix tak hu dex mai nghiet lox krai Simiang Siyiex ex khawmuik mai deeh viex gumlox pa krai Simiang Siyiex ka maix khawmuik mai krai ex mhong mai ex tak nghiet mai hawt ti yuh.<sup>28</sup> Simiang Siyiex hoik mhong lox pex, yam sikah pex ka aux mai Simiang Siyiex ah nin ka aux, Aux hoik mhong ka lox sikah pui in khankix ka maix, lox pa krai kix khawmuik mawh pa khaw.<sup>29</sup> Kieh kix koe rhawm ceu ankix ka daux tix, sonsang lhatgraung ka Aux mai priex ti hawt gumlox pingnyap Aux khankix jheengjheeng, sonsang pon kix mai khawm kawm praix kix buanson ceu pa mhawm leeingju heue.<sup>30</sup> Hu ka kix, deeh kieh kix ing ka nyiex gox tix.<sup>31</sup> Phan mawh maix cung dex Aux tin, Aux tak

5:9-10 Lih 34:6, 7, Si 14:18, Pi 7:9-10. 5:11 Krub 19:12. 5:12 Lih 16:23-30, 31:12-14. 5:13-14 Lih 23:12, 31:15, 34:21, 35:2, Krub 23:3. 5:16 Pi 27:16, Mat 15:4, 19:19, Mak 7:10, 10:19, Luk 18:20, Efe 6:2. 5:16 Efe 6:3. 5:17 Yam 9:6, Krub 24:17, Mat 5:21,

Mat 19:18, Mak 10:19, Luk 18:20, Ro 13:9, Jas. 2:11. 5:18 Krub 20:10, Mat 5:27, 19:18, Mak 10:19, Luk 18:20, Ro 13:9, Jas. 2:11. 5:19 Krub 19:11, Mat 19:18, Mak 10:19, Luk 18:20, Ro 13:9. 5:20 Lih 23:1, Mat 19:18, Mak 10:19, Luk 18:20. 5:21 Ro 7:7, 13:9. 5:22-27 He 12:18-19.



krai lox tawm pingnyap mai lox been prawngsee mai lox tat jhawm prawng pa sang gau maix ka kix sonsang hawt yuh kix daux haktiex pa tawx Aux kix cie. <sup>32</sup> Mawh kheu nan, pex tak rien rhawm tix sonsang hawt yuh pex awm gumlox pa hoik tawm Simiang Siyiex ka pex heue. Pex tak ang pon ti veh plak goix plak dawm. <sup>33</sup> Pex tak lawng daux krax pa hoik tawm Simiang Siyiex pex ka pex, sonsang im ju pex mai pon buanson ceu pa mhawm tau mai langju ka daux haktiex pa sang pon pex ti cie heue.”

### **6 Lox Tawm Pingnyap Pa Kied Ting**

“In mawh lox tawm pingnyap mai lox been prawngsee mai lox tat jhawm prawng pa hoik tawm Simiang Siyiex pex, sonsang gau aux ka pex mai sonsang hawt pex ti yuh daux haktiex pa tiang pex ti hu teei ti cie, <sup>2</sup> sonsang lhatgraung pex ka Simiang Siyiex pex mai kawn praix pex kawn saux kawn sex pex, tak priexrien ka lox been prawngsee mai lox tawm pingnyap, pa tawm Aux ka pex daux singaix yam im ju maix, sonsang lang singaix im ju maix. <sup>3</sup> O pui Isarelaux khankix nghiet heue, yuh satix mai hawt yuh ceu an khankix mai sonsang hu mhawm hoek mhawm pex tan, sonsang haohhun pex awm hoik yuh Simiang Siyiex Siyiex keeing pex sijax mukheu tau mai pex ka haktiex deeh lih rawm teeh mai rawm hia. <sup>4</sup> O pui Isarelaux khankix nghiet heue, Simiang Siyiex, Siyiex ex mawh Siyiex tix kaux khaing, <sup>5</sup> maix tak moh ka Simiang Siyiex maix khawm rhawm tix mai khawm ju tix mai khawm riang rao tix khawmuik. <sup>6</sup> Priex lox tawm Aux daux rhawm tix daux in singaix, <sup>7</sup> maix tak coca ti gau kawm praix tix mai maix tak krai yam ngawm maix nyiex tix, yam hu maix krax mai yam it maix mai yam kaoh maix, <sup>8</sup> maix tak vien ti deuh lox ankix awm mhairug pa koe piang taix maix mai ankix tak mawh pa awm mhai tiem ti deuh piang dongre tix. <sup>9</sup> Maix tak tiem ti deuh ankix piang pang siviex nyiex tix mai piang siviex veng khankix.

### **Tawx Satix Ka Pa Ang Cu Nghiet**

<sup>10</sup> Yam viex Simiang Siyiex pex, pex laig ka daux haktiex pa hoik tiextu Nawh Cao ka keeing pex Abraham, Icak mai Yakop sonsang tawx Nawh Cao veng pa ting mai pa mhawm grang pa ang maix yaox ti sum <sup>11</sup> mai nyiex ma pa naog kraung mhawm khankix pa mawh pa ang maix tie khawm mai rawm daux pa ang maix kaong, sipeem plix siiet mai khaox sanlun, pa ang maix sum mai maix hoik yaox ti ih tom sak, <sup>12</sup> yuh satix maix son ang maix piawm Simiang Siyiex pa hoik viex maix lih khaing meung Ejiptux ka dee yuh maix siliex. <sup>13</sup> Lhatgraung ka Simiang Siyiex tix, maix tak yuh kaing jhaw Nawh mai tiextu tix ka ceukaux Nawh. <sup>14</sup> Maix paw hawt khaix siyiex tang kaux pa mawh siyiex pui pa ot vung viang maix, <sup>15</sup> mawh kheu Simiang Siyiex maix, pa ot sinax pex mawh Siyiex pa bak viang mai lhat krax songrhawm Siyiex maix lih piang maix mai yuh maix lauxleeing piang haktiex. <sup>16</sup> Ang pon ti cheukcheu ka Simiang Siyiex tix, awm hoik cheukcheu maix ka Nawh Cao ka daux Masa. <sup>17</sup> Pex tak coca ti priex ka lox tawm pingnyap Simiang Siyiex, Siyiex pex mai mhairug Nawh Cao mai lox been prawngsee pa hoik tawm Nawh ka pex. <sup>18</sup> Pextakyuh pa khaw mai pa mhawm, ka plak sivoe ngai Simiang Siyiex, sonsang hu mhawm hoek mhawm pex, sonsang pon pex ti laig mai teei ti cie haktiex pa mhawm, pa hoik tiextu Simiang Siyiex tix tawx ka keeing pex <sup>19</sup> mai grheu pui koeng pex khankix khaing sivoe ngai pex, awm pa hoik yuh Simiang Siyiex mukheu. <sup>20</sup> Bawgyam pa sang hoek kawm praix pex tak chaw ka pex ah nin, dee bleeh lox kham mhairug, lox been prawngsee mai lox tat jhawm prawng pa hoik tawm Simiang Siyiex ex ka pex mawh patix? <sup>21</sup> Maix tak ah nin ka kawm simex tix, ex hoik mawh siliex Pharaw daux meung Ejiptux mai Simiang Siyiex hoik viex ex lih khaing meung Ejiptux ka plawng taix pa ting riang Tix, <sup>22</sup> Simiang Siyiex hoik jhi mhairug pa daoxdeng ka plak sivoe ngai ex ka daux pa ting lhaong mai krax pa

6:4 Mak 12:29. 6:5 Mat 22:37, Mak 12:30, Luk 10:27. 6:6-9 Pi 11:18-20. 6:10 Yam 12:7.

6:10 Yam 26:3. 6:10 Yam 28:13. 6:13 Mat 4:10, Luk 4:8. 6:16 Mat 4:7, Luk 4:12. 6:16 Lih 17:1-7.

langteung ka meung Ejiptux maika Pharaw mai ka pui nyiexma nawh khankix. <sup>23</sup>Nawh Cao viex ex lih khaing tan, sonsang viex Nawh ex laig ka dauh haktiex pa hoik tiextu Nawh ti tawx ka keeing ex khankix. <sup>24</sup> Simiang Siyiex hoik tawm lox sonsang hawt ex ka lox tat jhawm prawng mai lhatgraung ka Simiang Siyiex ex, sonsang mhawm ex jheengjheeng mai sonsang priex Nawh Cao ex im ju, awm pa yaox ex dauh in singaix. <sup>25</sup> Phan ex yuh satix mai hawt yuh awm lox tawm pingnyap ka plak sivoe Simiang Siyiex ex, awm pa hoik tawm Nawh Cao ka ex, an tak mawh parahsee ka ex.”

### **7 Rieanggrang Pui Khanan** (Lih 34:11-17)

“Yam viex Simiang Siyiex pex laig ka haktiex pa sang teei pex ti cie mai grheu ceu pui ka plak sivoe pex pa mawh ceu pui Hittix, ceu pui Giragashi, ceu pui Amawrix, ceu pui Khanan, ceu pui Pharazi, ceu pui Hiwix, ceu pui Yebusix, ceu pui ting riang mai pa haohhun aliah ceu khaing pex, <sup>2</sup>yam ap Simiang Siyiex ka kix ka dauh taix pex, pex tak tap toi kix mai yuh kix lauxlak pakleeing, maix tak ang pon yuh sijax mukheu mai kix mai ang pon yuh krax cauxrhawm ka kix. <sup>3</sup>Maix tak ang pon mawh nyiex ma mai kix mai ang pon tawx kawm sibun tix ka kawm simex kix mai ang pon teei kawm sibun kix son kawm simex tix. <sup>4</sup>Kix tak deeh kieh kawm simex pex khankix veeh ti singai khaing pa hawt kix khaix Aux, sonsang yuh kaing jhaw siyiex tang kaux khankix mai Simiang Siyiex songrhawm ka pex mai Nawh Cao tak yuh pex lauxleeing dommawx doman. <sup>5</sup> Mai maix tak yuh nin ka kix, maix tak yieh khu dee tankix mai tat ti tik rieanggrang Asherax pa yuh ka khaox mai gleeing rieanggrang pa hoik saik kix khankix ka ngu.

### **Pui Pa Singax**

<sup>6</sup> Mawh kheu maix mawh pui pa singax singeh, son Simiang Siyiex pex, Simiang Siyiex pex hoik laug pex mawh pui cie Nawh Cao khaing ceu pui piang haktiex. <sup>7</sup> Simiang Siyiex moh pex mailaug ka pex, **7:1** Kawm 13:19. **7:5** Pi 12:3. **7:6** Lih 19:5, Pi 4:20, 14:2, 26:18, Ti 2:14, 1Pe 2:9. **7:9-10** Lih 20:5-6, 34:6, 7, Si 14:18, Pi 5:9-10. **7:12- 16** Pi 11:13-17.

mawh kheu haohhun pex khaing pui tang ceu ang lai mawh, kheu pex hoik mawh pa kied tux khaing ceu pui khawmuik. <sup>8</sup> Mawh kheu Simiang Siyiex moh ka pex mai Nawh Cao priexrien lox tiextu, pa hoik tiextu Nawh ka keeing pex khankix mai Siyiex hoik viex pex lih ka plawng taix pa ting riang mai taoh lawd pex khaing dee yuh siliex ka dauh tawm taix Pharaw simiang Ejiptux. <sup>9</sup> Mawh kheu nan, kieh pex tawng ka Simiang Siyiex, Siyiex pex mawh Siyiex pa kaux sijax mai pa priex sijax mukheu mai krax moh krax rhawm tau mai pui pa moh ka Nawh Cao mai ka pui pa priexrien pingnyap Nawh Cao tom hoek ju pui kaing rheng <sup>10</sup> mai pawk bix ka pui pa koeng ka Nawh Cao ka plak sivoe ngai kix mai yuh kix lauxleeing, Nawh tak ang yawg Tix ka pui pa koeng ka Nawh Cao, Nawh tak pawk bix ka kix, ka plak sivoe ngai kix. <sup>11</sup> Maix tak priexrien mai hawt yuh lox tawm pingnyap, lox been prawngsee mai lox tat jhawm prawng pa tawm Aux ka pex dauh in singaix.

### **Pa Pon Buanson Kheu Pa Cu Nghiet**

(Krub 26:3-13, Pi 28:1-14)

<sup>12</sup> Mawh kheu jao nghiet maix lox tat jhawm prawng in khankix mai priexrien mai hawt yuh ka ankix, Simiang Siyiex, Siyiex pex tak yuh sijax mukheu mai krax moh krax rhawm Tix ka pex, ka pa hoik tiextu Nawh ka keeing pex khankix, <sup>13</sup> Nawh Cao tak moh pex, nawb buan ka pex mai kieh pex haohhun, Nawh Cao tak nawb buan ka doehru pex mai plix dauh haktiex pex, simie nghox pex mai rawm plix siiet pex mai bee pex mai kieh kawm mawie, kawm yung, kawm pex pex baox pre dauh haktiex pa tiextu Nawh Cao ti tawx ka keeing pex khankix. <sup>14</sup> Pex tak pon buanson ka sinax ceu pui khawmuik, simex, sibun tak ang koe pui neh dauh sinax pex mai dauh sinax tobrie pex. <sup>15</sup> Simiang Siyiex tak teei ti tik jhawm saux khaing pex mai jhawm saux pa kied langteung, pa hoik tawng pex ka dauh meung Ejiptux, tak ang kieh hoek piang pex, tak kieh hoek piang pui pa koeng ka pex khankix. <sup>16</sup> Pex tak yuh pui pa ap Simiang Siyiex ka pex lauxleeing, ngai pex tak ang pon cauxrhawm ka kix, pex tak ang pon

yuh kaing jhaw siyiex kix, mawh kheu an tak mawh kie ka son pex. <sup>17</sup>Phan pex keud ka dauh rhawm tix ah nin, ceu pui in khankix nielheu ting riang khaing aux, aux sang pon grheu kix to yuh ka mawx? <sup>18</sup>Pex paw lhat ka kix, viang mawh nan, pex tak dohkeud ka pa hoik yuh Simiang Siyiex, Siyiex pex ka Pharaw mai ka meung Ejiptux khawmuik, <sup>19</sup>krax cheukcheu pa ting pa hoik yaox pex ka ngai tix, mhairug pa daoxdeng mai taix pa ting riang mai plawng taix pa hoik nih tix, pa hoik viex Simiang Siyiex Siyiex pex lih, Simiang Siyiex Siyiex pex tak yuh awm an ka pui pa lhatgraung pex kah. <sup>20</sup>Lheu khaing an Simiang Siyiex Siyiex pex tak ploi phung awng sinax kix, tom sidah lauxleeing pui pa kawn deuk mai ka pui pa mox tix ka plak sivoie ngai pex. <sup>21</sup>Paw pex yaohyee ka kix, mawh kheu Simiang Siyiex Siyiex pa ot sinax pex mawh Siyiex pa ting sibrawm mai pa lhatgraung pui kah. <sup>22</sup>Simiang Siyiex Siyiex pex tak grheu ceu pui khankix sivoie ngai pex tix bawg ceex ceex, pex tak ang pon yuh kix lauxleeing tix dom neh, lhat tobrie pa koe dauh tiag khankix, nie pre haohhun khaing pex. <sup>23</sup>Viang mawh nan, Simiang Siyiex, Siyiex pex, tak ap kix ka pex mai kieh kix somnai tom sidah hoek kix krax lauxleeing. <sup>24</sup>Nawh Cao tak ap simiang kix ka dauh tawm taix pex, pex tak yuh ceukaux kix laux khaing greem raoma, pui tix kaux kawx tak ang pon cung pon tieb ka pex tom sidah yuh pex kix lauxleeing. <sup>25</sup>Pex tak gleeing siyiex rieanggrang pa saik kix ka ngu, pex paw ghoing ka mau khri pa koe piang an mai paw teei son tix, lhat pex krix ka kie an, mawh kheu an mawh pa seeing Simiang Siyiex, Siyiex pex kah. <sup>26</sup>Pex paw viex pa seeing brai laig ka dauh nyiex tix, lhat pex awm ka kraung pa jhaxlawg an, kieh pex seeing mai koeng ka ankix, an mawh ceu pa jhaxlawg ka heue.”

### **8 Dohkeud Ka Simiang Siyiex Pex**

“Lox tawm pingnyap pa tawm aux ka pex ka dauh in singaix, pex tak priex mai hawt ti yuh sonsang im ju mai nie pre pex haohhun mailaig ti teei ka haktiex pa tiexu **8:3** Mat 4:4, Luk 4:4. **8:11-16** Ho 13:5-6.

Simiang Siyiex ka keeing pex. <sup>2</sup>Dohkeud ka pa hoik thong Simiang Siyiex pex ka krax hu pex ka dauh tiag tixpon num sonsang kieh Nawh Cao pex koe rhawm awn rhawm tiem mai cheukcheu rhawm pex mawh pa yuh ka mawx mai sonsang tawng ka priexrien pex lox tawm pingnyap mai ang priexrien kah. <sup>3</sup>Nawh Cao kieh pex koe rhawm awn rhawm tiem mai ploi pex cai rhawm mai tawx pex ih ka mannax pa ang pex sax tawng mai pa ang keeing pex sax tawng mai sonsang kieh Nawh Cao pex tawng ka ang pui im ka blah nongnong, viang mawh nan im kheu lox pa lih khaing jheeh Simiang Siyiex. <sup>4</sup>Ka dauh tixpon num an, kraung ceep pex ang sax prim sax griah mai caong pex kawx ang sax saux sax uah. <sup>5</sup>Deuh pex tawng an khankix ka dauh rhawm tix awm sidiex gau keeing ka kawn simex tix, Simiang Siyiex Siyiex pex kawx sidiex gau ka pex. <sup>6</sup>Mawh kheu nan, pex tak priexrien ka lox tawm pingnyap Simiang Siyiex Siyiex pex mai hawt dauh krax Nawh mai lhatgraung ka Nawh Cao. <sup>7</sup>Mawh kheu Simiang Siyiex Siyiex pex viex pex laig ka dauh haktiex pa mhawm, dee koe rawm klawng, rawm keut, rawm dauh, pa lih khaing dauh ngawd mai khaing dauh gawng khankix, <sup>8</sup>haktiex pa koe nghox ca, nghoxkoi, nhu plix siiet, khaox ruh, plix kla jiang, khaox sanlun mai rawm hia khankix. <sup>9</sup>Mawh haktiex pa sang yaox maix ti ih blah mai pa ang koe ceu pa cudcha, pa grumnaog mai haktiex simaox pa mhawm rhiem, pex tak yaox ti kaong tawng khaing gawng khankix. <sup>10</sup>Pex tak yaox ti ih mai sak mai pex tak yaogyaw buanson Simiang Siyiex, Siyiex pex, son haktiex mhawm pa hoik tawx Nawh ka pex. <sup>11</sup>Yuh satix pex son ang pex piawm ka Simiang Siyiex Siyiex pex ka dauh pa ang tix priexrien lox tawm pingnyap, lox tat jhawm prawng mai lox been prawngsee pa tawm Aux ka pex dauh in singaix. <sup>12</sup>Yam hoik ih pex mai hoik sak mai yam sum pex ka nyiex mhawm khankix <sup>13</sup>mai yam deeh pre haohhun cub tobrie pex mai cub yung pex mai yam deeh haohhun mau khri pex mai canceu pa koe pex khankix <sup>14</sup>mai rhawm pex tak yaw rangdi ka ankix, pex tak piawm ka Simiang

Siyiex Siyiex pex, pa viex pex lih khaing meung Ejiptux, khaing dee mawh pexsiliex, <sup>15</sup> Cao pa hoik thong pex hu ka daux tiag pa ting, dee lhatgraung, ka dee koe siuing ngu mai tamtim khankix mai haktiex dee kroh ang rawm koe kawx pa hoik kieh rawm lih khaing daux rang kiien son pex, <sup>16</sup> Cao pa hoik tawx pex ih mannax ka daux tiag, pa ang keeing pex nyang sax tawng, sonsang kieh Nawh pex koe rhawm awn rhawm tiem mai cheuk ka pex mai sonsang yuh pa mhawm ka pex daux pa ghoik, <sup>17</sup> lhat pex keud ah nin daux rhawm tix, aux hoik magmi, kheu siawp sibrawm mai riang rao plawng taix tix. <sup>18</sup> Kieh pex dohkeud ka Simiang SiyiexSiyiex pex, mawh kheu Nawh mawh pa tawx siawp sibrawm riang rao krax magmi ka pex sonsang kauxcong sijax mukheu pa tiextu Nawh ka keeing pex khankix awm pa koe daux in singaix. <sup>19</sup> Phan maix piawm ka Simiang Siyiex maix mai phan maix hawt grawng lawng khaix siyiex tang kaux mai yuh kaing jhaw kix mai krub ka kix, aux tak kham mhairug ka son maix ka daux in singaix, maix tak lauxleeing tete. <sup>20</sup> Awm ceu pui pa hoik yuh Simiang Siyiex kix lauxleeing ka plak sivoie maix khankix, mawh kheu ang kix cu nghiet ka lox Simiang Siyiex, maix kawx tak lauxleeing awm an heue.”

### **Grawng Tiehfeen Pui IsarelaX**

“Ce u pui IsarelaX khankix eue, nghiet heue, pex tak tiang toi rawm klawng Yawdan daux in singaix mai laig sonsang grheu ka ceu pui pa nielheu ting mai pa nielheu ting riang khaing pex, pon ka veng pa ting maiveng pa kauxcong pa lhaong tom cux raoma, <sup>2</sup> pui pa ting lhaong kaux hak, pa mawh doehru Anakax awm pa tawng maix khankix mai pa hoik mhong maix pui ah nin, mawh pui mawx pa pon cung ka plak sivoie doehru pui Anakax lie? <sup>3</sup> Mawh kheu nan, een tix tawng ka daux in singaix, Simiang Siyiex maix tak hu sivoie maix awm ngu pa gleeing. Nawh Cao yuh kix lauxleeing mai grheu kix ka plak sivoie maix. Mawh kheu nan maix tak grheu kix lih mai niied ti yuh kix lauxleeing awm lox pa hoik tawm Simiang Siyiex ka

9:9 Lih 24:18.

maix. <sup>4</sup> Khaix hoik grheu Simiang Siyiex kix khaing plak sivoie maix, paw dohkeud ti ah nin daux rhawm tix, “Mawh kheu koe pa rahsee aux, Simiang Siyiex hoik viex aux laig sonsang pon aux tix cie haktiex in, mawh kheu jao krax pa caoxcaig ceu pui inkix, Simiang Siyiex tom grheu kix lih khaing plak sivoie aux. <sup>5</sup> Ankix ang lai mawh, kheu pa rahsee maix mai krax pa rahsee rhawm maix, sonsang laig teei maix ti cie haktiex kix. Mawh kheu jao pa caoxcaig ceu pui inkix, Simiang Siyiex tom grheu kix lih khaing plak sivoie maix mai sonsang kieh Nawh Cao lox sijax mukheu Tix grumnaog ka pa hoik tiextu Nawh ka keeing maix Abraham, Icak mai Yakop.

### **Pa Tiehfeen Pui IsarelaX**

(Lih 31:18, 32:35)

<sup>6</sup> Mawh kheu nan, een tix tawng Simiang Siyiex tawx haktiex mhawm in ka maix, sonsang pon maix ti cie, ang mawh kheu rahsee maix, mawh kheu mawh maix ceu pui pa kiien ngawg. <sup>7</sup> Dohkeud mai paw piawm ka grawng pa hoik kieh maix Simiang Siyiex songrhawm ka daux tiag, jah ka singaix lih maix khaing daux meung Ejiptux tom hoek ka dee in, maix hoik mawh pa tiehfeen ka Siyiex. <sup>8</sup> Maix baux kieh Simiang Siyiex songrhawm ka daux haktiex Hawrax, Simiang Siyiex songrhawm ka maix, sang yuh maix lauxleeing. <sup>9</sup> Yam haok aux piang gawng sonsang rieb aux ti teei khlawp simaox, pa mawh khlawp simaox gumlox sijax mukheu pa hoik yuh Simiang Siyiex tau mai pex, yam an aux ot piang gawng tixpon ngaix tixpon sawm, aux angh blah mai ang nyaux rawm. <sup>10</sup> Simiang Siyiex ap khlawp simaox ra khlawp ka aux, pa hoik tiem ka giien taix Tix mai piang an hoik mawh gumlox pasikah Simiang Siyiex ka pex, piang gawng khaing sigreung ngu, singaix khrawm pex paox tix. <sup>11</sup> Khaix hoik luan tixpon ngaix tixpon sawm, Simiang Siyiex ap khlawp simaox an ra khlawp ka aux, pa mawh khlawp simaox lox sijax mukheu. <sup>12</sup> Simiang Siyiex ah nin ka aux, kaoh mai niied lih khaing tin. Grawh grawng nawh pui pa viex maix lih khaing meung Ejiptux khankix hoik yuh pa

lauxleeing. Kix niied ti veeh tix khaing daux pa tawm Aux ka kix, kix hoik yuh rieanggrang pa raug son tix. <sup>13</sup> Simiang Siyiex baox ah nin ka aux, Aux hoik yaox ka ceu pui in khankix mawh ceu pui pa kiien ngawg. <sup>14</sup> Grham Aux sonsang yuh Aux kix lauxleeing mai preet ceukau kix khaing greem raoma, Aux tak kieh maix mawh ceu pui pa nielheu ting riang rao mai pa nielheu ting khaing kix. <sup>15</sup> Mawh kheu nan, Aux deeh veeh ti lih hu khaing piang gawng mai gawng hoik gleeing ka ngu, khlawp simaox gumlox sijax mukheu an ra khlawp hoik koe ka daux tawm taix aux. <sup>16</sup> Yam jhak aux ti yaox, pex hoik lud ka Simiang Siyiex pex mai raug ka rieanggrang kawm mawie, pex niied ti veeh khaing pa hoik tawm Simiang Siyiex. <sup>17</sup> Aux taing ti tik khlawp simaox an ra khlawp khaing daux tawm taix tix khawm ra khawn mai hoik max ka plak sivoie ngai pex. <sup>18</sup> Aux deeh gup tix ka plak sivoie Simiang Siyiex awm phao voe tixpon ngaix tixpon sawm, Aux ang ih blah mai ang nyaux rawm kheu jao phimap pex khawmuik ka pa hoik lud pex ka daux pa yuh tix pa caoxcaig ka plak sivoie ngai Simiang Siyiex sonsang kieh pex Nawh Cao songrhawm. <sup>19</sup> Mawh kheu aux lhatgraung ka pa kied kin songrhawm Simiang Siyiex piang pex mai pa sang yuh Nawh pex lauxleeing, viang mawh nan, ka daux bawgyam an, Simiang Siyiex hoik baox deeh nghiet ka lox aux, <sup>20</sup> Simiang Siyiex hoik kied songrhawm ka Arun mai dex sang yuh nawh lauxleeing, mawh kheu nan, aux baox deeh rawgbuan, son Arun ka daux bawgyam an. <sup>21</sup> Aux teei rieang kawm mawie pa hoik raug pex pa hoik kieh pex lud mai gleeing ka daux ngu mai krid tom phawng mai aux tik phawng an ka daux rawm klawng pa lih khaing piang gawng. <sup>22</sup> Pex hoik kieh Simiang Siyiex songrhawm hawt baoh Taberax, baoh Masa mai baoh Kibarot Hatava khankix. <sup>23</sup> Yam ploi Simiang Siyiex pex lih khaing haktiex Kadeshabana Nawh ah nin, haok mai teei ti cie haktiex pa hoik tawx aux ka pex, yam an pex deeh tiehfeen ka lox **9:19** He 12:21. **9:22** Si 11:3. **9:22** Lih 17:7. **9:22** Si 11:34. **9:23** Si 13:17, Pi 1:21, Si 13:31; Pi 1:26, He 3:16.

pingnyap Simiang Siyiex mai ang yum rhawm ka Nawh Cao mai ang cu nghiet ka lox Nawh Cao. <sup>24</sup> Pex hoik tiehfeen ka Simiang Siyiex jah khaing daux singaix hoik tawng aux pex. <sup>25</sup> Mawh kheu nan, aux baox deeh gup tix ka plak sivoie Simiang Siyiex tixpon ngaix tixpon sawm, kheu hoik ah Simiang Siyiex tix sang yuh pex lauxleeing. <sup>26</sup> Mawh kheu nan, aux rawgbuan ka Simiang Siyiex ah nin, Cao Simiang Siyiex eue, paw yuh pui maix khankix, lauxleeing liak. Kix mawh sinngao Maix Cao pa hoik deeh taoh Maix Cao ka krax pa ting riang rao Tix mai pa hoik viex Maix Cao kix lih khaing daux meung Ejiptux ka plawng taix pa ting riang Maix. <sup>27</sup> Dohkeud ka kawncau maix Abraham, Icak mai Yakop liak, paw nyang keud ka pa kiien rhawm kix mai pa caoxcaig kix mai phimap kix. <sup>28</sup> Phan ang mawh nan, pui haktiex pa viex Maix Cao yix lih khankix tak sang ah nin, mawh kheu Simiang Siyiex ang doh pon viex kix hu ka daux haktiex pa hoik deuh Nawh Cao lox sijax mukheu tix ka kix, mawh kheu koeng Nawh Cao ka kix, Nawh Cao tom viex kix lih sonsang pah kix ka daux tiag. <sup>29</sup> Mawh kheu kix mawh pui Maix Cao mai mawh sinngao Maix Cao pa hoik viex Maix lih hu ka siawp sibrawm pa ting riang rao Maix Cao mai ka plawng taix pa hoik nih Maix Cao heue."

***Teei Khlawp Simaox Bawg Ra*** (Lih 34:1-10)

**10** "Yam an Simiang Siyiex ah nin ka aux, saik khlawp simaox pa awm phaoka ra khlawp mai haok ka Aux piang gawng mai yuh teug khaox tix mu. <sup>2</sup> Aux tak sang deeh tiem gumlox pa hoik koe piang khlawp simaox awm bawg phaoka pa hoik kieh maix max, maix tak deuh khlawp simaox in daux teug. <sup>3</sup> Mawh kheu nan, aux tom yuh teug ka khaox Akasha mai saik khlawp simaox ra khlawp awm phaoka mai haok piang gawng tau mai khlawp simaox an ra khlawp daux taix tix. <sup>4</sup> Nawh Cao tiem gumlox tawm pingnyap kao gum piang khlawp simaox an awm phaoka, pa mawh lox sikah Simiang Siyiex ka pex piang gawng khaing daux sigreung ngu, singaix khrawm pex paox tix, Simiang Siyiex deeh tawx ka aux. <sup>5</sup> Khaix an, aux deeh lih khaing gawng mai deuh khlawp simaox an daux teug pa

hoik yuh aux, yam in hoik koe daux teug tan, awm gumlox pa hoik tawm Simiang Siyiex ka aux. <sup>6</sup> Pui Isarelaux khankix lih hu khaing rawm daux Beneyakan mai hoek ka haktiex Moserax. Arun hoik yum mai kix sipaung nawh tan mai kawn simex nawh Eliaza dee plud ti yuh kaing jhaw cao giex kaing li tang nawh. <sup>7</sup> Jah khaing tan, kix lih hu ka haktiex Gugodax mai kix deeh lih khaing Gugodax mai hoek ka Yobatax haktiex koe rawm klawng tix dah. <sup>8</sup> Yam an Simiang Siyiex tang goih pui Lewix mai tawx beeh glawm klawm teug buan sijax mukheu Simiang Siyiex, sonsang cung kix ka plak sivoie Simiang Siyiex mai yuh kaing jhaw son Nawh Cao mai sonsang nawb kix buan ka daux min ceukaux Nawh Cao tom hoek in singaix. <sup>9</sup> Mawh kheu nan, pui Lewix tak ang koe nyum cie mai ang koe sinngao tau mai puxaik kix khankix, Simiang Siyiex mawh sinngao cie kix awm hoik yuh Simiang Siyiex maix sijax mukheu tix ka kix. <sup>10</sup> Aux ot piang gawng tixpon ngaix tixpon sawm awm bawg phaoka, yam an Simiang Siyiex deeh baox nghiet ka lox aux mai ang lai yuh pex lauxleeing. <sup>11</sup> Simiang Siyiex ah nin ka aux, kaoh thong krax mai hu sivoie pui khankix sonsang pon laig kix mai teei ti cie haktiex pa hoik tiextu Aux ka keeing kix khankix mai pasang tawx Aux ka kix.

### *Jhawm Jheet Been Prawngsee*

<sup>12</sup> Pui Isarelaux khankix eue, yam in pa mhaing Simiang Siyiex pex yuh mawh ceu patix lie? ceu an khankix mawh pa lhatgraung pex ka Simiang Siyiex pex mai sonsang hawt pex ti hu ka daux krax Nawh Cao khankix mai sonsang moh pex ka Nawh Cao mai sonsang yuh pex kaing jhaw Nawh, khawm rhawm tix mai khawm ju tix khawmuik. <sup>13</sup> Sonsang priex pex ti hawt gumlox pingnyap Nawh mai lox been prawngsee pa deuh Nawh Cao khankix, awm pa hoik tawm aux ka pex in singaix sonsang pon pex buanson ceu pa mhawm. <sup>14</sup> Meung raoma mai piang raoma pa kied ting lhaong mawh cie Simiang Siyiex pex, haktiex in mai khawm pa koe piang haktiex khawmuik kawx mawh cie Nawh Cao.

**10:6** Si 20:28, 33:38. **10:8** Si 3:5-8. **10:10** Lih 34:28. **10:17** Kawn 10:34, Ro 2:11; Ka 2:6, Efe 6:9. **10:22** Yam 46:27.

<sup>15</sup> Simiang Siyiex khawrhawm ka taxtux maix khankix mai kied moh ka kix, Nawh Cao hoik laug ti teei doehru kix khaing sinax ceu pui khankix awm pa koe ka daux in singaix. <sup>16</sup> Mawh kheu nan, pat hak rhawmrhi pex mai paw lai baox kieh ngawg pex kiien khaix in. <sup>17</sup> Grawh grawng nawh, Simiang Siyiex mawh Siyiex piang siyiex khankix mai Nawh Cao mawh Simiang piang simiang khankix mai Nawh Cao mawh Siyiex pa ting lhaong mai pa ting riang rao mai pa khaw ti lhatgraung kah mai pa ang jhak pakngai pui mai pa ang teei ka totaix chun praok khankix. <sup>18</sup> Nawh Cao priexrien mai prawngca son miexmai kawn doe ka daux pa rahsee mai Nawh Cao moh ka nyosinie mai tawx pa ih khawm kraung ceep ka kix. <sup>19</sup> Mawh kheu nan, moh ka nyosinie, pex kawx hoik mawh nyosinie daux meung Ejiptux. <sup>20</sup> Maix tak koe krax lhatgraung ka Simiang Siyiex maix mai yuh kaing jhaw Nawh Cao mai maix tak kleuk tix mai Nawh Cao mai yuh krax tiextu ka daux ceukaux Nawh Cao. <sup>21</sup> Nawh Cao mawh krax pa yaogyaw maix mai Nawh Cao mawh Siyiex maix pa hoik yuh ceu pa ting lhaong mai ceu pa lhat grawng ankhankix mawh pa hoik yaox maix ka ngai tix. <sup>22</sup> Keeing maix khankix lih hu ka daux meung Ejiptux atixgliah kaux, yam in Simiang Siyiex maix, hoik deeh yuh maix koe awm simuing raoma khankix ka daux pa nie pre haohhun heue."

### **11** *Totax Son Pa Cu Nghiet*

"Maix tak moh ka Simiang Siyiex tix mai priex ti hawt gumlox tawm Nawh mai lox been prawngsee pa deuh Nawh Cao mai lox tat jhawm prawng Nawh Cao mai lox pingnyap Nawh Cao khankix jheengjeeng. <sup>2</sup> Priex ti tawng ka daux in singaix, aux ang krai kawn praix maix khankix pa ang nyang sax koe krax tawng yung mai pa ang nyang sax yaox ka krax sidiex gau Simiang Siyiex maix khankix mai krax pa ting lhaong Nawh Cao mai plawng taix pa hoik nih Nawh Cao lih, <sup>3</sup> mhairug pa daoxdeng pa hoik yuh Nawh

**10:22** Yam 15:5, 22:17, 46:27, **11:3** Lih 7:8, 12:13.

Cao ka daux sigreung meung Ejiptux ka Pharaw, pa mawh simiang meung Ejiptux mai piang haktiex nawh khawmuik. <sup>4</sup> Ceu pa hoik yuh Nawh Cao ka krunaung meung Ejiptux khawm brung kix mai ling brung kix mai grawng pa yuh Nawh Cao rawm sigrit sigra raoh kheem ka kix, yam hawt pheet kix pex mai pa yuh Simiang Siyiex kix lauxleeing tom hoek in singaix. <sup>5</sup> Grawng pa hoik yuh Nawh Cao son pex ka daux tiag, tom sidah hoek pex dee in, <sup>6</sup> grawng pa hoik yuh Nawh Cao ka Datan mai Abiram kawn simex Eliabax ceu pui Rubin khankix, haktiex ang jheeh tix mai bleet ka kix, khawm nyiexma kix, khawm nyiex gox kix mai khawm kraung khrai tobrie kix khawmuik, ka daux sigreung ceu pui Isarela khankix <sup>7</sup> mai ngai pex hoik yaox ka grawng kaing pa ting lhaong Simiang Siyiex, ka pa hoik yuh Nawh Cao kuceu khawmuik.

***Nawb Buan Piang Haktiex Pa Tiextu***

<sup>8</sup> Mawh kheu nan, pex tak priex ti hawt gumlox pingnyap khawmuik pa tawm aux ka pex ka daux haktiex pa sang laig pex teeiti cie, <sup>9</sup> sonsang lang singaix im ju pex ka daux haktiex pa hoik tiextu Simiang Siyiex ti tawx ka keeing pex, ka son kix mai ka son doehrux kix pa mawh haktiex dee lih rawm teeih mai rawm hia khankix. <sup>10</sup> Grawh grawng nawh haktiex pa sang hu tee pex ti cie, ang lai awm haktiex Ejiptux dee hoik kaoh pex mai ka dee hoik rhuat pex simie mai dee shiao pex caong tix see rawm daux sipeem taux lhax. <sup>11</sup> Haktiex pa sang tee pex ti cie, mawh haktiex koe gawng lua mai daux ngawd daux lung, pa pon rawm lhiex <sup>12</sup> mai mawh haktiex pa priexrien Simiang Siyiex Siyiex pex, leeinglang num. <sup>13</sup> Phan pex jawk ti nghiet ka lox pingnyap pa tawm aux ka pex daux in singaix, moh ka Simiang Siyiex pex mai yuh kaing jhaw Nawh Cao khawm rhawm tix mai khawm ju tix khawmuik, <sup>14</sup> Aux tak tawx rawm lhiex ka haktiex pex bawgyam

**11:4** Lih 14:28. **11:6** Si 16:31-32. **11:13-17** Krub 26:3-5, Pi 7:12-16, 28:1-14. **11:18-20** Pi 6:6-9. **11:24-25** Yaw 1:3-5.

mawx bawgyam an, khawm rawm lhiex cao mai rawm lhiex lha sonsang pon pex ti khawm nghox, rawm plix siiet khraox mai bee khankix. <sup>15</sup> Sonsang yaox pex ti ih tom sak mai son to eei brie liang pex kawx Aux tak kieh rib kuah ka daux lung khankix. <sup>16</sup> Yuh satix pex, ha pex kox hawt khaix ceu pa phit lud mai deeh veeh ti yuh kaing jhaw siyiex tang kaux khankix mai krub ka ankix. <sup>17</sup> Phan ang mawh nan, krax songrhawm Simiang Siyiex tak lih piang pex mai Nawh Cao tak nyeeep raoma son ang lhiex lai lih mai haktiex tak ang lai chix plix mai pex tak graigrhup khaing haktiex pa mhawm, pa tawx Simiang Siyiex ka pex. <sup>18</sup> Mawh kheu nan, pex tak priex gumlox inkix pa hoik kraik aux ka daux rhawm pex mai vien ti deuh awm mhairug piang taix pex mai piang dongre pex. <sup>19</sup> Pex tak sidiex gau kawn praix pex ka gumlox an mai kraik grawng ankix yam ngawm pex daux nyiex, yam lawng pex krax, yam ti mai yam kaoh pex. <sup>20</sup> Maix tak tiem ti deuh piang pang siviex nyiex pex mai piang siviex veng, <sup>21</sup> sonsang baoux nie langju pex mai kawn praix pex khankix, sonsang baoux nie pre haohhun pex ka daux haktiex pa hoik tiextu Simiang Siyiex tix tawx ka keeing pex khankix, awm rheeng lang singai raoma, piang haktiex kawx awm an. <sup>22</sup> Phan pex yuh satix mai priex ti hawt ka gumlox pingnyap pa tawm aux ka pex khawmuik, moh ka Simiang Siyiex pex mai hawt grawng lawng khaix Nawh Cao mai een rhawm ka Nawh Cao tom kauxcong, <sup>23</sup> Simiang Siyiex tak grheu ceu pui in khankix lih hu plak sivoie pex. Pex tak pon ti cie haktiex ceu pui pa nielheu ting lhaong mai pa nielheu ting riang rao khaing pex. <sup>24</sup> Ka dee hoik dig pex kudah tak mawh cie pex, jah khaing daux tiag, tom hoek ka gawng Lebanon mai jah ka rawm Yufrethix, tom hoek ka plak klip rawm sigrit sigra, tak mawh dee kuang pex. <sup>25</sup> Pui tix kauxkawx tak ang pon ti cung ka plak sivoie ngai pex, Simiang Siyiex tak kieh pui lhatgraung ka pex mai piang haktiex dee hoik dig pex khankix, awm lox pa hoik tawm Nawh Cao ka pex. <sup>26</sup> Jhak heue, Aux deuh krax nawb buanson mai krax pa jhaxlawg ka plak sivoie pex daux in singaix, <sup>27</sup> phan pex cu nghiet ka lox tawm pingnyap

Simiang Siyiex pex, ka pa tawm aux daux in singaix, pex tak pon krax nawb buan.<sup>28</sup> Phan pex ang cu nghiet ka lox tawm pingnyap Simiang Siyiex mai phan veeh ti khaing daux krax pa hoik tawm aux ka pex daux in singaix mai hawt khaix siyiex tang kaux pa ang pex nyang sax tawng khankix, pex tak pon krax pa jhaxlawg.<sup>29</sup> Yam hoik viex Simiang Siyiex pex laig ka daux haktiex pa sang hu teei pex ti cie mai pex tak deuh krax pa nawb buan piang gawng Gerizim mai jhaxlawg piang gawng Ebalax.<sup>30</sup> Grawng an kieh koe ka toi rawm klawng Yawdan ka plak klip, ka daux haktiex ceu pui Khanan, pa koe daux lung plak toi veng Gilagalax hawt dex tiag khaox Piakvan More khankix ang mawh lie? <sup>31</sup> Pex tak sang tiang plak toi rawm klawng Yawdan mai laig daux haktiex pa sang teei pex ti cie, ka dee pa tawx Simiang Siyiex ka son pex mai ot ka daux haktiex an.<sup>32</sup> Pex tak priex ti hawt yuh awm lox been prawngsee pa deuh aux khankix mai lox tat jhawm prawng pa deuh aux ka plak sivoie pex khankix daux in singaix heue.”

### **12 Laug Dee Yuh Kaing Krub**

“In mawh lox lai beenli mai lox tat jhawm prawng pa sang priexrien pex ti hawt ka daux haktiex pa tawx Simiang Siyiex keeing pex ka pex glang singaix yam kawm im ju pex piang ca haktiex in. <sup>2</sup> Pex tak yieh lauxlak pakleeing ka dee pa hoik yuh ceu pui sang grheu pex an khankix, kaing jhaw siyiex cao kix, piang gawng lhaong, piang ton, mai pa koe ka greem khaox klai khankix. <sup>3</sup> Pex tak yieh ti tik khu dee tankix lauxleeing mai raig ti tik rong simaox kix khankix mai gleeing khaox rieanggrang Asherax ka ngu, pex tak kid rieanggrang siyiex pa hoik saik kix khankix mai yuh ceukaux kix lauxleeing khaing dee an. <sup>4</sup> Pex tak ang pon ti krub Simiang Siyiex pex, awm krub kix ka siyiex tix. <sup>5</sup> Viang mawh nan, pex tak sawg ti yaox ka dee pa laug Simiang Siyiex pa mawh dee deuh Nawh Cao ceukaux Tix mai dee ot Nawh Cao khaing daux doehru pex

11:29 Pi 27:11-14 Yaw 8:33-35. 12:3 Pi 7:5. 12:16 Yam 9:4. Krub 7:26-27, 17:10-14, 19:26, Pi 15:23.

khankix, pex tak hu ka dee an. <sup>6</sup> Pex tak teei ti viex krax tan pa gleeing, krax tan pa appong mai kao son tix son, krax tan pa yaog pa koe daux tawm taix pex, krax tan pa kham lox sijax mai krax tan pa tang koe rhawm pex, mai krax tan pa liang pex ti pon khaing cub yung, cub mawie pex khankix. <sup>7</sup> Pex tak ih ka plak sivoie Simiang Siyiex pex tan, pex mai kawm nyiemax pex khankix tak koe krax gauxrhawm ka daux pa hoik yuh pex ka taix ti khawmuik, pa hoik nawb Simiang Siyiex buanson ka pex. <sup>8</sup> Canceu pa yuh extin daux in singaix, ceu pa yuh pui kukaux ang pon ti yuh awm pa khawcaw ka ngai tokaux tix. <sup>9</sup> Yam in pex ang nyang bax hoek ka dee sang lauxlee tix, ka daux haktiex sinngao pa sang tawx Simiang Siyiex ka pex. <sup>10</sup> Yam tiang pex ka rawm klawng Yawdan, yam ot pex ka daux haktiex pa sang tawx Simiang Siyiex ka pex, pa mawh sinngao pa sang pon pex, yam tawx Nawh Cao pex lauxlee tix khaing pui koeng pex khankix, pa koe hawt rawbrim pex khawmuik. Mawh kheu nan, pex tak ot ka daux haktiex an tau mai pa yiienyawg. <sup>11</sup> Tak sang koe dee pa laug Simiang Siyiex pex, sonsang deuh Nawh Cao ceukaux Tix ot tan. Pex tak viex canceu pa tawm aux ka pex hoek tan, pa mawh krax tan pa gleeing, krax tan pa appong kao son tix son mai krax tan pa yaog pa koe daux tawm taix pex mai krax tan pa laug pex awm pa kham lox sijax tix ka Simiang Siyiex. <sup>12</sup> Pex tak gauxrhawm ka plak sivoie Simiang Siyiex pex mai kawm simex kawncaw sibun pex mai kawncaw simex kawncaw sibun pex mai ceucad Lewix khankix pa peung mai pex, pa ang koe nyum mai pa ang koe sinngao. <sup>13</sup> Yuh satix pex, son ang pex sang yuh krax tan pa gleeing ka can dee pa yaox pex kudah. <sup>14</sup> Viang mawh nan, pex tak yuh krax tan pa gleeing ka dahdee pa laug Simiang Siyiex khaing doehru pex mai pex tak yuh an khawmuik awm pa tawm aux ka pex. <sup>15</sup> Awm pa nawb Simiang Siyiex buan, pex tak pon ti pah mai ih nex pa koe ka daux veng pex khankix, ka canceu pa sang simie rhawm pex ti ih, pui pa singax angah, pa ang singax angah, tak pon ti ih tau, awm ih kix ka nex cak mai nex kiah. <sup>16</sup> Viang mawh nan, tak ang pon ti ih ka nham, tak



hieh piang tiex awm rawm. <sup>17</sup> Pex tak ang pon ti ih krax tan pa mawh kao son tix son khaing nghox pex, rawm plix siiet khraox pex, rawm bee pex mai khaing tobrie pa liang pex ti pon khaing cub yung, cub mawie pex khankix mai khaing krax tan pa kham lox sijax mai krax tan pa tang koe rhawm tix mai krax tan pa yaog pa koe daux tawm taix pex ka veng baoh dee ot pex. <sup>18</sup> Pex tak pon ti ih an khakix ka plak sivoie Simiang Siyiex ka dahdee pa laug Simiang Siyiex, pex mai kawn simex, kawn sibun pex mai kawncaw simiex, kawncaw sibun pex, khawm ceucad Lewix pa peung daux veng pex khankix mai pex tak gauhrhawm tau plak sivoie Simiang Siyiex, canceu pa hoik yuh pex ka taix tix. <sup>19</sup> Yuh satix pex, son ang pex piawm ka ceucad Lewix khankix, glang yam kawn im ju pex ka haktiex dee ot pex. <sup>20</sup> Yam yuh Simiang Siyiex mee haktiex maix viehva, awm gumlox sijax mukheu pa hoik yuh Nawh Cao ka maix, maix tak ah nin, aux tak ih nex kheu koe rhawm tix sang ih nex, maix tak pon ti ih nex, awm pa koe rhawm maix ti sang ih. <sup>21</sup> Phan dahdee pa laug Simiang Siyiex ti deuh son ceukaux Tix mawh pa singai khaing dee ot maix, tak pon ti pah tobrie eei maix mai khaing cub yung cub mawie pa hoik tawx Simiang Siyiex ka maix, awm gumlox pa tawm aux ka maix. Maix tak pon ti ih an ka daux veng baoh dee ot maix, awm pa koe rhawm maix ti sang ih. <sup>22</sup> Maix tak pon ti ih nex an awm pa ih tix nex kiah mai nex cak, pui pa ang singax mai pui pa singax khankix tak pon ti ih tau. <sup>23</sup> Yuh satix maix son ang maix ih nham, mawh kheu nham mawh ju, tak ang pon ti ih ju tau mai nex. <sup>24</sup> Maix tak ang pon ti ih nham, maix tak hieh nham piang tiex awm rawm. <sup>25</sup> Sonsang pon maix mai kawn praix maix buanson pa mhawm tau mai kawn saux maix khankix, yam yuh maix ceu pa khawcaw ka plak sivoie ngai Simiang Siyiex maix. <sup>26</sup> Krax tan ceu pa singax pa koe maix mai krax tan pa kham lox sijax pa hoik yuh maix, maix tak viex an khankix hu ka dahdee pa laug Simiang Siyiex. <sup>27</sup> Maix

**12:23-24** Krub 17:10-14, **12:32** Pi 4:2; Jhi 22:18-19.

tak tan krax tan pa gleeing nex khawm nham, piang khu dee tan Simiang Siyiex, nham totan pa appong maix khankix, maix tak hieh piang khu deetan Simiang Siyiex, maix tak ih nex an. <sup>28</sup> Sonsang pon maix mai kawn praix maix buanson pa mhawm tau mai kawn saux maix tix ju hoik tix ju, yam yuh maix ceu pa mhawm mai pa khawcaw ka plak sivoie ngai Simiang Siyiex, yuh kaing pa khawrhawm Nawh Cao mai nghiet ka lox pa tawm aux ka pex.

### *Yuh Satix Ang Krub Siyiex Tang Kaux*

<sup>29</sup> Yam teei Simiang Siyiex ti tik ka ceu pui haktiex pa sang laig ot maix ka daux khankix, khaing plak sivoie maix, maix tak yaox ti ot daux haktiex kix. <sup>30</sup> Yuh satix maix, son ang maix sang krix ka kie taong kix mai son ang maix sang hawt khaix kix, pa hoik lauxleeing ka plak sivoie maix mai son ang maix lai chawk grawng beenli pa krub kix ah nin, ceu pui inkix hoik yuh kaing jhaw siyiex kix yuh ka mawx? Aux tak sang yuh awm an, <sup>31</sup> maix tak ang pon ti krub Simiang Siyiex maix, awm pa yuh kix, kix yuh ceu pa seeing brai Simiang Siyiex maix mai ceu pa koeng Nawh Cao kah khankix kheu hoik gleeing kix ti tan kawn simex, kawn sibun tix ka siyiex kix. <sup>32</sup> Canceu pa tawm aux ka maix khankix, maix tak priex rhawm tix mai hawt ti yuh kah. Maix tak ang pon ti baox thie gumlox piang an mai ang pon ti tieh khaing an heue."

### **13** *Ciyang Cao jhai Pa Ang Mawhmeh*

"Phan cao jhai tix kaux kaux lih khaing daux sinax pex, pa chix kraidee bleeh camaox mai mhairug pa daoxdeng anghah, <sup>2</sup> mhairug mai mhai pa daoxdeng pa kraidee nawn ka pex khankix mawh pa hoik grumnaog kawx, nawn ah nin, kieh ex hawt khaix siyiex tang kaux pa ang pex nyang sax tawng mai yuh kaing jhaw kix. <sup>3</sup> Pex ang pon ti nghiet ka lox cao jhai pa chix kraidee bleeh camaox an, mawh kheu Simiang Siyiex pex cheuk ti yaox pex, grawng pex moh, ang moh ka Simiang Siyiex tix khawm rhawm mai khawm ju tix. <sup>4</sup> Pex tak hawt khaix Simiang Siyiex tix daux pa lhatgraung ka Nawh Cao mai priex ti hawt gumlox pingnyap Nawh Cao, nghiet ka

gumlox tawm Nawh Cao mai yuh kaing jhaw Nawh Cao.<sup>5</sup> Cao jhai angah, cao chix krai dee bleeh camaox angah, tak yaox ti pah yum, kheu krai kix grawng pa sang deeh veeh pex ti hu khaing Simiang Siyiex pex, pa hoik viex pex lih khaing daux meung Ejiptux, pa hoik taoh pex khaing dee yuh pex siliex mai nawh nyawglaw pex ludloe khaing daux krax pa hoik tawm Simiang Siyiex ka pex, pa hoik hu kapex daux krax Nawh Cao. Mawh kheu nan, pex tak teei ti tik pa caoxcaig khankix khaing daux sinax pex.<sup>6</sup> Phan puxaik maix, kawn simex kawn sibun maix khankix mai moeng maix pa koe piang naok maix mai paoxgrawm pa sidu rhawm maix khankix nyawglaw ka maix ah nin, kieh ex hu mai yuh kaing jhaw siyiex tang kaux, pa ang maix sax tawng khankix mai pa ang keeing maix sax tawng,<sup>7</sup> siyiex ceu pui pa ot hawt rawbrim maix khankix, pa koe dee dex mai dee singai angah, jah ka daog dee sidah haktiex ka plak in, tom hoek ka daog dee sidah haktiex plak an,<sup>8</sup> maix tak ang pon ti rieb lox nawh mai ang pon ti nghiet lox nawh, ngai maix tak ang pon ti koe krax cauxrhawm ka nawh mai ang pon ti koe rhawm pa lhawk ka nawh mai ang pon mox nawh dee glip.<sup>9</sup> Viang mawh nan maix tak pah ti tik nawh, taix maix tak hoek piang nawh phaoka, sonsang kieh maix nawh yum, khaix an taix pui hun tak pon ti hoek piang nawh.<sup>10</sup> Pex tak dheem nawh yum ka simaox, kheu jao nyawglaw nawh pex hu singai khaing Simiang Siyiex pa hoik viex pex lih khaing daux meung Ejiptux khaing dee yuh pex siliex.<sup>11</sup> Mawh kheu nan, pui Isarela khankix tak mhong ka ceu in mai koe krax lhatgraung mai kix tak ang lai baox yuh pa caoxcaig ankix awm hoik koe ceu in ka daux sinax pex.<sup>12</sup> Phan maix mhong ka pui tix kaux kaux pa ah nin ka daux veng pex tix veng veng, ka veng pa tawx Simiang Siyiex sonsang ot maix ka daux,<sup>13</sup> pui caox khankix hoik lih koe khaing daux sinax pex mai kix hoik nyawglaw ka pui pa ot ka daux veng pex ah nin, kieh ex hu yuh **14:1** Krub 19:28; 21:5. **14:2** Lih 19:5-6, Pi 4:20, 7:6; 26:18, Ti 2:14, 1Pe 2:9.

kaing jhaw siyiex tang kaux, siyiex pa ang pex sax tawng khankix,<sup>14</sup> maix tak chawkcheng, sawg ti yaox mai mhaing ti tawng grawng an kriemkre, phan rug mawh mai phan krax pa seeing brai an hoik yuh ka daux sinax pex,<sup>15</sup> pex tak pah ka pui pa ot ka daux veng an khankix ka lawm vaid mai pah ceu pa koe ka daux veng khawmuik pa mawh tobrie cie kix lauxlak pakleeing ka lawm vaid pex.<sup>16</sup> Pex tak khrawm ti deuh kraung khrai pa tudrhim pex khankix ka daux sigreung krax mai gleeing khawm veng mai khawm kraung khrai pa tudrhim pex khankix tau ka ngu khawmuik sivoe Simiang Siyiex maix. Veng an tak mawh pum nyhee leeingju, tak ang lai baox deeh sum ka veng an.<sup>17</sup> Mawh kheu nan, canceu pa hoik jhaxlawg khankix, tak mawh pa ang lai deuh ka daux taix pex tix ceu kawx, sonsang deeh veeh Simiang Siyiex ti khaing pa kied songrhawm Nawh Cao mai sonsang jhi Nawh Cao krax cauxrhawm Tix ka maix mai sonsang koe rhawm Nawh Cao ka maix mai Nawh Cao tak deeh kieh maix baox nie pre haohhun, awm pa hoik tiextu Nawh Cao ka keeing maix khankix,<sup>18</sup> phan pex nghiet ka gumlox Simiang Siyiex mai priex ti hawt lox tawm pingnyap Nawh, pa hoik tawm aux ka pex daux in singaix mai yuh pa khawcaw ka plak sivoe ngai Simiang Siyiex pex heue.”

**14** *Rien Rhawm Ka Pa Ang Khawcaw*  
 “Pex mawh kawn praix Simiang Siyiex pex, pex tak ang pon ti pat nex tokaux tix mai ang pon khlaow ka hauk dieb dong tix pak son pui yum.<sup>2</sup> Grawh grawng nawh, pex mawh ceu pui pa singax singeh son Simiang Siyiex pex. Simiang Siyiex hoik laug pex mawh ceu pui Nawh Cao khaing ceu pui pa ot piang haktiex khawmuik.

*Tobrie Pa Singax Mai Pa Ang Singax*

(Krub 11:1-47)

<sup>3</sup> Pex tak ang pon ti ih ceu pa seeing brai tix ceu kawx.<sup>4</sup> Inkix mawh tobrie pa pon pex ti ih, pa mawh mawie, yung, pex,<sup>5</sup> cak, poh, kiah, pex rang, mawie praix, cak kaww rung, mai yung tiag khankix,<sup>6</sup> pex tak pon ti ih tobrie kuceu pa koe gip, pa goih ti koe ra plak mai tobrie pa deeh sai roing tix khankix.<sup>7</sup> Viang

mawh nan, khaing daux sinax tobrie pa deeh sai roing tix mai pa koe gip ra mu, pex tak ang pon ti ih kala-uk, pietla mai ghot. Grawh grawng nawh, viang ceu ankix, mawh tobrie pa deeh sai roing tix kawx, kheu jao angkix koe gip ra mu, ceu an khankix mawh pa ang singax son pex. <sup>8</sup>Lig mawh pa ang singax son pex, viang koe gip ra mu kawx, kheu ang mawh tobrie pa deeh sai roing tix, pex tak ang pon ti ih nex kix mai pex ang pon ti hu krox hu teeh ka to yum ankix. <sup>9</sup>Inkix mawh pa pon pex ti ih pa koe daux rawm khankix, pex tak pon ti ih canceu pa koe prui mai sibiak khankix. <sup>10</sup>Canceu pa ang koe prui mai sibiak khankix, pex tak ang pon ti ih, an mawh pa ang singax son pex. <sup>11</sup>Pex tak pon ti ih sim pa singax khawmuik, <sup>12</sup>viang mawh nan, pex tak ang pon ti ih, klang lung, klang preng, klang ting, <sup>13</sup>klang raoh, klang ce mai pa mawh ceu klang khankix, <sup>14</sup>lak kuceu mai ceu lak khankix <sup>15</sup>mai sim kala-uk, klang sawm, sivik rawm mai ceu klang khankix, <sup>16</sup>plang plawh, klang pet, klang lai, sim ploh ble, <sup>17</sup>lak tiag, sim tareei, <sup>18</sup>klang lang gaoh, sim saoh, gawx cux, blak mai ceu pa awm an khankix. <sup>19</sup>Canceu pa chix mu kuceu pa koe prui, mawh pa ang singax son pex. An khankix mawh pa ang pon ti ih. <sup>20</sup>Pex tak pon ti ih sim pa singax khawmuik. <sup>21</sup>Pex tak ang pon ti ih to pa tang yum tix ceu kawx, pex tak tawx nyosinie pa ot daux veng pex khankix ih, phan ang mawh nan, pex tak coh ka pui tang meung, grawh grawng nawh pex mawh ceu pui pa singax ka Simiang Siyiex pex heue. Pex tak ang pon ti ngai kawn pex iak ka daux rawm teeh miex nawh.

### ***Grawng Tan Kao Son Tix Son***

<sup>22</sup>Pex tak goih ti deuh kao son tix son mhawm mhawm khaing daux plix nghox plix koi pa pon pex, pa lih khaing daux kaung pex khankix tix num hoik tix num. <sup>23</sup>Pex tak ih can kao son tix son khaing daux plix nghox plix koi pex, rawm plix siet khraox pex, rawm bee pex mai khaing pa liang pex tix pon phaoka khaing cubyung, cub mawie mai **14:21** Lih 23:19, 34:26. **14:22-29** Krub 27:30-33, Si 18:21.

cub pex ka plak sivoe Simiang Siyiex ka dahdee pa laug Nawh Cao ti deuh ceukaux Tix ot kah, phan yuh nan mawh sonsang gau pex tix koe krax lhatgraung ka Simiang Siyiex jheengjheeng. <sup>24</sup>Viang mawh nan, phan krax hu pex mawh pa kied singai ka son pex mai phan pex ang pon viex krax tan kao son tix son an khankix angh mai phan dahdee laug Simiang Siyiex ti deuh ceukaux Tix mawh pa kied singai khaing dee ot pex, khaix hoik nawb Simiang Siyiex buanson piang pex, <sup>25</sup>pex tak deeh coh ceu an khankix teei ti viex mau an mai hu ka dahdee pa hoik laug Simiang Siyiex pex. <sup>26</sup>Pex tak cai mau an son ceu pa sang simie pex ti yuh ka daux rhawm pex, liag mawie angh, yung angh, rawm plix siet angh mai rawm plai khankix mai son canceu pa sang mie pex ti yuh ka daux rhawm pex, pex tak ih ka plak sivoe Simiang Siyiex pex tan, maix mai kawn nyiexma maix tak koe krax gauxrhawm. <sup>27</sup>Pex tak ang pon ti prah ceucad Lewix khankix, pa ot ka daux veng pex. Grawh grawng nawh, kix mawh ceu pui pa ang koe nyum mai pa ang pon sinngao tau mai pex. <sup>28</sup>Yam hoik naog loe num ku num, pex tak viex kao son tix son khaing daux plix nghox plix koi pa pon pex daux num an mai khrawm ti deuh ka daux veng ot pex. <sup>29</sup>Pui Lewix khankix kheu ang kix koe nyum mai ang kix pon sinngao tau mai pex, khawm nyosinie mai miexmai kawn doe pa ot daux veng pex khankix tak hoek mai ih tom sak, phan pex yuh nan Simiang Siyiex tak nawb buan piang pex ma ka kaing jhaw pa yuh pexheue.”

### ***15 Pa Pluatploi Ceuk***

<sup>1</sup>Yam hoik naog aliah num ku num, maix tak pluatploi ka ceuk rom. <sup>2</sup>In mawh grawng pa pluatploi, cao tawx ceuk rom kukaux, pa hoik tawx ceuk rom tix ceuceu ka paox plawg tix khankix, tak pluatploi ceuk rom an, Nawh tak ang pon ti mhaing ceuk rom an ka paox plawg tix mai ka puxaik tix khankix. Grawh grawng nawh, an mawh pa kok mawh krax pluatploi Simiang Siyiex. <sup>3</sup>Maix tak pon ti mhaing ceuk rom khaing pui tang meung, viang mawh nan, ceuk rom ceu patix angh, maix tak pluatploi ka ceuk rom cie puxaik maix khankix, <sup>4</sup>phan maix priex rhawm tix

mai nghiet ka gumlox Simiang Siyiex maix, mai priex ti hawt lox pingnyap pa tawm Aux ka maix khankix daux in singaix,<sup>5</sup> pui hot pui sia tak ang lai koe ka daux pex, mawh kheu Simiang Siyiex tak nawb buan pa ting lhaong piang maix, ka daux haktiex pa sang tawx Simiang Siyiex mawh sinngao cie maix.<sup>6</sup> Simiang Siyiex maix tak nawb buan piang maix, awm hoik yuh Nawh sijax mukheu ka maix, maix tak tawx pui tom nie ceuk rom. Viang mawh nan maix tak ang pon ti ceuk ka pui, maix tak kuang ka ceu pui tomnie, viang mawh nan, kix ang pon ti kuang ka maix.

***Pa Koe Rhawm Ka Pui Hotsia***

<sup>7</sup> Phan puxaik maix pa hotsia koe ka sinax pex tix kaux ka daux veng tix veng veng, ka daux haktiex tawx Simiang Siyiex ka pex, paw gun rhawm tix mai paw bhok taix ti khaing puxaik pa hotsia maix khankix.<sup>8</sup> Maix tak yah taix tix viehva mai tawx nawh ceuk rom mai pa sibieh rhawm tix tawx tom kub mai baux canceu pa lo nawh khankix.<sup>9</sup> Yuhsatix maix, ang pon ti keud pa caoxcaig ka daux rhawm tix ah nin, num aliah, num pa pluatploi hoik dex sang hoek phao, maix tak koe krax bohrhawm piang puxaik hotsia maix mai phan maix ang rhawm tawx tix ceu kawx ka nawh mai nawh tak riagyo ka Simiang Siyiex, kheu jao in phimap tak hoek piang maix.<sup>10</sup> Maix tak caw ti tawx ka nawh tete, rhawm maix tak ang pon ti lhawx yam tawx maix ka nawh, mawh kheu in Simiang Siyiex tak nawb buan piang kaing jhaw pa yuh maix khawmuik heue.<sup>11</sup> Mawh kheu pui hotsia ang jud khaing haktiex dee ot maix, mawh kheu nan, aux tom tawm lox ka maix ah nin, maix tak yah taix tix viehva ka puxaik maix khankix mai ka pui hotsia khankix mai ka pui pa koe krax cu nghiet ka daux haktiex maix.

***Been Pa Yuh Son Siliex*** (*Lih 21:1-11*)

<sup>12</sup> Phan puxaik maix pui Hebrise simex, sibun tix kaux kaux angah, mawh pa coh tix ka maix mai phankix hoik yuh kaing jhaw maix liah num, khaix an yam hoek daux num aliah maix tak ploi kieh lih hu khaing **15:7-8** Krub 25:35. **15:11** Mat 26:11, Mak 14:7, Yo 12:8. **15:12-18** Krub 25:39-46. **15:19** Lih 13:12. **15:23** Yam 9:4, Krub 7:26-27, 17:10-14, 19:26, Pi 12:16, 23.

maix.<sup>13</sup> Yam ploi maix nawh hu lawdluan khaing tix, maix tak ang pon ti kieh nawh hu mai taixyi tix,<sup>14</sup> maix tak teem nawh tom kub, khaing daux cub yung maix khankix, khaing daux glah nghox maix mai khaing daux dee biiet maix rawm plix siiet khankix, awm pa hoik nawb Simiang Siyiex buanson piang maix, maix tak tawx ankix ka nawh.<sup>15</sup> Maix tak dohkeud ka hoik mawh maix siliex daux meung Ejiptux, mai ka hoik taoh Simiang Siyiex ka maix, mawh kheu nan, aux tawm lox ka maix daux in singaix.<sup>16</sup> Phan nawh ah nin ka maix, aux ang rhawm hu khaing maix, mawh kheu moh aux ka maix mai kawn nyiexma maix, aux gauxrhawm ti ot tau mai maix,<sup>17</sup> teei nyex lawm mai toh ka yhaok nawh, hawt diang siviex tan mai nawh tak mawh siliex maix leeingju, ka siliex bun maix kawx maix tak yuh awm an.<sup>18</sup> Yam ploi maix nawh hu lawdluan khaing tix maix tak ang kieh mawh pa nu son tix, mawh kheu nawh hoik yuh kaing maix liah num, lheu khaing ngawh kaing pui cang ra son, khaix an Simiang Siyiex tak nawb buan piang maix, ka canceu payuh maix khawmuik heue.

***Been Son Tobrie Pa Liang Ti Keh***

<sup>19</sup> Can tobrie maix pa liang ti keh pa mawh mhaing khawmuik khaing daux cub yung, cub mawie maix tak priex mawh pa singax singeh ka son Simiang Siyiex. Maix tak ang pon ti cau ka kawn mawie pa liang ti keh, khaing daux cub mawie maix khankix mai maix tak ang pon ti rhip hauk kawn yung pa liang ti keh khaing daux cub yung maix.<sup>20</sup> Maix mai kawn nyiexma maix tak pon ti ih kawn mawie, kawn yung pa liang ti keh inkix ka plak sivoe Simiang Siyiex ku num ka dahdee pa laug Simiang Siyiex ti deuh.<sup>21</sup> Viang mawh nan, phan dee mat dee ne koe mai phan mawh pa pot taix caong angah mai dug ngai angah mai phan mawh pa nie dee mat dee ne, maix tak ang pon ti tan ka Simiang Siyiex.<sup>22</sup> Maix tak pon ti ih ka daux veng ot maix, pui pa ang singax mai pui pa singax khankix, tak pon ti ih awm pa ox tix, awm pa ih kix ka nex kiah mai nex cak.<sup>23</sup> Maix tak ang pon ti ih ngie nham nawh, maix tak hieh ti tik piang tiex awm rawm heue.”

### **Grawng Pawie Pasakha**

(Lih 23:14-17, 34:18-24)

**16** “Rien rhawm maix daux khix Abibax mai priexrien pawie Pasakha son Simiang Siyiex, mawh kheu ka daux khix Abibax, Simiang Siyiex hoik viex maix lih khaing daux meung Ejiptux ka plak ponsawm. <sup>2</sup> Mawh kheu nan maix tak appong tobrie pawie Pasakha kason Simiang Siyiex khaing pa koe ka daux cub yung, cub mawie maix, ka dahdee pa hoik laug Simiang Siyiex ti deuh ceukaux Tix. <sup>3</sup> Maix tak ang pon ti ih blah pa sau susaix tau mai an aliah ngaix, maix tak ih blah pa ang sau susaix pa mawh blah krax kharhawm, grawh grawng nawh maix hoik lih sijaoux khaing meung Ejiptux. Maix tak dohkeud ka singaix lih maix khaing meung Ejiptux, glang singaix im ju maix. <sup>4</sup> Blah pa sau susaix tak ang pon ti yaoux ka sinax pex, ka daux haktiex pa kuang maix khankix aliah singaix. Nex pa appong maix plak bo, singaix liang, tak ang pon ti deuh tom hoek ka plak pongawb. <sup>5</sup> Maix tak ang pon ti appong tobrie pawie Pasakha ka daux veng ot maix tix dah kawx, ka pa tawx Simiang Siyiex ka maix. <sup>6</sup> Viang mawh nan maix tak appong tobrie pawie Pasakha plak ponbo, bawgyam hoik laig singaix, awm bawgyam lih hu maix khaing meung Ejiptux, ka dahdee pa hoik laug Simiang Siyiex ti deuh ceukaux Tix. <sup>7</sup> Maix tak tong ti ih ankix ka ngu, ka dahdee pa hoik laug Simiang Siyiex, yam hoek plak pongawb pex tak deeh ing ka nyiex gox tix. <sup>8</sup> Maix tak ih blah pa ang sau susaix daux liah ngaix, yam hoek ka daux singaix aliah, pex tak khrawm paoux tix daux pa singax singeh son Simiang Siyiex. Maix tak ang pon ti yuh kaing ka daux singaix an heue.

### **Grawng Pawie Aliah Vang Tuah**

<sup>9</sup> Maix tak simin ti yaoux aliah tuah son tokaux tix. Maix tak jah ti simin aliah tuah khaing bawgyam jah maix ti vawg nghox. <sup>10</sup> Khaix an, maix tak yuh pawie aliah vang tuah son Simiang Siyiex tau mai krax tan pa tang koe rhawm tix ka daux taix maix. Maix taktan ankix awm pa hoik nawb Simiang Siyiex

**16:1-8** Lih 12:1-20, Krub 23:5-8, Si 28:16-25. **16:9-12** Krub 23:15-21, Si 28:26-31.

buanson piang maix. <sup>11</sup> Maix tak koe krax gauxrhawm ka plak sivoie Simiang Siyiex, khawm kawm simex kawm sibun maix khankix mai kawncaw simex kawncaw sibun maix mai khawm ceucad Lewix khankix, pa ot ka daux veng ot maix mai khawm nyosinie mai khawm miexmai kawm doe pa ot daux sinax pex, ka dahdee pa hoik laug Simiang Siyiex ti deuh ceukaux Tix. <sup>12</sup> Maix tak dohkeud ka hoik mawh maix siliex ka daux meung Ejiptux mai maix tak priex ti hawt yuh awm lox pingnyap in khankix heue.

### **Grawng Pawie Nyiex Gox Bang**

<sup>13</sup> Maix tak yuh pawie nyiex gox bang aliah singaix, khaix hoik khrawm maix nghox khaing daux glah nghox mai khaing dahdee biiet maix rawm plix siiet khankix, <sup>14</sup> maix tak koe krax gauxrhawm ka daux pawie yuh tix, khawm kawm simex kawm sibun maix mai kawncaw simex kawncaw sibun maix khankix mai khawm ceucad Lewix khankix mai khawm nyosinie mai khawm miexmai kawm doe pa ot daux veng ot pex khankix. <sup>15</sup> Maix tak yuh pawie aliah ngaix son Simiang Siyiex, ka dahdee pa hoik laug Simiang Siyiex, grawh grawng nawh Simiang Siyiex hoik nawb buanson piang maix mai ka daux krax haokhuan kaing jhaw pa yuh maix ka taix tix khawmuik, maix tak koe krax gauxrhawm ka tete. <sup>16</sup> Tix num loe bawg kawm simex pex khawmuik tak hoek ti bleeh ka plak sivoie Simiang Siyiex, ka dahdee pa hoik laug Nawh Cao ka daux bawgyam pawie blah pa ang sau susaix mai ka daux bawgyam pawie aliah vang tuah mai ka daux bawgyam pawie nyiex gox bang khankix. Kix tak ang pon ti hoek bleeh ka plak sivoie Simiang Siyiex tau mai taix yi tix. <sup>17</sup> Pui kukaux tak tawx pa pon tawx nawh, awm pa pon nawh buanson khaing Simiang Siyiex heue.

### **Cao Prawngsee Pa Rahsee**

<sup>18</sup> Maix takyagot ti deuh cao prawngsee mai cao kaing khankix, awm koe doehru pex, daux veng pa hoik tawx Simiang Siyiex ka pex khawmuik. Kix tak prawngsee ka ceu pui ka daux pa rahsee. <sup>19</sup> Maix tak ang pon ti veeh

**16:13-15** Krub 23:33-36, 39-43; Si 29:12-38. **16:19** Lih 23:6-8, Krub 19:15.

khaing krax prawngsee pa rahsee. Maix tak ang pon jhak pakngai pui tix plak kawx mai maix tak ang pon ti teei kraung cun praok. Grawh grawng nawh kraung cun praok mawh pa kieh ngai pui pa koe pingnya cuyi dug mai kieh lox sikah pui pa rahsee klungkliien ti mawh pa suksag. <sup>20</sup> Maix tak hawt khaix pa rahsee, sonsang pon maix ti im ju mai teei ti cie sinngao haktiex pa tawx Simiang Siyiex ka maix. <sup>21</sup> Maix tak ang pon ti sum khaox rieanggrang tix ceu kawx son tokaux tix hawt dex khu dee tan pa hoik sum maix ka son Simiang Siyiex. <sup>22</sup> Maix tak ang pon ti jung rong simaox rieanggrang, in mawh pa koeng Simiang Siyiex kah heue.”

**17** “Maix tak ang pon ti appong mawie, yung, pa koe dee mat dee ne mai pa koe dee laux maung ka Simiang Siyiex, mawh kheu an mawh pa seeing brai Simiang Siyiex kah. <sup>2</sup> Ka daux sinax pex ka daux veng pa tawx Simiang Siyiex ka pex khankix mai phan sipub simex angah, sibun angah, pa yuh pa caoxcaig ka plak sivoe ngai Simiang Siyiex mai lud ka gumlox sijax mukheu Nawh Cao <sup>3</sup> mai nawh hoik lih hu yuh kaing jhaw mai krub siyiex tang kaux khankix, pa mawh singaix angah, khix angah mai ceu pa koe ka daux raoma tix ceuceu pa ang Aux sax tawm khankix <sup>4</sup> mai phan an mawh pa hoik krai ka maix mai phan maix mhong ka grawng an khankix, khaix an maix tak jawg ti chawk tom kriem, phan rug mawh tete, phan grawng pa seeing brai an hoik mawh pa yuh ka daux ceu pui Isarelaux khankix, <sup>5</sup> khaix an maix tak teei simex an mai sibun an pa hoik yuh ceu pa caoxcaig an, lih ka plak praix siviex veng mai tak dheem yum ka simaox. <sup>6</sup> Pui mawx pa keung ti yum tak kieh nawh yum awm koe pa kham mhairug son nawh ra kaux, loe kaux, viang mawh nan, phan pa kham mhairug koe tix kaux ngie tak ang pon ti kieh nawh yum. <sup>7</sup> Pui pa kham mhairug tak sau taix tix kah, khaix an pui hun tak sau taix ti kieh nawh yum. Mawh kheu nan maix tak teei ti tik pui caoxcaig khaing daux sinax

**16:21** Lih 34:13. **16:22** Krub 26:1. **17:3** Lih 22:20. **17:6** Si 35:30, Pi 19:15, Mat 18:16. **2Kaw** 13:1, 1Ti 5:19 He 10:28. **17:14** 1Sa 8:5.

pex. <sup>8</sup> Phan grawng see pa kied nu ti prawng koe ka son maix, daux sinax veng ot pex, pa mawh grawng see pa pah pui, grawng see pa simah mai grawng see pa taptoi paox tix khankix, khaix an maix tak yaog ti kaoh mai haok ka dahdee pa hoik laug Simiang Siyiex, <sup>9</sup> maix tak hoek ka cao giex kaing li ceucad Lewix khankix, pa mawh cao prawngsee khankix tan, ka daux baux bawgyam an mai chawk ti yaox ka grawng an. Kix tak krai grawng lox pa sang prawngca ka maix. <sup>10</sup> Grawng pa sang prawngca pa hoik krai kix ka maix ka dahdee pa hoik laug Simiang Siyiex tan, maix tak priex rhawm tix sonsang yuh maix awm gumlox pa tawm kix ka maix. <sup>11</sup> Awm grawng prawngca pa tat kix ka maix mai awm grawng lox prawngca pakrai kix ka maix khankix maix tak yuh awm an, maix tak ang pon veeh ti hu ka plak khawn goix khawn dawm khaing krax prawngca pa hoik tat kix ka maix. <sup>12</sup> Phan koe pui pa hawt ti yuh awm koe rhawm vao tix mai pa ang cu nghiet ka cao giex kaing li pa cung ti yuh kaing jhaw Siyiex tan, ka plak sivoe Simiang Siyiex angah, ka plak sivoe cao prawngsee angah, tak kieh pui an yum, mawh kheu nan maix tak teei ti tik pui caoxcaig khaing daux sinax ceu pui Isarelaux khankix. <sup>13</sup> Pui khawmuik tak mhong mai tak koe krax lhatgraung mai kix tak ang lai baoux yuh ceu an khankix, ka daux pa koe rhawm vao tix khaix in sax heue.

#### *Laug Simiang Kuang Haktiex*

<sup>14</sup> Yam hoek maix ka haktiex pa tawx Simiang Siyiex ka maix mai yam hoik pon ot pex ka daux an, phan maix ah nin, Aux tak yaog ti deuh simiang tix kaux piang tix awm ceu pui pa ot hawt vungviang aux khankix. <sup>15</sup> Maix tak yaog ti deuh simiang tix kaux ka daux puxaik maix khankix ka pui pa laug Simiang Siyiex. Maix tak ang pon yaog ti deuh pui tang meung pa ang mawh puxaik maix mawh simiang. <sup>16</sup> Viang mawh nan, simiang an tak ang pon ti eei brung tomnie mai sonsang baoux nie brung pa eei nawh ang chix kieh pui haktiex deeh ing ka meung Ejiptux, grawh grawng nawh,

**17:16** 1Sim 10:28, 2Bee 1:16, 9:28.

Simiang Siyiex hoik ah nin ka pex, pex tak ang pon ti deeh ing ka krax an. <sup>17</sup>Nawh tak ang pon ti koe moeng tom nie, ha rhawm nawh veeh ti hu plak pa caox mai ang pon ti sawg mau khri tomnie son tokaux tix. <sup>18</sup>Yam ngawm nawh piang dangneung meung haktiex, nawh tak tiem thawk ti deuh gumlox been inkix ka dauh phuk lai tix phuk son tokaux tix, khaing dauh phuk lai pa koe ka plak sivoie cao giex kaing li, ceucad Lewix khankix. <sup>19</sup>Nawh tak deuh lai an mai tix, nawh tak phat an glang singaix im ju nawh khawmuik sonsang pon gau nawh ti lhatgraung ka Simiang Siyiex mai sonsang priexrien nawh ti hawt yuh awm lox pingnyap inkix mai lox been prawngsee khawmuik, <sup>20</sup>son ang nawh lhaong rhawm ka piang puxaik puxo tix khankix mai son ang nawh veeh ti hu ka plak goix plak dawm khaing gumlox pingnyap in, phan yuh nan, nawh khawm kawn praix nawh tak langju dauh meung haktiex cao nawh mai ka dauh sinax ceu pui Isarelaux khankix heue.”

**18** *Nyum Cie Cao Giex Kaing Li*  
 “Cao giex kaing li ceucad Lewix khankix, pa mawh doehru pui Lewix khawmuik, tak ang pon ti koe nyum mai kix tak ang pon ti koe sinngao tau mai ceu pui Isarelaux khankix, kix tak ih krax tan ka Simiang Siyiex pa hoik yuh ka ngu mai sinngao Nawh Cao. <sup>2</sup>Mawh kheu nan, kix tak ang pon ti koe sinngao ka dauh sinax puxaik puxo nawh khankix. Simiang Siyiex mawh sinngao kix, awm pa hoik koe gumlox Nawh Cao ka kix, <sup>3</sup>in tak mawh pa sang caw cao giex kaing li ti pon khaing can pui pa tan krax tan pa appong, viang ankix mawh mawie angah, yung angah, kix tak tawx klip tix khawn mai kap ra plak mai kraung vaig kraung tu ka cao giex kaing li. <sup>4</sup>Plix khaox plix ox pa liang ti pon, nghox, rawm plix siiet khraox, rawm bee mai hauk yung pa pon maix phaoka, maix tak tawx ka nawh. <sup>5</sup>Grawh grawng nawh, Simiang Siyiex hoik laug ti teei nawh khaing doehru pex khawmuik sonsang cung nawh ti yuh kaing

**17:17** 1Sim 11:1-8, 1Sim 10:27, 2Been 1:17, 9:27.

**18:10** Krub 19:26, Lih 22:18, **18:13** Krub 19:31, Mat 5:48. **18:15** Kawn 3:22, 7:37.

jhaw Siyiex ka dauh ceukaux Simiang Siyiex, nawh mai kawn simex nawh khankix leeingju. <sup>6</sup>Phan ceucad Lewix lih ti hoek khaing dauh veng dee peung nawh tix veng veng, ka dauh sinax ceu pui Isarelaux khankix mai koe rhawm ka dee pa laug Simiang Siyiex, <sup>7</sup>nawh tak pon ti yuh kaing jhaw dauh ceukaux Simiang Siyiex awm pa yuh puxaik nawh ceucad Lewix khankix, pa cung ka plak sivoie Simiang Siyiex tan. <sup>8</sup>Lheu khaing ceu pa pon coh nawh sinngao tix, nawh tak koe krax pa sidu pon tau mai ceucad Lewix sonsang ih tau mai kix.

### *Via Khaing Been Pa Caox*

<sup>9</sup>Yam hoek maix ka dauh haktiex pa tawx Simiang Siyiex ka maix, maix tak ang pon gau ti hawt khaix pa seeing brai pui ceu an khankix. <sup>10</sup>Ka dauh sinax pex tak ang pon ti koe pui pa kieh kawn simex kawn sibun tix khankix laig ka dauh ngu mai ang pon koe pui pa yuh sibawx, pui pa chix jhak mhai lai taix mai pa yuh simeed yuh sat mai pa yuh phi khankix, <sup>11</sup>pui pa chix yuh sidah moh, pui pa yuh paoxpie mai singie, pui pa chix pih miang mai pui pa chix kok ka khuan pa yum khankix. <sup>12</sup>Can pui pa yuh ceu inkix khawmuik mawh pa seeing brai Simiang Siyiex kah, mawh kheu pa seeing brai pa yuh kix, Simiang Siyiex tom grheu kix lih khaing ka plak sivoie maix. <sup>13</sup>Maix tak mawh pui pa grum mhawm ka plak sivoie Simiang Siyiex. <sup>14</sup>Pui pa tak sang grheu maix ti tik khankix, kix hoik nghiet ka lox cao sibawx mai cao pa jhak mhai lai taix, phan mawh maix, Simiang Siyiex ang cu maix yuh ceu an khankix.

### *Cao Jhai Khraox*

<sup>15</sup>Simiang Siyiex maix tak sang kieh cao jhai lih tix kaux khaing dauh puxaik pex pa awm aux, pex tak nghiet ka lox nawh. <sup>16</sup>Awm krax pa khioxkhaw pex ka Simiang Siyiex tix hawt baoh Hawrax ka dauh singaix khrawm pex paox tix mai pex hoik ah nin, paw lai baox kieh aux chix mhong ka gumlox Simiang Siyiex aux. Paw lai kieh aux yaox ka ngu pa ting in tix bawg kawx liak, phan ang mawh nan aux tak yum kah. <sup>17</sup>Simiang Siyiex ah nin ka aux, canceu pa hoik krai kix mawh pa

mhawm. <sup>18</sup> Aux tak kieh cao jhai pa awm maix lih daux sinax puxaik pex khankix mai Aux tak sau gumlox Tix ka daux jheeh nawh mai nawh tak krai gumlox pa tawm Aux ka kix khawmuik. <sup>19</sup> Can pui pa ang nghiêt ka lox krai nawh ka daux ceukaux Aux, Aux tak ciyang ka pui an. <sup>20</sup> Phan koe cao jhai pa teei min tix krai lox ka daux ceukaux Aux, pa ang Aux tawm nawh krai khankix mai pa krai ka daux ceukaux siyiex tang kaux khankix, tak pah cao jhai an yum. <sup>21</sup> Phan maix keud ah nin ka daux rhawm tix, ex tak sang tawng gumlox pa ang Simiang Siyiex nyang bax krai yuh ka mawx lie? <sup>22</sup> Yam krai cao jhai lox ka daux ceukaux Simiang Siyiex, phan ang mawh tete awm pa hoik krai nawh mai ang mawh lox pa krai khaing Simiang Siyiex mai phan mawh pa tang krai cao jhai ka rhawm kua tix, pex ang pon ti hat ka nawh heue."

### **19** *Veng To Pui Ti Klawd* (Si 35:9-28)

"Yam teei Simiang Siyiex ti tik ceu pui khankix khaing pa mawh haktiex pa tawx Simiang Siyiex ka pex mai pex grheu kix lih mai ot ka daux veng daux nyiex kix, <sup>2</sup> pex tak tang goih veng loe veng son tix ka daux haktiex tawx Simiang Siyiex pex cie. <sup>3</sup> Pex tak cox khre krax mai goih haktiex pa tawx Simiang Siyiex pex cie loe son, sonsang to pui pa ludloe ti pah pui peung tan. <sup>4</sup> Pui pa ludloe ti pah pui yum sonsang pon ti klawd ju mai grawng see pa caw nawh ti to laig daux veng an mawh nin, <sup>5</sup> pa mawh pui tix kaux hu kid khix daux tiag tau mai paox plawg tix mai yam kid nawh khaox ka moe, moe an goh khaing krong tix mai loe ti krox ka paox plawg nawh yum, pui antak caw ti to ka veng an tix veng veng son pon tix im ju heue. <sup>6</sup> Phan pui pa pawk bix hawt pheet ti krup ka pui pa pah pui an yam haxrhawm tix, kheu kied singai krax mai keud ti sang pah ka nawh, viang mawh nan, ang khaw ti pah, mawh kheu ang nawh koe krax cangkhoi ka pui yum an daux bawgyam pa luan. <sup>7</sup> Mawh kheu nan, aux tawm lox ka pex, pex tak tang goih veng loe veng. <sup>8</sup> Phan

**18:19** Kawn 3:23. **19:1-13** Yaw 20:1-9. **19:14** Pi 27:17. **19:15** Si 35:30, Pi 17:6, Mat 18:16, 2Kaw 13:1,

Simiang Siyiex greed mee haktiex pa hoik tiextu Nawh ka keeing pex khankix mai ap haktiex pa hoik yuh Nawh sijax mukheu sonsang tawx ka keeing pex khankix, <sup>9</sup> yuh satix pex mai hawt ka lox tawm pingnyap pa tawm aux ka pex daux in singaix, sonsang moh pex ka Simiang Siyiex tix mai hawt daux krax Nawh Cao jheengjheeng, khaix an pex tak baox veng loe veng piang veng in loe veng, <sup>10</sup> mawh kheu lhat pui pa ang koe phimap jauh nham ka daux haktiex pex pa mawh haktiex pa tawx Simiang Siyiex pex cie, mawh kheu nan, phimap nham tak hoek piang maix. <sup>11</sup> Phan pui tix kaux kaux koeng ka paox plawg tix, jawm ti pau mai taptoi nawh, phan nawh hoik yum mai pui an tak to ka veng an tix veng veng <sup>12</sup> mai kuad song ka daux veng ot pui an tak ploï pui hu teei pui an ing khaing tan mai ap pui an ka daux tawm taix pui pa pawk bix, sonsang teei nawh yum. <sup>13</sup> Pex tak ang pon ti koe krax pa cauxrhawm ka nawh mai pex tak teei ti tik krax lud pa ang koe phimap khaing pui Isarela relax sonsang hu mhawm ing mhawm pex khawmuik.

### *Mee Haktiex Sinngao Cie Isarela relax*

<sup>14</sup> Pex ang pon ti gah ka lhak simaox mee haktiex paox plawg tix, pa hoik sum pui ju dix, ka daux sinngao haktiex pa tawx Simiang Siyiex ka pex.

### *Been Pa Kham Mhairug*

<sup>15</sup> Phan ciied cheu ka pui tix kaux kaux pa yuh krax caox tix ceuceu mai pa yuh phimap tix ceuceu angah, mhairug pa kham pui tix kaux khaing ang chix grumnaog, phan pui kham mhairug koe ra loe kaux tom chix grumnaog. <sup>16</sup> Phan koe pui tix kaux kaux pa kham mhairug pa ang mawh meh plak pui tang kaux <sup>17</sup> mai kieh pui koe see khawm ra kaux hoek sivoë Simiang Siyiex, sivoë cao giex kaing li mai sivoë cao prawngsee, pa yuh kaing jhaw ka daux singaix an, <sup>18</sup> cao prawngsee tak jawg ti chaw kcheng grawng an, phan mhairug an mawh mhairug pa lud mai yuh see ka puxaik nawh awm krax lud nawh, <sup>19</sup> pex tak yuh ka nawh awm krax keud nawh ti yuh ka puxaik tix, mawh kheu nan, pex tak

**1Ti 5:19**, He 10:28. **19:21** Lih 21:23-25, Krub 24:19-20, Mat 5:38.



teei tikpa caoxcaigkhaing dauksinaxtix.  
<sup>20</sup> Pui pa deuk khankix tak mhong grawng an mai lhatgraung ang lai baox yuh pa caoxcaigdauksinaxpex.  
<sup>21</sup> Pex paw koe krax cauxrhawm kah, ju tak mawh son ju, ngai son ngai, rhang son rhang, taix son taix mai caongson caongheue.”

### **20** *Been Kuang Krax Ot Krax Koe*

“Yam lih hu puing pex naing ka pui koeng pex khankix, yam yaox pex kabrung, ka ling lawx brung mai ka pui hun khaing pex, paw lhatgraung ka kix, mawh kheu Simiang Siyiex Siyiex pex pa hoik viex pex lih khaing Ejiptux ot tau mai pex.  
<sup>2</sup> Yam dex bawgyam sang puing naing, cao giex kaing li tak hoek sivoie mai kraix lox ka pui hun  
<sup>3</sup> ah nin ka kix, “Isarelix khankix nghiet heue, dauksin singaix pex tak hu dauksin naing mai puing ka pui koeng pex khankix, pex paw khirhawm, paw lhatgraung, paw siyaung mai paw yaohyee kheu kix,  
<sup>4</sup> mawh kheu Simiang Siyiex, pa mawh Siyiex pex hu tau mai pex, sonsang puing pui koeng ka son pex mai tawx pex pex kah.”  
<sup>5</sup> Cao kaing naing tak ah nin ka pui hun, “Mawh pui mawx pa sum nyiex khraox mai ang nyang appong lie? Kieh nawh deeh ing ka nyiex tix, lhat nawh yum ka dauksin naing mai pui tang kaux tak appong ka nyiex an.  
<sup>6</sup> Mawh pui mawx pa hoik sum sipeem plix siiet mai ang nyang yaox ti ih plix lie? Kieh nawh deeh ing ka nyiex tix, lhat nawh yum ka dauksin bang naing mai pui tang kaux tak ih ka plix an.  
<sup>7</sup> Mawh pui mawx pa chawx ka sibun sonsang teei ti moeng mai ang nyang yuh kapaox tix lie? Kieh nawh deeh ing ka nyiex tix, lhat nawh yum ka dauksin bang naing mai pui tang kaux tak moeng ka sibun an.”  
<sup>8</sup> Cao kaing naing tak baokraix ka pui hun ahnin, “Mawh koe pui ot tin pa koe rhawm lhat mai pa khirhawm lie? Kieh nawh deeh ing ka nyiex tix, lhat puxaik nawh iak rhawm awm iak rhawm nawh,  
<sup>9</sup> yam hoik kraix cao kaing naing lox ka pui hun mai kieh kix laug cao kaing krunaing sonsang mawh cao kaing piang pui hun.  
<sup>10</sup> Yam laig pex dex veng sonsang puing kah, pex tak kraix pao sonsang yuh pa nhim tau mai pui veng an.  
<sup>11</sup> Phankix deeh pawklox

pex dauksin pa nhim mai paoh siviex veng ka pex, pui hun pa ot ka dauksin veng an tak tawx keen ka pex mai yuh kaing jhaw son pex.  
<sup>12</sup> Phan veng an ang yuh pa nhim mai pex mai phankix sang yuh naing ka pex pex tak lailawm ka veng an,  
<sup>13</sup> yam ap Simiang Siyiex pex ka kix dauksin tawm taix pex, pex tak pah simex kukaux ka lawm vaid,  
<sup>14</sup> viang mawh nan sibun, kawm nyawm, tobrie mai can pa koe dauksin veng khankix mai kraung khrai pa rhim an khawmuik, pex tak teei ti cie mai pex tak gauxrhawm ka kraung pa rhim tix khaing pui koeng khankix pa tawx Simiang Siyiex Siyiex pex ka pex.  
<sup>15</sup> Pex tak yuh awm in ka veng khankix pa ot singai khaing pex, pa ang mawh veng ceu pui in khankix.  
<sup>16</sup> Viang mawh nan, veng ceu pui in khankix, pa ap Simiang Siyiex Siyiex pex pex cie, pex tak ang pon kieh ceu pa toek bhawm khankix im ju tix ceu kawx,  
<sup>17</sup> pex tak yuh pui Hetax, pui Amawrix, pui Khananix, pui Pherazix, pui Hiwix mai pui Yebusix khankix lauxlak pakleeing awm lox tawm Simiang Siyiex Siyiex pex ka pex,  
<sup>18</sup> son ang kix gau pex yuh pa seeing brai, awm pa yuh kix kaing jhaw son siyiex kix, mawh kheu pa yuh ka ceu an mawh pa lud ka Simiang Siyiex pex.  
<sup>19</sup> Yam lailawm pex ka veng tix veng tom rheeng, yam puing pex ka veng an, pex paw kid khaox lauxleeing ka moe, mawh kheu pex tak ih plix khaing khaox an, pex paw kid goh. Khaox pa koe dauksin kaung khankix mawh pa koe buanson son pui, mawh kheu nan, lailawm mai priex kah.  
<sup>20</sup> Mawh ngie khaox paang pex chix ti ih plix, chix ti kid goh sonsang shiao ka dauksin kaing jhaw puing naing tom sidah pex pex ka veng an heue.

### *Been Pa Dex Mai Grawng Pa Ang Sidawng*

**21** “Phan pui tix kaux kaux yaox ka tokaux yum pah pui, pa ang tawng ka cao pah ka dauksin bingpak, haktiex pa tawx Simiang Siyiex, Siyiex pex cie,  
<sup>2</sup> kieh kuad song maicao prawngsee tiag ti yaox ka veng pa koe rawbrim pui yum an,  
<sup>3</sup> kuad song pa ot dex veng deekoe tokaux yum an tak viex mawie shiang tix mu pa ang sax cau mai pa ang nyang sax sau iak ka piang.  
<sup>4</sup> Kuad song veng an khankix, tak viex mawie shiang an hu

ka dauw ngawd dee lih rawm, dee ang sax thai mai dee ang sax rhuat simie mai kieh raig ngawg mawie shiang ka dauw ngawd. <sup>5</sup> Cao giex kaing li kawn simex Lewix khankix tak hoek dex, mawh kheu Simiang Siyiex Siyiex pex hoik laug kix sonsang yuh kix kaing jhaw Nawh mai kieh nawb buan dauw ceukaux Simiang Siyiex, krax simah mai krax taptoi tak yawg kheu cao giex kaing li. <sup>6</sup> Kuad song veng an pa ot dex tokaux yum khankix, tak khoeek taix tix, piang mawie shiang pa hoik raig ngawg ka dauw ngawd <sup>7</sup> mai kix kham mhairug ah nin, taix yix ang kieh nham pui in lih mai ngai yix ang yaox kalih nham pui in. <sup>8</sup> Simiang Siyiex eue, pluatploi ka phimap pui Isarelaux pa hoik taoh Maix Cao mai paw deuh nham pa ang koe krax lud in ka sinax pui Isarelaux, kix tak lawduan khaing pa pah ju pui yum. <sup>9</sup> Mawh kheu nan, pex tak teei ti tik phimap nham pa ang koe krax lud khaing dauw sinax tix yam yuh pex pa khawcaw ka plak sivoe ngai Simiang Siyiex.

### ***Sibun Pa Pon Giex Dauw Naing***

<sup>10</sup> Yam lih hu pex dauw naing mai puing pui koeng khankix mai Simiang Siyiex ap kix ka dauw taix pex mai giex kix mawh pui giexlaung <sup>11</sup> mai maix yaox pa mhawm grang ka sinax pui pa giexlaung khankix, maix koe rhawm ti teei nawh mawh moeng tix, <sup>12</sup> maix tak viex nawh hoek ka nyiex tix mai nawh tak khlaou hauk kaing tix mai rhip nghim tix. <sup>13</sup> Sibun an tak peeik kraung ceep pa giexlaung tix mai prah nawh ot ka dauw nyiex maix mai kieh nawh yuh krax doe ka miex keeing tix naog tix khix, khaix an maix tak pon hu laig ka nawh mai mawh mex nawh mai nawh tak mawh moeng maix. <sup>14</sup> Khaix an phan maix ang khawrhawm ka nawh, maix tak ploi nawh hu ka dee sang hu nawh, maix tak ang pon coh ka nawh mai paw kieh nawh mawh siliex, kheu hoik kieh maix nawh kaig.

### ***Kawn Ai Mai Sinngao***

<sup>15</sup> Phan pui tix kaux koe moeng ra kaux, nawh moh ka tix kaux mai ang moh ka tix kaux, moeng pa moh nawh mai pa ang nawh moh khankiex keh kawn simex, phan kawn Ai keh khaing moeng pa ang nawh moh, <sup>16</sup> yam

21:23 Ka 3:13. 22:1-4 Lih 23:4-5.

hoek singaix goih nawh sinngao ka kawn simex tix, nawh tak ang pon tawx sinngao kawn Ai, ka kawn simex khaing moeng pa moh nawh, tang kawn simex khaing moeng pa ang nawh moh pa mawh kawn Ai <sup>17</sup> mai nawh tak rieb kawn simex khaing moeng pa ang tix moh mawh kawn Ai mai tawx sinngao ka nawh ra son, khaing pa koe nawh khawmuik, mawh kheu kawn Ai an mawh riangrao pa jah son keeing mai ara kawn Ai mawh cie nawh.

### ***Kawn Simex Pa Tiehfeen***

<sup>18</sup> Phan pui tix kaux koe kawn simex pa ang lih grawng mai pa tiehfeen pa ang nghiet lox miex keeing tix, viang miex keeing sidix ka nawh kawx, nawh ang nghiet, <sup>19</sup> miex keeing nawh tak giex ti viex nawh hu ka kuad song pa ot ka veng an ka diang siviex veng <sup>20</sup> mai kix tak ah nin ka kuad song pa ot ka veng an, kawn simex yix ang lih grawng mai tiehfeen ang nghiet ka lox yix, nawh mawh pui pa nie luan ih luan nyaux. <sup>21</sup> Pui pa ot ka dauw veng khankix tak dheem nawh yum ka simaox, pex tak teei ti tik pa caoxcaig khaing dauw sinax tix mai pui Isarelaux lhatgraung ka mhong tix grawng an heue.

### ***Lox Been Son Kuceu***

<sup>22</sup> Phan pui tix kaux hoik lud ka grawng ceu pa keung ti yum, nawh tak caw ti yum mai preue nawh piang khaox, <sup>23</sup> ang pon ti grham tokaux yum nawh piang khaox leeingsawm, pex tak sipaung nawh ka dauw singaix an, son ang pex sang kieh haktiex pa tawx Simiang Siyiex, Siyiex pex cie seeing brai, mawh kheu kaw pa preue piang khaox an ot greem pa jhaxlawg Siyiex heue."

**22** "Phan pex yaox ka mawie mai yung puxaik tix lud krax, pex tak ang pon prah grham mai deeh viex hoek ka puxaik tix. <sup>2</sup> Phan puxaik pex ang ot dex pex mai phan pex ang tawng dee ot nawh, pex tak viex ing ka nyiex tix, tom sidah hoek sawg puxaik pex kah mai pex tak deeh tawx ka nawh. <sup>3</sup> Pex tak yuh awm an ka la nawh angah, kraung ceep nawh angah can pa grai cie puxaik pex tix ceuceu angah ka pa hoik grai nawh yuh, phan pex deeh yaox pex ang pon prah grham.

<sup>4</sup> Phan pex yaox ka la mai mawie puxaik tix goh hawt krax, pex ang pon ti prah grham kah mai deeh teem nawh yaog cung. <sup>5</sup> Sibun ang pon ti ceep kraung simex mai simex ang pon ti ceep kraung sibun mawh kheu pui pa yuh ceu an mawh pa seeing brai Simiang Siyiex, Siyiex pex kah. <sup>6</sup> Phan pex yaox ka mheem sim koe hawt krax piang khaox mai piang tiex tau mai kawn sim mai tom nawh khankix yam kawn num tom tix, pex paw vi teei khawm miex khawm kawn, <sup>7</sup> pex tak ploi miex nawh pu mai teei kawn nawh son tokaux tix, in mawh sonsang mhawm hu mhawm ing pex mai sonsang langju pex. <sup>8</sup> Yam sum pex nyiex khraox, pex tak yuh pa tiebtie hawt braux nyiex tix, phan pui tix kaux kaux kox cod khaing an, sonsang ang pex kieh phimap nham hoek piang nyiex tix. <sup>9</sup> Paw rhuat simie ra ceu ka daux sipeem plix siiet pex, phan yuh nan, simie plix mai plix plix siiet khawm ra tak lauxleeing kah. <sup>10</sup> Pex ang pon ti thai ka mawie mai la tau. <sup>11</sup> Paw ceep ka kraung pa taing ka tai mai hauk yung tau. <sup>12</sup> Pex tak yuh ciem tai khankix piang daog pon plak ka kraung ceep pa kheem pextokaux tix.

### ***Been Koe Mex Moeng***

<sup>13</sup> Phan pui tix kaux kaux koe moeng mai laig it tau mai nawh mai deeh koeng ka bun an <sup>14</sup> mai yaox bun an yuh ceu pa kaig tua mai min ceukaux nawh hoik laux ah nin, aux hoik rieb bun in mawh moeng tix, yam it aux mai nawh, aux hoik yaox ang nawh lai mawh bunkrih loig, <sup>15</sup> miex keeing bun an tak viex nawh sonsang jhi mhairug pa mawh nawh bunkrih loig ka kuad song veng an khankix hawt diang siviex veng <sup>16</sup> mai keeing sibun an, tak ah nin ka kuad song khankix, aux hoik tawx pui in moeng ka kawn sibun tix, viang mawh nan, nawh deeh tieh tix koeng ka nawh, <sup>17</sup> yam in nawh hoik deuh phimap mai yuh pa kaig tua ka nawh ah nin, aux hoik yaox kawn sibun maix ang lai mawh bunkrih loig. In khankix hoik mawh mhairug pa mawh kawn sibun aux bunkrih loig kix tak nih kraung ceep nawh ka plak sivoe kuad song khankix, <sup>18</sup> kuad song **22:9-11** Krub 19:19. **22:28-29** Lih 22:16-17. **22:30** Krub 18:8, 20:11, Pi27:20.

veng an khankix, giex ka pui an mai taptoi ka nawh, <sup>19</sup> kix kieh nawh se mau tixyieh shekhe mai ap mau an ka keeing sibun an, kheu jao hoik kieh nawh bunkrih pui Isarelaux laux ceukaux mai sibun an tak mawh moeng nawh, mai ang pon ti tik sibun an tom leeingju tix. <sup>20</sup> Viang mawh nan, phan ceu an mawh tete mai ang yaox mhairug grawng mawh sibun an bunkrih loig, <sup>21</sup> kix tak viex sibun an lih hoek ka diang siviex nyiex keeing nawh mai simex daux veng an khankix tak dheem nawh yum ka simaox kheu jao hoik yuh nawh ceu pa kaig tua ka daux pui Isarelaux khankix mai kheu jao yuh nawh krax ludvao ka daux nyiexma keeing nawh, pex tak teei ti tik pa caoxcaig khaing sinax pex. <sup>22</sup> Phan yaox simex tix kaux it tau mai sibun koe mex, kiex takyum khawm ra kaux mai pex tak teei ti tik pa caoxcaig an khaing pui Isarelaux. <sup>23</sup> Phan simex tix kaux sipub ka bunkrih loig pa hoik chawk ti deuh tix kaux ka daux veng mai it tau mai nawh, <sup>24</sup> pex tak viex kiex khawm ra kaux lih hoek daux diang siviex laig ka daux veng an mai pex tak dheem kiex yum ka simaox, kheu sibun an ang riagyo ka daux veng mai kheu simex an nunai ka moeng paox plawg tix, pex tak teei ti tik pa caoxcaig khaing sinax pex. <sup>25</sup> Phan simex tix kaux sipub ka bunkrih pa hoik chawk ti deuh ka daux tiag mai simex an khin ti it tau mai nawh, mawh ngie simex pa it tau mai nawh pa yum nongnong. <sup>26</sup> Paw yuh tittix ka sibun an, mawh kheu sibun an ang lud sonsang tawx phimap nawh tom yum nawh, mawh kheu see in awm pui tix kaux pa puing mai pah ka paox plawg tix. <sup>27</sup> Yam sipub nawh sibun an ka daux tiag mai sibun an riagyo, pui teem ka nawh ang koe tix kaux kawx, <sup>28</sup> phan simex tix kaux sipub ka bunkrih pa ang pui nyang bax chawk, phan nawh giex ti it tau mai nawh mai phan pui yaox kah, <sup>29</sup> simex pa hoik it tau mai sibun an tak tawx mau tixphuan shekhe ka keeing sibun an mai kieh sibun an mawh moeng tix, mawh kheu hoik nunai nawh ka sibun an, ang lai pon ti tik sibun an tom leeingju tix. <sup>30</sup> Paw kieh pui tix kaux kawx teei ka moeng keeing tix mai paw kieh nawh seeing yuh kraung it keeing tix heue.”

## 23 *Tang Tiah Tix Khaing Pui Hun*

"Pui pa ang grumaog kraung pakpeung simex, pa pat ti tik khankix, ang pon ti laig ka daux cub phung hun Simiang Siyiex. <sup>2</sup> Ang pon kieh kawn kawn cang laig ka daux cub phung hun Simiang Siyiex mai doehru nawh tom hoek kao ju kawx, ang pon ti laig ka daux cub phung hun Simiang Siyiex. <sup>3</sup> Pui Amon angah, pui Mawbax angah ang pon ti laig ka daux cub phung hun Simiang Siyiex mai doehru nawh tom hoek kao ju kawx, ang pon ti laig ka daux cub phung hun Simiang Siyiex leeingju, <sup>4</sup> kheu ang kix rieb pex ka blah mai rawm ka daux krax yam lih pex khaing meung Ejiptux mai kheu vai kix ka Balam kawn simex Bawrax veng Petaw, haktiex Mesopotemia sonsang jhaxlawg ka pex. <sup>5</sup> Kheu Simiang Siyiex pex ang nghiet ka lox Balam mai Simiang Siyiex pex deeh tieh krax jhaxlawg mawh krax pa nawb buan ka pex, mawh kheu moh Simiang Siyiex Siyiex pex ka pex. <sup>6</sup> Pex ang pon ti tawx pa nhim ka kix mai krax magmi ka kix baux singaix im ju pex leeingju. <sup>7</sup> Pex paw koeng ka pui Edom mawh kheu kix mawh puxaik pex mai pex paw koeng ka pui Ejiptux, mawh kheu hoik sax mawh pex siliex ka daux meung kix. <sup>8</sup> Tom sidah hoek kawn praix doehru kix loe ju, kix tak pon ti laig ka daux cub phung hun Simiang Siyiex.

### *Pa Kieh Dee Bang Singax*

<sup>9</sup> Yam hu puing pex naing ka pui koeng tix khankix mai yam kawn ot pex daux tab, yuh satix via pex khaing pa caoxcaig. <sup>10</sup> Phan pui tix kaux kaux ka daux sinax pex ang singax ka ceu pa lih ti mawh plak ponsawm, nawhyaoxtilih ot plak praix tab, ang pon ti ot daux tab, <sup>11</sup> yam hoek plakbo, nawh tak heem rawm, yam klip singaix, kieh nawh deeh laig ka daux tab. <sup>12</sup> Pex caw tix koe dahdee ka plak praix tab sonsang hu pex kah, <sup>13</sup> pex caw ti koe sipeed khaox tix mu, pa mawh kraung shiao pex yam hu tiag ka plak praix, pex tak kaong daux mai kheem ceu pa seeing pa lih khaing pex kah. <sup>14</sup> Mawh kheu 23:4 Si 22:1-6. 23:5 Si 23:7; 24:9. 23:3-5 Ne 13:1-2. 23:17 Krub 19:29. 23:19-20 Lih 22:25, Krub 25:36-37, Pi 15:7-11. 23:21 Si 30:1-16, Mat 5:33.

Simiang Siyiex pex tak lailing ka sinax tab pex sonsang taoh ka pex mai ap pui koeng pex khankix ka pex, mawh kheu nan, tab pex caw tix singax mai son ang Nawh Cao yaox pa ang singax ka daux sinax pex mai veeh Tix khaing pex.

### *Been Son Grawng Kuceu*

<sup>15</sup> Phan koe siliex pa to khaing cao nawh, hoek ot mai pex, paw giex ti deeh tawx ka cao nawh, <sup>16</sup> kieh nawh ot mai pex ka dahdee pa laug nawh, ka daux veng pa moh tix, paw yuh krax kha ka nawh. <sup>17</sup> Paw kieh bun coh kaux koe ka daux kawn sibun Isarelaix mai paw kieh simex coh kaux koe khaing daux kawn simex Isarelaix. <sup>18</sup> Pex ang pon viex mau coh kaux mai mau ngawh sox hoek ka nyiex Simiang Siyiex Siyiex pex, sonsang tiextu kah, mawh kheu in khawm ra mawh pa seeing brai ka Simiang Siyiex pex. <sup>19</sup> Pex ang pon teei rao mau ka puxaik tix, rao mau piang mau mai rao piang pa ih mai rao piang ceu pa tawx ceuk rom sonsang pon Tix rao. <sup>20</sup> Pex pon ti teei rao khaing pui tang ceu, viang mawh nan, pex ang pon ti teei rao khaing puxaik pex Isarelaix sonsang nawb Simiang Siyiex pex buan ka piang pex, ka daux pa yuh pex ka taix tix khawmuik, ka daux haktiex laig teei pex ti cie. <sup>21</sup> Yam yuh maix krax pa kham lox sijax ka Simiang Siyiex tix, pex ang pon deuh bawgyam tom rheeng sonsang yuh tix ka an, mawh kheu Simiang Siyiex pex tak mhaing an ka pex tete, phan pex ang tawx, tak sang mawh phimap ka pex. <sup>22</sup> Phan pex ang yuh krax pa kham lox sijax, an tak ang mawh phimap ka son pex. <sup>23</sup> Yuh satix, pex hawt ti yuh awm lox pa kaoh khaing jheeh tix, awm pa hoik tang koe rhawm pex ti tan ka Simiang Siyiex tix pa hoik tawx pex lox kham sijax ka jheeh tix. <sup>24</sup> Yam laig pex daux sipeem plix siiet paox plawg tix, pex pon ti ih plix siiet tom sak tix, awm pa koe rhawm pex ti ih, viang mawh nan, pex ang pon sau ti viex ka daux bau tix. <sup>25</sup> Yam laig pex daux kaung nghox ca pa kawn jung cie paox plawg tix, pex tak pon ti caik sigleem nghox ankix ka taix tix, viang mawh nan, pex ang pon ti shiao sivawg mai vawg sigleem nghox paox plawg tix khankix heue."

## 24 *Been Pa GoiH Paox Tix*

"Yam teei simex moeng tix, phan simex ang lai moh ka sibun an, kheu yaox simex an ceu pa deuh phimap ka nawh, nawh tak tiem lai goih paox tix mai ap an ka daux taix nawh mai tak ploi nawh ing ka nyiex tix. <sup>2</sup> Yam hoik lih sibun an khaing nyiex, nawh deeh pon ti moeng sibun tang kaux, <sup>3</sup> phan mex khaix nawh ang moh ka nawh, kieh nawh tiem lai goih paox tix mai ap ka daux taix sibun an mai ploi sibun an lih khaing nyiex tix, phan ang mawh nan, phan mex khaix nawh yum, <sup>4</sup> mex phaoka nawh, pa hoik goih paox tix, ang lai deeh pon rieb mawh moeng tix, kheu hoik seeing nawh, mawh kheu an mawh pa seeing brai ka plak sivoe Simiang Siyiex, pex ang pon ti viex phimap an hoek piang haktiex pa tawx Simiang Siyiex sinngao ka pex.

### *Been Son Kuceu*

<sup>5</sup> Yam teei pui tix kaux moeng khraox tix, nawh ang pon ti lih hu daux naing mai ang pon tawx beeh glawm ka nawh, nawh tak ot giex ka nyiex tix tix num, sonsang gauxrhawm nawh tau mai moeng tix. <sup>6</sup> Pui mawx angah, ang pon ti teei khlawp simaox mhaw plak greem mai khlawp simaox mhaw plak piang sonsang tang tix kah. Mawh kheu mhaw pa tang nawh an, awm pa hoik tang nawh ju tix kah. <sup>7</sup> Phan pui tix kaux yaox ka briex pui ka kawn praix ceu pui IsarelaX khaing daux puxaik nawh tix kaux kaux, phan deuh nawh mawh siliex angah mai coh ka nawh angah, khaix an tak caw ti pah pui briex an yum, pex tak teei ti tik pa caoxcaig an khaing daux sinax pex. <sup>8</sup> Yuh satix pex ka grawng jhawm saux sipawg, yuh satix mai yuh awm lox tawm cao giex kaing li pui Lewix, awm hoik tawm Aux ka kix, pex yuh satix yuh hawt awm an. <sup>9</sup> Dohkeud ka pa hoik yuh Simiang Siyiex, Siyiex pex ka Meriam daux krax yam lih pex khaing meung Ejixtux. <sup>10</sup> Yam tawx pex puxaik tix yaogyaing tix ceuceu, pex tak ang pon laig teei kraung pa tang ti deuh daux nyiex nawh. <sup>11</sup> Maix tak cung ka plak praix nyiex, pui pa yaogyaing an tak viex kraung pa tang ti deuh an hoek tawx ka

maix. <sup>12</sup> Phan nawh mawh pui hotsia, pex ang pon priex kraung tang an tiang sawm, <sup>13</sup> yam laig singaix, maix tak deeh tawx kraung pa tang nawh ti deuh, sonsang koe ceu pa lhop nawh ponsawm mai sonsang nawb nawh buan ka maix, ceu an tak mawh parahsee son maix ka plak sivoe Simiang Siyiex, Siyiex maix. <sup>14</sup> Pex paw yuh krax kharhawm ka siliex vai tix, pa mawh pui hotsia pa cudcha, pa mawh puxaik pex angah mai nyosinie angah, pa ot ka daux haktiex pex mai daux veng pex, <sup>15</sup> pex tak tawx ngawh riang kaing yuh nawh sivoe sang klip singaix, mawh kheu nawh mawh pui hotsia mai nawh een rhawm tix ka ngawh riang kaing yuh tix, lhat nawh riagyo mai deuh phimap ka pex sivoe Simiang Siyiex, Siyiex pex mai an lih ti mawh phimap ka pex. <sup>16</sup> Keeing khankix tak ang pon ti yum tang phimap kawn praix tix mai kawn praix nawh tak ang pon ti yum tang phimap keeing tix, pui kukaux tak yum tang phimap tokaux tix. <sup>17</sup> Pex ang pon tiehloh ka been pa rahsee, grawng nyosinie mai kawn doe khankix mai ang pon ti teei kraung ceep miexmai mawh kraung pa tang ti deuh, <sup>18</sup> kieh pex dohkeud ka mawh tix siliex ka meung Ejixtux mai Simiang Siyiex, Siyiex pex hoik taoh pex khaing tan, mawh kheu nan, Aux tom tawm lox sonsang yuh pex ceu in khankix. <sup>19</sup> Yam vawg pex nghox daux kaung tix phan piawm jhoi nghox tix jhoi daux kaung, pex ang pon ti deeh hu teei kah, kieh an mawh son nyosinie, son kawn doe mai son miexmai, sonsang nawb Simiang Siyiex, Siyiex pex buan ka pex mai kaing jhaw yuh pex ka taix tix. <sup>20</sup> Yam pieh pex plix Sanlun, paw lai baoh pieh pa deuk, kieh an mawh son nyosinie, son kawn doe mai son miexmai. <sup>21</sup> Yam khrawm pex plix siiet daux sipeem plix siiet, pex ang pon tix deeh sut plix an khaix khrawm tix, kieh an mawh son nyosinie, son kawn doe mai son miexmai. <sup>22</sup> Kieh pex dohkeud ka mawh tix siliex daux meung Ejixtux mawh kheu nan, Aux tom tawm lox sonsang yuh pex ceu in heue."

24:1 Mat 5:31, 19:7, Mak 10:4. 24:7 Lih 21:16. 24:8 Krub 13:1, 14:54. 24:9 Si 12:10. 24:10-13 Lih 22:26-27. 24:14-15 Krub 19:13.

24:16 2Sim 14:6, 2Been 25:4, Yez 18:20. 24:17-18 Lih 23:9, Krub 19:33-34, Pi 27:19. 24:19-21 Krub 19:9-10, 23:22.

**25** “Phan pui koe see ka paox tix mai hoek ka nyiex prawnngsee, yam tat cao prawnngsee ka see kiex, kieh kaw pa ang koe krax lud lawduan mai ciyang ka kaw pa lud.<sup>2</sup> Phan pui lud mawh pa khaw tix sivied kah, cao prawnngsee tak kieh nawh gup ti it mai sivied nawh ka plak sivoe pui, awm koe krax lud nawh, awm pa keung nawh ti pon krax pa sivied.<sup>3</sup> Kieh sivied ka nawh tixpon taix mai paw kieh lheu khaing an, phan sivied lheurkhaingan, puxaikpextaksalao pex sivoe ngai pex.<sup>4</sup> Maix tak ang pon ti jup jheeh mawie ka jup, yam dig ka nghox heue.

***Prawnngsee Ka Pa Ang Koe Kawn***

<sup>5</sup> Ka daux puxaik pa ot tau mai paox tix mai phan tix kaux kaux yum mai ang koe kawn simex, moeng kaw pa yum an tak ang pon mex ka pui plak praix paox nyiex tix mai kieh puxaik mex nawh laig ot mai nawh, teei mawh moeng tix mai yuh beeh glawm puxke tix ka sibun an.<sup>6</sup> Kawn simex pa liang tix keh khaing nawh tak deeh plud ceukaux puxke pa hoik yum, sonsang ang min ceukaux nawh pon ti mawh pa preet tix khaing ceu pui Isarela.<sup>7</sup> Phan pui an ang rhawm rieb moeng puxke tix, moeng puxke nawh tak hu ka diang siviex veng ka kuad song ah nin, pux mex aux ang cu ti plud ceukaux puxke tix khaing daux Isarela, nawh ang cu ti teei beeh glawm puxke tix pa mawh mex aux,<sup>8</sup> kuad song veng ot nawh, tak kok ka nawh mai krai lox ka nawh, phan nawh ca kawn ah nin, aux ang rhawm simie ti teei ka nawh<sup>9</sup> mai moeng puxke nawh, tak hoek ka nawh, plak sivoe kuad song mai peeik kiep khaing caong nawh mai baig ka pakngai nawh, sibun an tak deeh pawk ah nin, yuh ceu in ka simex pa ang pon sang nyiexma puxke tix.<sup>10</sup> Ka daux pui Isarela tak kok ceukaux kaw an mawh doeh pui pa peeik kiep tix ka daux nyiexma tix.

***Been Son Kuceu***

<sup>11</sup> Phan pui ra kaux simah paox tix mai phan moeng pui an tix kaux hoek ti teem ka mex  
**25:4** 1Kaw 9:9, 1Ti 5:18. **25:5-6** Mat 22:24, Mak 12:19, Luk 20:28. **25:7-10** Rut 4:7-8. **25:13-16** Krub 19:35-36. **25:17-19** Lih 17:8-14, 1Sa 15:2-9. **26:2** Lih 23:19.

tix khaing daux taix pui pa tawk ka nawh, phan nawh giex bluh ka pa viex simex an,<sup>12</sup> pex tak tat ti tik taix sibun an, paw kieh ngai pex cauxrhawm ka nawh.<sup>13</sup> Pex ang pon ti koe kla jiang tang khaing paox tix, pa mawh kla jiang pa cien tix mu mai pa chaong tix mu ka daux bau tix.<sup>14</sup> Pex ang pon kieh kraung tong koe ra ceu daux nyiex tix, pa ting tix mu mai pa iak tix mu.<sup>15</sup> Pex caw tix koe kla jiang pa khawcaw mai kraung tong pa khawcaw sonsang lang singaix ju pex ka daux haktiex pa tawx Simiang Siyiex, Siyiex pex ka pex.<sup>16</sup> Mawh kheu pui pa yuh ka ceu in khankix mai pui pa yuh pa ang rahsee mawh ceu pa seeing brai son Simiang Siyiex, Siyiex pex.

***Pui Amaliet Lauxleeing***

<sup>17</sup> Dohkeud ka pa hoikyuh pui Amaliet ka pex daux krax, yam lih pex khaing Ejiptux,<sup>18</sup> kix lih hoek puing pex yam awn riang mai yam taug mao pex mai pah ka pui pa diang plak khaix mai kix ang lhat ka Simiang Siyiex.<sup>19</sup> Mawh kheu nan, yam hoik tawx Simiang Siyiex maix lauxlee tix khaing pui koeng khankix, pa koe hawt vungviang pex ka daux haktiex pa tawx Simiang Siyiex mawh sinngao son maix, maix tak preet krax pa dohkeud ka ceu pui Amaliet khankix khaing greem raoma maix tak ang pon ti piawm an heue.”

**26 *Tan Plix Khaox Kao Son Tix Son***

“Yam laig teei maix ti ot ka daux haktiex pa sang tawx Simiang Siyiex mawh sinngao son maix,<sup>2</sup> teei canceu pa liang maix ti pon phaoka khaing haktiex pa tawx Simiang Siyiex maix ka maix, maix tak sau ankix daux khrawng mai viex hu ka dee pa hoik laug Simiang Siyiex maix ti deuh ceukaux Nawh Cao<sup>3</sup> mai hoek ka pui pa yuh kaing jhaw cao giex kaing li ka daux baux bawgyam an mai ah nin ka nawh, aux dohkeud tix ka Simiang Siyiex daux in singaix, ka hoik hoek aux daux haktiex pa hoik tiextu Simiang Siyiex ka keeing ex khankix, sonsang tawx ankix ka ex.<sup>4</sup> Khaix an cao giex kaing li tak teei khrawng an khaing daux taix maix mai deuh ka plak sivoe khu dee tan Simiang Siyiex maix.<sup>5</sup> Maix tak ah nin ka plak sivoe Simiang Siyiex maix, keeing aux hoik mawh ceu pui Shurix tix kaux pa hoik sang grai hu mai

nawh hoik lih hu peung ti ot ka daux haktiex Ejiptux, viang pui nawh mawh pa tuxtan kawx, deeh lih ti mawh ceu pui pa ting lhaong mai ceu pui pa ting riang rao tix cub mai mawh ceu pui pa nie pre haohhun tan. <sup>6</sup> Ceu pui Ejiptux khankix hoik yuh krax pa langteung caox piang yix mai hoik khin yix, thux yix mai teek yix yuh kaing jhaw siliex pa kied kin tete, <sup>7</sup> khaix an yix riagyolox tix ka Simiang Siyiex keeing yix mai Simiang Siyiex hoik mhong ka lox yix mai hoik yaox ka krax pa kham geu yix mai hoik yaox kaing jhaw pa yuh yix mai khawm ka krax pa khin kix piang yix khankix. <sup>8</sup> Mawh kheu nan, Simiang Siyiex hoik viex yix lih hu khaing daux meung Ejiptux ka plawng taix pa ting riang Nawh Cao mai tawm taix pa nih Nawh Cao mai krax pa lhatgraung mai mhairug khankix mai khawm krax pa daoxdeng khankix. <sup>9</sup> Nawh Cao hoik viex ex hoek dee in mai hoik tawx haktiex in pa mawh haktiex dee lih rawm teehi mai rawm hia ka ex, <sup>10</sup> Simiang Siyiex eue, yam in aux hoik viex plix khaox pa liang ti pon phaoka khaing haktiex pa hoik tawx maix ka aux. Khaix an maix tak deuh khrawng an ka plak sivoe Simiang Siyiex maix mai krub ka Simiang Siyiex maix. <sup>11</sup> Mawh kheu nan maix tak gaurrhawm ka daux buanson kuceu, pa hoik tawx Simiang Siyiex maix ka maix mai ka daux nyiexma maix, khawm ceucad Lewix mai nyosinie pa ot daux sinax pex. <sup>12</sup> Yam hoik tawx maix krax tan kao son tix son khaing plix khaox pa pon tix kuceu ka daux num loe pa mawh num tan maix kao son tix son mai maix tak tawx ceu ankix ka ceucad Lewix mai nyosinie mai ka miexmai kawn doe, sonsang pon kix ti ih tom sak ka daux veng maix khankix, <sup>13</sup> khaix an maix tak ah nin ka plak sivoe Simiang Siyiex maix, aux hoik teei krax tan pa singax singeh, kao son tix son lih khaing daux nyiex aux mai aux hoik tawx ankix ka ceucad Lewix mai ka nyosinie mai ka miexmai kawn doe awm gumlox pingnyap pa hoik tawm Maix Cao ka aux khawmuik. Aux ang lud ka gumlox pingnyap Maix Cao 26:12-19 Pi 14:28-29. 26:18 Lih 19:5, Pi 4:20, 7:6, 14:2, Ti 2:14, 1Pe 2:9.

mai aux ang nyang piawm ka ankix. <sup>14</sup> Aux ang sax ih ceu ankix tix ceu kawx, yam koe krax lauxrhawm aux mai aux ang sax teei ceu ankix lih yam ang tix singax mai aux ang tawx ankix tix ceu kawx ka son pui yum, aux hoik cu nghiet ka gumlox Simiang Siyiex aux mai aux hoik yuh awm pa hoik tawm Maix Cao ka aux. <sup>15</sup> Num ti jhak khaing dee pa singax singeh ot Maix Cao khaing daux meung raoma mai nawb buan piang pui ceu Maix Isarelaux khankix mai piang haktiex pa hoik tawx Maix Cao ka yix pa hoik tiextu Maix Cao ka keeing yix khankix, pa mawh haktiex deelihrawm teehi mai rawm hia.

### *Pa Tang Siyox*

<sup>16</sup> Ka daux singaix in, Simiang Siyiex maix, hoik tawm lox been prawnsee mai lox tat jhawm prawnng Tix sonsang hawt maix ti yuh, mawh kheu nan maix tak priex ti hawt khawm rhawm tix mai khawm ju tix khawmuik. <sup>17</sup> Daux in singaix maix hoik rieb Simiang Siyiex mawh Siyiex maix mai hawt lawng ka daux krax Nawh Cao, priex ti hawt mai cu nghiet ka gumlox Nawh Cao pa mawh lox been prawnngsee Nawh Cao, lox tawm pingnyap Nawh Cao mai lox tat jhawm prawnng Nawh Cao khankix heue. <sup>18</sup> Lheu khaing an daux in singaix, Simiang Siyiex hoik rieb maix mawh ceu pui Nawh Cao, pa tang siyox khaing pui tang ceu, awm hoik yuh Nawh Cao sijax mukheu ka maix, sonsang priex maix ti hawt gumlox pingnyap Nawh Cao khawmuik, <sup>19</sup> Nawh Cao tak deuh maix lhaong piang ceu pui khankix, pa hoik phan hoik deuh Nawh Cao ka daux krax pa yaogyaw mai ka daux krax pa ao min mai ka daux krax pa koe min plakngai mai sonsang kieh maix mawh ceu pui pa singax singeh, son Simiang Siyiex maix, awm pa hoik koe sijax mukheu Nawh Cao heue.”

### **27** *Gumlox Been Piang Simaox*

Khaix an Mose mai kuad song ceu pui Isarelaux khankix tawm lox ka pui khankix ah nin. “Priex ti hawt lox tawm pingnyap pa tawm aux ka pex khankix daux in singaix awx. <sup>2</sup> Ka daux singaix yam tiang maix ka plak toi rawm klawng Yawdan, ka haktiex pa sang tawx Simiang Siyiex pex, ka maix, maix tak

sum ti deuh lon simaox ting mai kraix simaox ceed piang ankix. <sup>3</sup>Maix tak tiem gumlox toi plak an, sonsang pon maix ti laig daux haktiex pa sang tawx Simiang Siyiex ka maix, pa mawh haktiex lih rawm teeh mai rawm hia, awm pa hoik yuh Simiang Siyiex sijax mukheu Tix ka keeing maix khankix. <sup>4</sup>Yam hoik tiang maix ka plak toi rawm klawng Yawdan, yam hoik hoek maix piang gawng Ebalax, maix tak sum lon simaox inkix, awm pa tawm aux maix daux in singaix mai maix tak kraix simaox ceed piang an. <sup>5</sup>Maix tak sum khu dee tan ka lon simaox son Simiang Siyiex maix tan tix mu, maix tak ang pon ti shiao kraung rhiem tix ceu kawx piang simaox an. <sup>6</sup>Maix tak sum khu dee tan Simiang Siyiex maix ka simaox pa ang max mai maix tak tan krax tan pa gleeing son Simiang Siyiex maix. <sup>7</sup>Maix tak tan krax tan pa nhim khankix mai maix tak ih tan tau mai krax gaux rhawm tix ka plak sivoe Simiang Siyiex. <sup>8</sup>Mai maix tak tiem gumlox been in khawmuik sidawng piang lon simaox an.” <sup>9</sup>Khaix an, Mose mai cao giex kaing li khankix mai ceucad Lewix krai ka ceu pui Isarelaix khankix ah nin. “Ce u pui Isarelaix khankix, jawg ti nghiet heue, singaix in maix hoik lih mawh ceu pui Simiang Siyiex maix. <sup>10</sup>Mawh kheu nan maix tak cu nghiet ka lox Simiang Siyiex maix mai hawt ti yuh lox tawm pingnyap Nawh Cao mai lox tat jhawm prawng Nawh Cao khankix, pa tawm aux ka maix, ka daux in singaix heue.

### ***Jhaxlawg Piang Gawng Ebalax***

<sup>11</sup>Mose tawm ka pui khankix daux singaix an ah nin, <sup>12</sup>inkix tak mawh pa cung piang gawng Gerazim mai pa sang nawb buan piang pui khankix yam hoik tiang maix ka plak toi rawm klawng Yawdan, pui inkix mawh Simion, Lewix, Yudax, Isakha, Yosiep mai Benyamin khankix. <sup>13</sup>Inkix mawh pa cung piang gawng Ebalax, sonsang krai pao pa jhaxlawg mai pui kix mawh Rubin, Gat, Asha, Zebulun, Dan mai Napthalix khankix. <sup>14</sup>Ceucad Lewix khankix, yoloxting sinum ah nin ka pui Isarelaix khankix, <sup>15</sup>Kieh krax pa **27:12** Pi 11:29, Yaw 8:33-35. **27:15** Lih 20:4, 34:17, Krub 19:4, 26:1, Pi 4:15-18, 5:8. **27:16** Lih 20:12, Pi 5:16. **27:17** Pi 19:14. **27:18** Krub 19:14.

jhaxlawg koe piang pui pa yuh rieanggrang pa saik angah, pa raug angah, pa mawh ceu pa seeing Simiang Siyiex kah mai kaing jhaw pa yuh ka taix, cao yuh kaing taix mai pa jung ti deuh an khankix ka dahdee glip, pui khawmuik deeh pawk lox mai ah Amen! <sup>16</sup>Kieh pa jhaxlawg koe piang pui pa yuh pa ang khaw ang jiet ka miex keeing tix mai pui khawmuik deeh pawk lox mai ah Amen! <sup>17</sup>Kieh pa jhaxlawg koe piang pui pa gah rong mee haktiex pa ox plawg tix mai pui khawmuik deeh pawk lox mai ah Amen! <sup>18</sup>Kieh pa jhaxlawg koe piang pui pa kieh pui dug ngai lud hu khaing daux krax mai pui khawmuik deeh pawk lox mai ah Amen! <sup>19</sup>Kieh pa jhaxlawg koe piang pui pa tieh lox prawng pa rahsee piang nyosinie mai piang miexmai kawn doe khankix mai pui khawmuik deeh pawk lox mai ah Amen! <sup>20</sup>Kieh pa jhaxlawg koe piang pui pa it tau mai moeng keeing tix, mawh kheu hoik peeik nawh kraung ceep keeing tix mai pui khawmuik deeh pawk lox mai ah Amen! <sup>21</sup>Kieh pa jhaxlawg koe piang pui pa ludvao mai tobrie tix ceuceu mai pui khawmuik deeh pawk lox mai ah Amen! <sup>22</sup>Kieh pa jhaxlawg koe piang pui pa it tau mai pux nan tix pa mawh kawn sibun pa hawt keeing tix angah mai kawn sibun pa hawt miex tix angah mai pui khawmuik deeh pawk lox mai ah Amen! <sup>23</sup>Kieh pa jhaxlawg koe piang pui pa it tau mai miex moeng tix mai pui khawmuik deeh pawk lox mai ah Amen! <sup>24</sup>Kieh pa jhaxlawg koe piang pui pa taw ka pa ox plawg tix ka dahdee glip mai pui khawmuik deeh pawk lox mai ah Amen! <sup>25</sup>Kieh pa jhaxlawg koe piang pui pa teei ngawh riang tix sonsang pah ka pui pa ang koe phimap tix kaux mai pui khawmuik deeh pawk lox mai ah Amen! <sup>26</sup>Kieh pa jhaxlawg koe piang pui pa ang kaux sijax ka gumlox pingnyap khawmuik mai pui khawmuik deeh pawk lox mai ah Amen heue.”

### ***Nawb Buan Ka Pui Pa Cu Nghiet***

**28** (Krub 26:3-13; Pi 7:12-24)  
 “Phan maix priex rhawm ti nghiet ka lox Simiang Siyiex tix mhawm mhawm mai hawt **27:19** Lih 22:21, 23:9, Krub 19:33-34, Pi 24:17-18. **27:20** Krub 18:8, 20:11, Pi 22:30. **27:21** Lih 22:19, Krub 18:23, 20:15. **27:22** Krub 18:9, 20:17. **27:23** Krub 18:7, 20:14. **27:26** Ka 3:10. **28:1-14** Pi 11:13-17.



yuh awm gumlox pingnyap Nawh Cao khawmuik awm pa tawm aux ka maix daux in singaix, Simiang Siyiex maix tak deuh maix lhaong khaing ceu pui khawmuik ka piang ca haktiex in. <sup>2</sup>Phan maix cu nghiet ka lox Simiang Siyiex maix, buanson inkix khawmuik tak lih hoek piang maix mai hawt khaix maix, <sup>3</sup>maix ot daux veng, daux yaong, daux ma angah tak koe buanson. <sup>4</sup>Kawn praix maix mai plix pa lih khaing daux haktiex maix mai cub tobrie maix khankix, pa mawh kawn mawie mai kawn yung khankix tak koe buanson pa pre haohhun, <sup>5</sup>ka daux khrawng maix mai ka daux tawg klong kluklao maix blah khankix kawx tak koe buanson. <sup>6</sup>Yam laig maix ka daux nyiex tix mai yam lih maix khaing nyiex tix kawx maix tak koe buanson. <sup>7</sup>Simiang Siyiex tak kieh pui koeng maix, pa yaog ti tiehfeen ka maix khankix, mawh pa somnai sivoe ngai maix, kix lih hoek puing maix ka daux krax tix nyaing mai kix tak yaox ti to daux krax aliah nyaing ka plak sivoe maix. <sup>8</sup> Simiang Siyiex tak nawb buanson piang maix, ka daux krao pa priex maix kraung khrai tix mai ka can pa yuh maix ka taix tix khawmuik. Nawh Cao tak nawb buanson piang maix, daux haktiex pa sang tawx Simiang Siyiex pex ka maix. <sup>9</sup>Phan maix priex ti hawt gumlox pingnyap Simiang Siyiex maix khankix mai phan hawt hu ka daux krax Cao Simiang Siyiex, tak deuh maix mawh pui pa singax ka son Tix, awm pa hoik tiextu Nawh Cao ka maix. <sup>10</sup>Khaix an pui haktiex khawmuik tak yaox ka mawh maix pa hoik pon pa kok ka daux ceukaux Simiang Siyiex mai kix tak koe krax lhatgraung ka maix. <sup>11</sup> Simiang Siyiex tak sang tawx maix magmi tomnie mai kawn praix maix mai tobrie eei maix khankix mai plix khaox pa lih khaing haktiex maix, daux haktiex pa hoik tiextu Simiang Siyiex ka keeing maix, son pa sang tawx ka maix. <sup>12</sup>Simiang Siyiex tak paoh krao raoma khaing dee priex Nawh Cao kraung khrai ceu pa mhawm, sonsang tawx Nawh Cao rawm lhiex lih ka piang tiex maix, ka daux bawgyam praix klawng an khankix mai nawb buan piang kaing jhaw pa yuh maix ka taix tix. Maix tak pon ti tawx ceuk rom ka ceu pui tomnie viang mawh nan maix tak

ang pon ti ceukkakix. <sup>13</sup>Phan maix koe krax cu nghiet ka gumlox pingnyap Simiang Siyiex maix, pa tawm aux ka maix daux in singaix mai phan maix priex rhawm tix hawt yuh ka ceu an khankix, Simiang Siyiex tak kieh maix mawh kaing ang kieh maix mawh sidax, maix tak ot ka piang mai ang ot ka greem. <sup>14</sup> Mawh kheu nan, ka daux in singaix, maix tak ang pon veeh ti khaing lox pa tawm aux khankix ka maix, ka plak khawn goix, khawn dawm mai pa hawt hu khaix siyiex tang kaux payuh kaing jhaw kix heue.

### ***Jhaxlawg Piang Pa Ang Cu Nghiet***

*(Krub 26:14-46)*

<sup>15</sup>Viang mawh nan, phan maix ang cu nghiet ka lox Simiang Siyiex tix mai ang hawt ti yuh awm gumlox pingnyap Nawh Cao mai been pa deuh Nawh Cao, pa tawm aux ka maix daux in singaix khawmuik, krax pa jhaxlawg tak hawt maix mai hoek piang maix. <sup>16</sup>Maix ot daux veng daux yaong angah, ot ka daux kaung daux ma angah tak pon pa jhaxlawg. <sup>17</sup> Krax pa jhaxlawg tak koe ka daux khrawng maix mai ka daux tawg klong kluklao maix blah, <sup>18</sup>krax pa jhaxlawg tak koe piang kawn praix maix mai piang plix khaox pa lih khaing daux haktiex maix, khawm piang tobrie eei maix, pa mawh mawie mai yung maix khankix. <sup>19</sup> Yam laig maix ka daux nyiex tix angah, yam lih maix khaing nyiex tix angah tak pon pa jhaxlawg. <sup>20</sup> Simiang Siyiex tak kieh pa jhaxlawg, pa tuktiak mai pa map nai hoek piang kaing jhaw pa yuh maix ka taix tix khankix mai tak pon pa lauxleeing tom hoik khran grai grup maix, kheu jao pa caoxcaig yuh maix ka pa hoik tikvud maix ka Nawh Cao. <sup>21</sup>Simiang Siyiex tak kieh jhawm saux preng hoek piang maix tom sidax yuh Nawh Cao maix paklawg khaing haktiex pa sang hu teei maix ti cie. <sup>22</sup>Simiang Siyiex tak sivied maix mai tawx krax kham geu jhawm saux nhao, jhawm saux hoek, jhawm saux uah mai jhawm saux ngu, cai lawm void mai bhaung si-oh yum khaox, jhawm saux lih rawm yum khaox, ankix tak hawt khaix maix tom sidax grai grup maix. <sup>23</sup> Mai raoma piang kaing maix tak lih ti mawh tawng lheung mai tiex ka greem caong maix tak lih ti mawh rhiem, <sup>24</sup>Simiang Siyiex tak kieh rawm lhiex

pa sang lih piang haktiex maix deeh tieh ti mawh phawng tiex lih khaing raoma mai hoek piang maix tom sidah lauxleeing maix. <sup>25</sup>Simiang Siyiex tak kieh maix somnai ka plak sivoe pui koeng maix, maix lih hu sonsang puing kix ka daux krax tix nyaing mai maix tak to sivoe kix ka daux krax aliah nyaing, maix tak lih ti mawh pui pa vungviang piang haktiex khawmuik. <sup>26</sup>Tokaux yum maix tak mawh priex ih sim raoma mai tobrie piang haktiex, pui mawx kawx tak ang pon ti grheu ankix. <sup>27</sup>Simiang Siyiex tak kieh maix kham geu jhawm saux muad haktiex Ejiptux, jhawm saux ghua nex, jhawm saux ngoi, jhawm saux dao, pa ang maix lai pon pai. <sup>28</sup>Simiang Siyiex tak kieh maix kham geu jhawm saux yhot, jhawm saux dug ngai, jhawm saux lung lang rhawm khankix <sup>29</sup>mai maix tak pupi ti hu bawgyam jung singaix awm pui dug ngai pa pupi ti hu ka daux krax pa faik, kaing pa yuh maix khankix tak ang koe krax pa haokhuan, maix tak kharhawm, pui taktudrhim maix jheengjheeng mai ang koe pui pa pon taoh maix. <sup>30</sup>Viang maix hoik teei ti koe moeng kawx, pui tang kaux tak it tau mai nawh, viang maix hoik sum sipeem plix siiet kawx maix tak ang yaox ti ih plix khankix, <sup>31</sup>viang pah mawie eei maix ka plak sivoe ngai maix kawx maix tak ang yaox ti ih nex, la eei maix viang mawh pa tudrhim khaing plaksivoe maix kawx, tak anglai deeh tawx ka maix, yung eei maix tak tawx ka pui koeng maix mai ang lai koe pui pa sang deeh taoh ka ankix tix kaux kawx. <sup>32</sup>Kawn simex kawn sibun maix tak mawh pa hoek ka pui tang kaux mai ngai maix maong ti jhak ka kix, leeinglang singaix mai koe krax pa lauxrhawm mai taix maix kawx tak mawh pa ang lai koe riang. <sup>33</sup>Ceu pui pa ang maix sax tawng tak teei ti ih plix khaox haktiex maix, khawm canceu pa pon maix khaing riang tokaux tix mai maix tak mawh pa kham geu krax pa khin pa thux pui jheengjheeng. <sup>34</sup>Mawh kheu nan maix tak mawh pa yhot, kheu jao pa yaox maix ka ngai tix. <sup>35</sup>Siyiex tak sivied maix ka krax pa kham geu jhawm saux muad ka singawng maix mai ka gawng caong maix, jah ka tiag caong tom hoek ka kaing maix pa langteung kin pa ang pon pai.

<sup>36</sup>Simiang Siyiex tak viex tokaux maix khawm simiang pa hoik yaog maix kuang ka piang tix, hoek ka ceu pui pa ang maix mai keeing maix nyang sax tawng mai maix tak yuh kaing jhaw siyiex tang kaux, pa mawh siyiex pa yuh ka khaox mai siyiex pa yuh ka simaox khankix tan. <sup>37</sup>Mai maix tak lih ti mawh pa daoxdeng, pa tiag pui lox mai pa sibriem pui ka daux sinax ceu pui khankix ka dee sang grheu Simiang Siyiex maix hu, <sup>38</sup>maix tak viex simie nghox tomnie lih hu daux tong kaung mai deeh yaox ti kraixkhrawm ceex khaing, mawh kheu sido tak ih ankix khawmuik, <sup>39</sup>viang maix sum sipeem plix siiet mai priexrien mhawm mhawm kawx maix tak ang yaox ti nyaux rawm plix siiet mai ang yaox ti khrawm, grawh grawng nawh viag tak ih ankix. <sup>40</sup>Viang maix koe khaox sanlun daux haktiex dee pa sang kuang maix khawmuik kawx maix tak ang yaox ti kraix bee an ka tokaux tix, mawh kheu plix khaox sanlun cie maix hoik khrum sivoe sang teem. <sup>41</sup>Viang maix keh kawn simex kawn sibun kawx kix tak ang mawh cie maix. Grawh grawng nawh, kix luan ti mawh pui pa giexlaung ka daux taix pui koeng maix khankix. <sup>42</sup>Sido tak ih pang khaox maix, khawm ceu pa sang pon maix khaing daux haktiex maix khankix. <sup>43</sup>Ceu pui tang ceu pa ot ka daux sinax pex khankix tak yaog tix nielheu lhaong khaing maix, maix tak mawh pa nielheu tiem khaing kix. <sup>44</sup>Nawh tak pon tawx maix ceuk rom, viang mawh nan maix tak ang pon tawx nawh ceuk rom, nawh tak mawh kaing mai maix tak mawh sidax. <sup>45</sup>Kheu jao ang maix cunghiet ka lox Simiang Siyiex maix mai ang priexrien tix hawt yuh awm gumlox pingnyap Nawh Cao mai lox tat jhawm prawng pa deuh Nawh Cao khankix, krax pa jhaxlawg inkix khawmuik tak hoek piang maix mai hawt khaix maix mai krup ka maix tom hoek maix krax lauxleeing. <sup>46</sup>Ceu pa jhaxlawg ankix tak mawh mhai pa tang siyox mai pa daoxdeng piang maix, khawm piang doehru maix leeingju. <sup>47</sup>Grawh grawng nawh, yam magmi maix mai ang gaurhawm ti yuh kaing jhaw Simiang Siyiex tix, <sup>48</sup>mawh kheu nan maix tak yaox ti yuh kaing jhaw pui pa koeng

tix khankix, pa ploi Siyiex hoek ka maix, ka daux pa cai rhawm tix mai pa sang nyauxnie rawm mai pa ang koe kraung ceep mai ka pa cudcha kuceu mai Nawh Cao tak sau iak rhiem piang ngawg maix, tom sidah yuh Nawh Cao maix lauxleeing.<sup>49</sup> Siyiex tak viex ceu pui tix ceu khaing dee singai dee sidah haktiex mai kieh kix hoek puing ka maix, awm phai pu klang krih, pa mawh ceu pui pa ang maix sax tawng ka lox sikah kix.<sup>50</sup> Ceu pui in mawh pa riex hak pakngai, pa ang koe krax nab yam ka kuad song khankix mai pa ang koe krax cauxrhawm ka kawn nyawm khankix.<sup>51</sup> Mai kix tak ih tobrie eei maix mai plix khaox pa lih ka daux haktiex maix khankix, tom hoek maix krax lauxleeing, nghox angah, rawm plix siiet pa khraox angah, rawm bee angah mai can tobrie pa eei maix angah mai kawn yung kawn mawie maix angah, kix tak ang lai prah maix cie tom sidah hoik yuh maix lauxleeing.<sup>52</sup> Kix tak lailawm ka maix hawt diang siviex maix, tom hoek bawgyam grhup guh veng pa lhaong pa kaux pa cong maix, ka piang tiex khawmuik, ka dahdee pa een maix rhawm tix kah mai kix tak lailawm maix hawt diang siviex veng pex, pa koe ka daux haktiex pex, ka dee pa hoik tawx Simiang Siyiex pex ka maix.<sup>53</sup> Yam ot maix ka daux pa lailawm pui koeng maix khankix, ka daux pa niied tix kin kharhawm khankix, maix tak ih ka kawn praix tokaux tix, pa mawh nex kawn simex kawn sibun maix, pa hoik tawx Simiang Siyiex maix ka maix.<sup>54</sup> Simex pa awn nexnham kaux hak ka daux sinax pex tak koe rhawm pa koeng ka puxaik nawh mai ka moeng pa koe piang naok nawh mai khawm kawn praix pa kawn deuk khankix.<sup>55</sup> Nawh ang lai rhawm tawx nex kawn praix tix khankix sonsang ih pui pa dex mai nawh, kheu jao ang nawh lai koe ceu pa ih tix ceu kawx, ka daux bawgyam ot nawh ka daux pa lailawm pui koeng khankix mai ka daux pa hoik kied kin yuh pui koeng maix krax kharhawm ka daux veng ot pex khawmuik.<sup>56</sup> Sibun pa awn nexnham kaux hak ka daux sinax pex pa ang sax pon kieh caong tix dig 28:57 2Sim 6:28-29, Doe 4:10.

piang tiex kheu jao pa awn nexnham kaux hak an, tak koe rhawm pa koeng ka mex pa koe piang naok tix mai ka kawn simex kawn sibun tix,<sup>57</sup> rheem pa lih ka sinax ba nawh mai kawn praix pa keh nawh an, nawh tak mox ti ih dee glip kheu jao hoik cudcha ceu pa ih yam ot nawh ka daux pa lailawm pui mai ka pa kied kin ti ot son nawh, yam yuh pui koeng maix khankix krax kharhawm daux veng ot pex khawmuik.<sup>58</sup> Phan maix ang yuh satix tix mai ang hawt ti yuh awm lox pingnyap pa hoik tiem ti deuh daux phuk lai, sonsang koe krax lhatgraung tix ka ceukaux SIMIANG SIYIEX MAIX, pa ting min mai lhatgraung kah.<sup>59</sup> Simiang Siyiex tak viex jhawm saux preng pa langteung, pa daoxdeng, jhawm saux preng pa kied rheeng, jhawm saux pa nielheu kin mai pa kied rheeng bawgyam hoek piang maix mai piang doehru maix khankix.<sup>60</sup> Lheu khaing an Nawh Cao tak deeh viex jhawm saux haktiex meung Ejiptux pa lhatgraung maix kah, hoek piang maix, jhawm saux ankix tak haok kawb piang maix.<sup>61</sup> Jhawm saux kuceu mai jhawm saux preng kuceu, pa ang nyang bax tiem ka daux phuk lai pingnyap in khankix kawx, Simiang Siyiex tak viex hoek piang maix tom hoek maix krax lauxleeing.<sup>62</sup> Viang maix nie haohhun awm simuing raoma kawx, maix tak lih ti mawh pui tux pui iak pa deuk ceex khaing, mawh kheu ang maix cu nghiet ka lox Simiang Siyiex maix khankix.<sup>63</sup> Awm hoik khawrhawm Simiang Siyiex ti yuh maix mawh pa mhawm mai kieh pre haohhun, awm an Simiang Siyiex tak khawrhawm ti yuh maix lauxlak pakleeing mai ang lai kieh maix koe ceu mai tak deeh reeig ti tik maix khaing daux haktiex pa sang hu teei maix ti cie.<sup>64</sup> Simiang Siyiex tak kieh pex prungprang rairuad sinax ceu pui khankix, jah ka haktiex plak in tom sidah hoek ka haktiex plak an mai maix tak yuh kaing jhaw siyiex tang kaux pa ang tokaux maix mai keeing maix sax tawng pa mawh siyiex khaox mai siyiex simaox tan.<sup>65</sup> Daux sinax ceu pui ankix, maix tak ang yaox krax lauxlee rhawm tix mai caong maix kawx tak ang koe dee sang lauxlee tix, Simiang Siyiex tak tawx rhawm pa sikua mai iakriang ngai mai pa

khruhphawm maix tan. <sup>66</sup>Ju maix tak koe krax khi glawh ka sivoe ngai maix, maix tak koe krax lhatgraung ku singaix mai ang lai deeh pon taoh ka son ju tix. <sup>67</sup>Yam hoek plak ponngawb maix tak ah nin, kieh niied hoek plak ponbo mai yam hoek plak ponbo maix tak ah nin, kieh niied hoek plak ponngawb, maix tak ah nan kheu jao pa lhatgraung pa yaoh dauh rhawm maix, pa yaoh maix ka ngai tix. <sup>68</sup>Simiang Siyiex tak deeh teei maix ing ka meung Ejiptux ka reu ting, awm pa hoik sax kraik auh ka maix yuh nin, maix tak ang lai baoh yaoh dauh krax an. Maix tak mawh pa coh tix ka pui koeng maix khankix, mawh siliex simex siliex sibun, viang mawh nan, tak ang koe pui liag ka maix heue.”

## 29 *Sijax Mukheu Haktiex Mawbax*

Inkix mawh gumlox sijax mukheu pa hoik tawm Simiang Siyiex ka Mose, sonsang yuh inkix tau mai ceu pui Isarelaux khankix dauh haktiex Mawbax, pa lheu khaing gumlox sijax mukheu pa hoik yuh Nawh Cao tau mai kix ka dauh baoh haktiex Hawrax. <sup>2</sup>Mose kok ka ceu pui Isarelaux khankix hoek ah nin, “Pex hoik yaoh ceu pa hoik yuh Simiang Siyiex ka plak sivoe ngai pex khawmuik, ka dauh meung Ejiptux ka Pharaw mai ka kawncaw mau soi nawh khankix mai ka haktiex nawh khankix, <sup>3</sup>gawng pa cheukcheu pa hoik yaoh pex ka ngai tix mai mhairug pa daoxdeng pa ting lhaong ankix. <sup>4</sup>Viang mawh nan, Simiang Siyiex ang nyang tawx pa chix keud sawn dauh rhawm pex mai pa chix yaoh ka ngai tix mai pa chix mhong ka yhaok tix khankix tom hoek dauh in singaix. <sup>5</sup>Aux hoik thong pex hu dauh tiag tixpon num, kraung ceep pex ang nyang griaing khaing pex mai kiep pex kawx ang nyang laux khaing pex, <sup>6</sup>pex ang yaoh ti ih blah mai ang yaoh ti nyaux rawm plix siiet mai plai, sonsang tawng pex mawh Aux Simiang Siyiex pex. <sup>7</sup>Yam hoik hoek pex dahdee in, Sihon simiang haktiex Heshabon mai Awgax simiang haktiex Bashan khankix hoek ti puing ka ex dauh bang naing mai ex hoik pex ka kix, <sup>8</sup>ex hoik teei haktiex kix mai hoik tawx ka ceucad Rubin mai ceucad Gat mai ceucad Manashe tix plak **29:7** Si 21:21-30. **29:8** Si 32:33. **29:18** He 12:15.

plak mawh sinngao son kix. <sup>9</sup>Mawh kheu nan, priex ti hawt gumlox sijax mukheu in khankix mai hawt ti yuh, sonsang pon pex tix haokhuan ka dauh krax pa sang yuh pex kuceu. <sup>10</sup>Dauh in singaix pex khawmuik hoik cung ka plak sivoe Simiang Siyiex pex, jah ka cao thong pex mai cao kaing doehru pex khankix mai kuad riex ju khawm cao pa kuang pex mai cub kawm simex ceu pui Isarelaux khankix <sup>11</sup>mai kawm pex, moeng pex mai nyosinie pa ot ka dauh bang pex, khawm pui kid khix pex, tom hoek ka pui pa kin rawm pex khankix, <sup>12</sup>sonsang pon pex ti laig ka dauh been gumlox sijax mukheu tau mai Simiang Siyiex pex mai dauh krax pa tiextu Nawh Cao khankix, pa yuh Simiang Siyiex pex tau mai pex dauh in singaix <sup>13</sup>mai Nawh Cao hoik yaog ti deuh maix mawh ceu pui tix cub son cao tix dauh in singaix mai Nawh Cao mawh Siyiex maix awm pa hoik kraik Nawh Cao ka pex mai krax pa hoik tiextu Nawh Cao ka keeing pex Abraham, Icak mai Yakop khankix. <sup>14</sup>Aux ang joeng yuh gumlox sijax mukheu in mai krax pa tiextu in tau mai pex khaing. <sup>15</sup>Aux hoik yuh tau mai cankix pa cung tin tau mai ex ka dauh in singaix, ka plak sivoe Simiang Siyiex ex, khawm kix pa ang ot tau mai ex ka dauh in singaix. <sup>16</sup>Pex hoik tawng ka ot ex dauh meung Ejiptux mai ex hoik lih khaing sinax pui tang ceu pa hoik yaoh ex, yam hoik tiang ex ti hu <sup>17</sup>mai pex hoik yaoh ka ceu pa seeing pa koe dauh sinax kix pa mawh khaox, simaox khankix mai mau khri khankix <sup>18</sup>mai simex, sibun mai kawm nyiexma pex ka dauh doehru pex khankix, pa tang tiah rhawm tix singai khaing Simiang Siyiex pex dauh in singaix mai pa sang hu yuh kaing jhaw siyiex pui tang ceu khankix mai lhat riah khaox ghin pa song lih kuah ka dauh sinax pex, <sup>19</sup>yam mhong nawh ka lox pa jhaxlawg in, nawh tang nawb buan ka tokaux tix dauh rhawm tix ah nin, aux koe pa nhim, yam aux yuh aux hawt rhawm tix, awm pui pa yoek ka plai baoh nie sang nyaux ka plai. <sup>20</sup>Simiang Siyiex tak ang pluatploi ka nawh, krax songrhawm Simiang Siyiex mai krax pa bak viang Nawh Cao tak jhaxlawg kuceu pa hoik tiem ka dauh phuklai

in tak koe ka piang nawh mai Simiang Siyiex tak preet ti tik ceukau nawh khaing greem raoma. <sup>21</sup>Simiang Siyiex tak goih nawh khaing doehru ceu pui Isarela khankix sonsang kham geu phimap awm pa jhaxlawg pa koe ka daux gumlox sijax mukheu in khankix, pa hoik tiem ka daux phuk lai pingnyap, <sup>22</sup>doehru kawn praix maix pa yaog ti kaoh khaix maix khankix mai pui tang meung pa hoek khaing daux haktiex dee singai khankix, yam yaox kix jhawm saux preng daux haktiex an mai jhawm saux pa hoik deuh Simiang Siyiex ka pui ankix, <sup>23</sup>ka daux haktiex khawmuik hoik kieh mawh dee koe mhat, kih mai khaix hax ngu, ang koe pa pon sum simie, ang koe plix koe tai mai ang koe ribriem pa kuah baoh tan tix ceu kawx awm plukpliak Simiang Siyiex ti tik ka veng Sawdom mai veng Gawmawrax, veng Adama mai veng Zibo-im ka daux pa songrhawm mai pa meet rhawm Tix. <sup>24</sup>Canceu pui khankix tak ah nin, Simiang Siyiex hoik yuh ceu inkix ka haktiex in, kheu jao patix lie? Krax pa hax pa songrhawm ting in mawh pa koe dee bleeh yuh ka mawx lie?" <sup>25</sup>Pui khankix ah nin, "Mawh kheu hoik tikvud kix ka gumlox sijax mukheu Simiang Siyiex keeing kix, pa hoik yuh Nawh Cao tau mai kix, yam hoik viex Nawh Cao kix lih khaing meung Ejiptux. <sup>26</sup>Mawh kheu kix hoik yuh kaing jhaw siyiex tang kaux mai hu krub ka siyiex pa ang kix tawng mai pa ang Nawh Cao sax tawx ka kix, <sup>27</sup>mawh kheu nan, krax songrhawm Simiang Siyiex hoik lih hoek ka daux haktiex in mai kieh pa jhaxlawg kuceu Nawh Cao, pa hoik tiem ti deuh daux phuk lai in lih hoek piang haktiex ankix. <sup>28</sup>Simiang Siyiex hoik reeig ti tik kix khaing daux haktiex kix, ka daux krax pa songrhawm mai daux pa meet rhawm Tix mai daux pa kied songrhawm Tix mai teei ti tik kix ka daux haktiex tangdah, awm pa koe tom singaix. <sup>29</sup>Can kaing pa glip khankix mawh pa dex mai Simiang Siyiex ex mai ceu an khankix pa deeh plak jhi kieh sidawng, hoik mawh pa dex ka ex mai ka kawn praix ex leeingju, sonsang pon yuh ex awm gumlox pingnyap in khawmuik heue."

29:23 Yam 19:24-25. 30:12-14 Ro 10:6-8.

**30** *Pon Buanson Yam Deeh Hoek Siyiex*  
 "Yam hoek ceu inkix piang maix, can krax pa nawb buanson mai pa jhaxlawg pa hoik deuh aux plak sivoe maix, maix tak deeh keud ceu an khankix daux sinax ceu pui khankix, ka dee pa grheu Simiang Siyiex maix lih hu, <sup>2</sup>phan maix mai kawn praix maix deeh hoek ka Simiang Siyiex maix mai cu nghiet ka lox Nawh Cao khawm rhawm tix mai khawm ju tix khawmuik, awm lox pa tawm aux ka maix daux in singaix <sup>3</sup>mai Simiang Siyiex tak deeh viex maix ing khaing krax pa giexlaung mai Nawh Cao tak koe krax cauxrhawm piang maix mai deeh khrawm maix khaing ceu pui khawmuik dee pa hoik kieh Simiang Siyiex pex prungprang rairuad. <sup>4</sup>Phan pui maix tix kaux kaux mawh pa hoik grheu ti tik ka dee pa kied singai khaing greem raoma, Simiang Siyiex maix tak deeh khrawm maix hoek khaing tan, <sup>5</sup>Siyiex maix tak deeh viex maix hoek ka haktiex pa hoik tawx Nawh Cao keeing maix cie, mai maix tak sang pon ti cie ankix. Nawh Cao tak kieh maix haokhuan mai kieh maix baox nielheu pre haohhun khaing keeing maix. <sup>6</sup>Simiang Siyiex maix tak pat hak rhawm maix mai khawm hak rhawm doehru maix sonsang moh maix ka Simiang Siyiex tix khawm rhawm tix mai khawm ju tix khawmuik sonsang pon maix ti im ju. <sup>7</sup>Simiang Siyiex maix tak deuh pa jhaxlawg inkix khawmuik piang pui koeng maix khankix mai piang pui pa koeng ka maix mai piang pui pa tuktiak ka maix khankix. <sup>8</sup>Maix tak deeh hoek mai cu nghiet ka lox tawm pingnyap Nawh Cao khawmuik pa hoik tawm aux ka maix daux in singaix. <sup>9</sup>Maix tak cu nghiet ka lox Simiang Siyiex maix <sup>10</sup>mai priex ti hawt gumlox tawm pingnyap pa deuh Nawh Cao mai lox tat jhawm prawng pa hoik tiem ka daux phuk lai in angah, phan maix deeh ing ka Simiang Siyiex khawm rhawm rhi tix mai khawm ju tix khawmuik, Simiang Siyiex maix, tak kieh maix nie baox haokhuan daux kaing pa yuh maix ka taix tix khawmuik mai kawn praix maix mai tobrie eei maix khankix, khawm ceu plix pa ih pa lih khaing daux haktiex maix, son ceu pa mhawm khankix,

mawh kheu Simiang Siyiex tak deeh koe krax khawrhawm ka maix mai nawb buan piang maix awm hoik koe krax khawrhawm Nawh Cao piang keeing maix khankix heue.

***Laug Krax Im Ju Mai Krax Yum***

<sup>11</sup>Gumlox pingnyap pa tawm aux ka maix daux in singaix, ang mawh ceu pa nu son maix mai ang mawh pa koe dee singai khaing maix. <sup>12</sup>Ankix mawh pa ang koe piang raoma, sonsang ah maix nin, pui mawx sang haok piang raoma mai deeh viex ceu an lih ka son ex, sonsang pon ex ti mhong mai hawt ti yuh ceu ankix? <sup>13</sup>Ceu ankix mawh pa ang koe ka plak toi rhawm sigrit sigra sonsang ah maix nin, pui mawx pa sang tiang ti hu ka plak toi rhawm sigrit sigra mai deeh viex ceu ankix hoek ka son ex, sonsang pon ex ti mhong mai hawt ti yuh ceu ankix? <sup>14</sup>Gumlox in mawh pa kied dex hawt maix mai mawh pa koe daux jheeh maix, khawm daux rhawm maix, sonsang pon maix ti hawt yuh ankix. <sup>15</sup>Jhak heue, aux hoik deuh krax im ju mai pa mhawm, krax yum mai pa caoxcaig plak sivoie maix daux in singaix, <sup>16</sup>aux tawm maix moh ka Siyiex tix, sonsang kieh maix hawt grawng lawng khaix Nawh Cao mai sonsang priexrien maix ti hawt gumlox pingnyap Nawh Cao mai gumlox been prawngsee pa deuh Nawh Cao khankix mai lox tat jhawm prawng Nawh Cao, sonsang pon maix ti im ju mai baox nie pre haohhun, Simiang Siyiex maix tak nawb buan ka maix daux haktiex pa sang hu teei maix ti cie. <sup>17</sup>Viang mawh nan, phan rhawm maix veeh ti hu singai mai ang nghiet lox Nawh Cao mai tieh ti hu krub ka siyiex tang kaux mai hawt ti yuh kaing jhaw kix, <sup>18</sup>aux kraipao sidawng ka maix daux in singaix maix tak sang grai grup tete maix tak ang langju daux haktiex pa sang tiang maix plak toi rawm klawng Yawdan, sonsang laig maix teei ti cie an. <sup>19</sup>Aux kok yo raoma mai haktiex kham mhairug son maix daux in singaix, Aux hoik deuh krax im ju mai krax yum, krax nawb buan mai krax pa jhaxlawg

**30:20** Yam 12:7, Yam 26:3. **31:2** Si 20:12. **31:4** Si 21:21-35. **31:8** Yaw 1:5, He 13:5. **31:10** Pi 15:12.

khankix plak sivoie maix, mawh kheu nan, laugmaix teei krax im ju, sonsang pon maix ti im ju khawm doehru maix khankix, <sup>20</sup>sonsang moh maix ka Simiang Siyiex tix, sonsang cu nghiet ka lox Nawh Cao, sonsang een maix rhawm tix ot dex Nawh Cao, mawh kheu Nawh Cao mawh krax im ju maix mai krax langju maix, sonsang pon maix ti ot daux haktiex pa tiextu Simiang Siyiex ti tawx ka keeing maix Abraham, Icak mai Yakop heue."

**31** ***Yawsux Mawh Cao Kaing***

Khaix an, Mose hu kraik gumlox inkix ka ceu pui Isarelaux khankix <sup>2</sup>ah nin, "Yam in aux hoik koe ju tixyieh tixnga num, aux ang lai pon lih pon laig sivoie ngai pex awm ku bawg, Simiang Siyiex hoik ah nin ka aux, maix tak ang pon ti tiang plak toi rawm klawng Yawdan, <sup>3</sup>Simiang Siyiex pex tak tiang mai thong pex hu toi plak an plak sivoie pex, Nawh Cao tak kieh ceu pui inkix lauxleeing khaing plak sivoie pex mai pex tak teei ti cie haktiex cie kix, tokaux Yawsux tak tiang ti hu plak sivoie pex awm pa hoik kraik Simiang Siyiex ka pex. <sup>4</sup>Simiang Siyiex tak yuh ceu an piang kix awm pa hoik yuh Nawh Cao piang Sihon mai Awgax pa mawh simiang haktiex Amawrix, yam yuh Nawh Cao kix lauxleeing ka piang haktiex kix. <sup>5</sup>Simiang Siyiex tak ap kix ka pex sonsang yuh pex ka kix awm gumlox pingnyap pa hoik tawm aux ka pex khawmuik. <sup>6</sup>Teei riang rao tix mai kieh koe rhawm kua, paw khirhawm mai paw lhatgraung ka kix, Simiang Siyiex pex tak hu tau mai pex, Nawh Cao tak ang prah pex mai ang tikvud pex. <sup>7</sup>Mose kok ka Yawsux mai ah nin ka nawh ka plak sivoie ngai ceu pui Isarelaux khankix, teei riang rao tix mai kieh koe rhawm kua, mawh kheu maix tak sang yaxox ti hu tau mai pui inkix ka daux haktiex pa tiextu Simiang Siyiex ka keeing pex, sonsang tawx Nawh Cao haktiex an ka kix mai kieh kix pon ti cie sinngao an khankix. <sup>8</sup>Tokaux Simiang Siyiex tak hu ka plak sivoie maix, Nawh Cao tak ot tau mai maix, Nawh Cao tak ang prah maix mai ang tikvud maix, paw lhatgraung mai pawlauxrhawm."

### ***Gumlox Pingnyap Pa Caw Tix Phat***

<sup>9</sup>Mawh kheu nan, Mose tiem ti deuh gumlox pingnyap in mai ap ka cao giex kaing li pa mawh kawn simex ceucad Lewix khankix, pa teei beeh glawm tix klawm teug buan gumlox sijax mukheu Simiang Siyiex mai ka kuad song ceu pui Isarela khankix. <sup>10</sup>Mose tawm lox ah nin, “Yam hoik naog aliah num dauxnum pa hoik tat ti deuh, sonsang ploi pex lawdluan yam hoik hoek bawgyam yuh pex pawie nyiex gox bang khankix, <sup>11</sup>yam hoek bleeh ceu pui Isarela plak sivoe Simiang Siyiex pex ka dahdee pa hoik laug Nawh Cao ti deuh, pex tak phat gumlox pingnyap inkix plak sivoe ceu pui Isarela khankix, sonsang mhong kix kah. <sup>12</sup>Khrawm pui khankix tau, simex, sibun, kawn nyawm mai nyosinie pa ot ka daux veng pex khankix sonsang pon kix ti mhong mai sonsang gau kix tix chix koe krax lhatgraung ka Simiang Siyiex pex mai sonsang priex hawt ti yuh awm gumlox pa koe ka daux gumlox pingnyap in khawmuik, <sup>13</sup>sonsang mhong kawn nyawm pa ang nyang sax tawng khankix mai sonsang hoek gau kix ti koe krax lhatgraung ka Simiang Siyiex glang yam kawn im ju pex daux haktiex pa sang tiang pex ti hu plak toi rawm klawng Yawdan pa sang teei pex ti cie khankix.”

### ***Lox Ghoik Siyiex Ti Krai Ka Mose***

<sup>14</sup> Simiang Siyiex deeh ah nin ka Mose, “Jhak heue, singaix sang yum maix hoik dex, kok Yawsux hoek daux nyiex gox buan man bang kum pui hun, sonsang tawx Aux beeh glawm ka nawh.” Mawh kheu nan, Mose mai Yawsux laig daux nyiex gox buan man bang kum pui hun tau tan, <sup>15</sup> Simiang Siyiex lih bleeh ka daux rong paiawm hawt nyiex gox buan man mai rong paiawm an ot piang diang siviex nyiex gox buan man. <sup>16</sup> Simiang Siyiex ah nin ka Mose, “Jhak heue, maix tak yaox ti laig it tau mai keeing maix khankix, pui inkix tak yaog ti kaoh hu yuh pa lud tau mai siyiex tang meung khankix daux haktiex pa sang hu pex ti ot daux sinax kix mai kix tak tikvud Aux mai yuh gumlox sijax mukheu Aux lauxleeing ka pa hoik yuh Aux tau mai kix. <sup>17</sup> Krax songrhawm Aux lih piang kix daux

31:23 Si 27:23.

singaix an mai Aux tak tikvud kix mai mox pakngai Tix khaing kix mai kix tak hoek krax lauxleeing, pa caoxcaig mai pa kharhawm tak hoek piang kix mai kix tak ah nin daux singaix an, mawh kheu ang Siyiex ex lai koe ka daux sinax ex, ceu pa caoxcaig inkix tom hoek piang ex ang mawh lie? <sup>18</sup> Kheu ceu pa caoxcaig pa hoikyuh kix grawng pa hoik veeh ti hu ka siyiex tang kaux khankix, Aux tak mox pakngai Tix daux ngaix an tete. <sup>19</sup> Yam in tiem ti deuh lairhax son pex mai gau kawn praix Isarela khankix, kieh kix pon rhax glip ngai, sonsang mawh lairhax in mhairug son Aux ka sinax kawn praix ceu pui Isarela khankix. <sup>20</sup> Yam hoik viex Aux kix hoek ka daux haktiex dee lih rawm teeh mai rawm hia, pa hoik tiextu Aux ka keeing kix mai khaix hoik ih kix ceu an tom sak mai kluing kah, khaix ankix tak veeh ti hu ka siyiex tang kaux mai hawt ti yuh kaing jhaw kix mai kix tak map ka Aux mai thiang ti tik ka gumlox sijax mukheu Aux. <sup>21</sup> Yam lih ceu pa caoxcaig mai pa kharhawm tonnie piang kix, lairhax in tak mawh pa jhi mhairug ka kix, tak ang chix ti piawm khaing daux jheeh doehr u kawn praix pex, yam in sivoe ang Aux nyang viex kix hoek ka daux haktiex pa hoik tiextu Aux ti tawx ka kix, Aux tawng krax keud kix.” <sup>22</sup> Mawh kheu nan, Mose hoik tiem ti deuh lairhax in ka daux singaix an mai gau pui Isarela khankix kah. <sup>23</sup> Nawh Cao tawx lox ka Yawsux kawn simex Nun ah nin, “Teei riang rao tix mai kieh koe rhawm kua, mawh kheu maix tak yaox ti viex ceu pui Isarela khankix laig ka daux haktiex pa hoik tiextu Aux ka kix mai Aux tak ot tau mai maix.” <sup>24</sup> Yam an Mose tiem gumlox pingnyap in tom hoik ka daux phuk lai tix pheem tom grumnaog. <sup>25</sup> Mose tawx lox ka ceucad Lewix khankix pa sang klawm ka teug buan sijax mukheu Simiang Siyiex mai nawh ah nin ka kix, <sup>26</sup> “Teei phuk lai pingnyap in mai deuh praok teug buan sijax mukheu Simiang Siyiex, sonsang mawh mhairug ka son pex. <sup>27</sup> Mawh kheu tawng aux pex koe rhawm pa tiehfeen mai grawng pa kiien ngawg pex, glang yam kawn im ju aux tau mai pex, daux in singaix, pex hoik tiehfeen ka Simiang Siyiex, khaix hoikyum aux sax, pex tak sang

baox nie yuh miexding?<sup>28</sup> Khrawm kuad song, daohdoe pex mai cao kaing pex khankix hoek ka aux, sonsang krai aux kix mhong gumlox in khankix mai kok raoma mai haktiex mawh mhairug ka daux sinax kix.<sup>29</sup> Grawh grawng nawh khaix yum aux sax, aux tawng grawng sang tiehfeen pex mai veeh ti khaing daux krax pa hoik tawm aux ka pex mai kieh pa kharhawm hoek piang pex khaix singaix in, jao yuh pex pa caoxcaig plak sivoe ngai Simiang Siyiex, sonsang nie kieh pex krax pa songrhawm Nawh Cao koe daux kaing pa yuh pex ka taix ti khankix.”<sup>30</sup> Lairhax pa krai Mose ka ceu pui Isarelaux khankix mhong tom grumnaog ah nin,

**32** “Raoma eue, daong yhaok nghiet mai aux sang krai, haktiex eue, nghiet gumlox khaing jheeh aux,<sup>2</sup> kieh lox pa sidix gau aux lih awm rawm lhiex mai kieh gumlox aux jah lih awm rawm ciex mai jah awm rawm lhiex piang khaox pa awn mai lih awm lhiex poe piang ribriem.<sup>3</sup> Mawh kheu aux krai pao min ceukaux Simiang Siyiex mai aux yaogyaw krax pa ting lhaong Siyiex,<sup>4</sup> Nawh Cao mawh rang ting, kaing jhaw Nawh Cao mawh pa grumnaog, daux krax Nawh Cao mawh pa khawcaw mai mawh Siyiex pa mawhmeh mai pa ang koe krax lud, Nawh Cao mawh pa rahsee mai pa kaux sijax.<sup>5</sup> Kix hoik yuh pa caoxcaig ka Nawh, mawh kheu koe krax pa lud kix mai kix mawh doehru pa tiehfeen mai ang kaux sijax.<sup>6</sup> Pui pa daoxaw pa ang koe pingnya khankix eue, mawh sang deeh pawk maix buanson ka Simiang Siyiex yuh nin lie? Nawh Cao mawh keeing pa hoik kieh pex koe ang mawh lie? Nawh Cao hoik mawh pa phan pex mai payuh pex kauxcong ang mawh lie?<sup>7</sup> Deeh dohkeud ka singaix pa hoik luan mai deeh keud ti yaox num pa hoik luan, chawk ti yaox keeing maix mai nawh tak jhi maix yaox, chawk ti yaox kuad song khankix mai kix tak krai ka maix,<sup>8</sup> yam jah Siyiex pa kied ting lhaong ti goih sinngao ka ceu pui khankix, pa mawh doehru Adam khankix, Nawh Cao tat ti deuh mee haktiex ka son ceu pui khankix awm diag koe pui Isarelaux khankix.<sup>9</sup> Grawh grawng 32:17 1Kaw 10:20. 32:21 1Kaw 10:22.

nawh son nyum cie Simiang Siyiex mawh ceu pui Nawh Cao khankix mai Yakop hoik mawh sinngao Nawh Cao.<sup>10</sup> Nawh Cao hoik yaox nawh daux haktiex tiex mhaik mai dee luahe lox tobrie he khankix, Nawh Cao hoik vie mai lailawm nawh mai priexrien kiangiien ka nawh awm sok ngai tix.<sup>11</sup> Awm kraix klang mheem tix mai di prui tix piang kawn tix mai priex kix mai viex kix hu piang prui tix.<sup>12</sup> Mawh Simiang Siyiex tix kaux khaing pa thong bung Yakop hu mai siyiex tangdah tang meung khankix ang lai ot tau mai nawh.<sup>13</sup> Nawh Cao kieh nawh ot ka dahdee pa kied ting lhaong haktiex mai Nawh Cao tak kieh nawh teei rawm hia khaing daux rang mai rawm bee khaing daux simaox ngu,<sup>14</sup> klon bee rawm teei mawie, rawm teei yung mai khlawp bee kawn yung mai kawn yung mhaing pa keh khaing tobrie Bashan, pex mhaing mai nghoxca pa mhawm pa hoik laug ti deuh, nawh tak pon ti ih ceu ankix pa lih khaing daux tong kaung nawh mai nawh tak yaox ti nyaux rawm plix siiet khaing plix siiet pa naw khankix.<sup>15</sup> Viang mawh nan, Yeshurun baox nie kluing nie bee mai deeh tied ka caong tix, khaix nie kluing nie plang kaux hak nawh, klon bee hoik kheem piang nawh, khaix an nawh tikvud ka Siyiex pa phan ka nawh mai nunai ka rang ting pa mawh krax taoh nawh.<sup>16</sup> Kix hoik yuh ti kieh Nawh Cao songrhawm kheu krub siyiex tang kaux, ceu pa seeing brai yuh kix, hoik so krax pa songrhawm Nawh Cao.<sup>17</sup> Kix hoik tan ka phicaox pa ang mawh siyiex mai ka siyiex pa ang kix sax tawng khankix mai ka siyiex pa ang keeing kix sax koe krax lhatgraung kah.<sup>18</sup> Maix hoik piawm ka rang ting dee keh maix khaing, maix ang lai dohkeud ka Siyiex pa mawh keeing maix.<sup>19</sup> Yam hoik yaox Simiang Siyiex an, Nawh Cao songrhawm ka kix mai tikvud ka kawn simex kawn sibun Nawh Cao khankix.<sup>20</sup> Nawh Cao ah nin, Aux tak mox pakngai Tix khaing kix mai jhak ti yaox dee sidah ceu pa sang lih mawh kix, mawh kheu kix mawh doehru pa kiien rhawm mai ang kaux sijax.<sup>21</sup> Kix hoik so krax pa songrhawm Aux lih ka ceu pa ang mawh siyiex. Kix hoik kieh krax pa songrhawm Aux



lih kheu pa caoxcaig pa yuh kix ka rieanggrang ceu pa giexgoing, mawh kheu nan, Aux tak deeh teei pui pa ang koe cee cak kieh yuh kix lauxrhawm kah mai teei pui pa ang koe pingnya cuyi kieh yuh kix koe krax pa songrhawm kah.<sup>22</sup> Mawh kheu krax pa songrhawm Aux hoik lih rup awm ngu mai an tak gleeing tom hoek dee pa kied raux meung yum mai an tak gleeing haktiex lauxleeing tau mai plix khaox pa koe dauh haktiex tom hoek ka caong gawng.<sup>23</sup> Aux tak pum krax pa lauxleeing piang kix mai puing te tix piang kix khawmuik.<sup>24</sup> Kix tak yax ti kham pa cai rhawm, jhawm saux hax mai krax lauxleeing pa kied kin, Aux tak ploi rhang tobrie bliex tau mai jai siuing hoek ka piang haktiex ot kix.<sup>25</sup> Plak praix tak mawh lawm vaid, plak dauh tak mawh ceu pa lhatgraung, tak kieh sinaw, bunkrih, khawm kawm nyawm pa kawm peux mai pui pa hoik paing hauk kaing khankix lauxleeing khawmuik.<sup>26</sup> Aux tak sang kieh kix prungprang rairuad mai Aux tak yuh krax pa ang pui lai dohkeud ka kix, sonsang grai min ceukaux kix khaing dauh sinax pui khankix.<sup>27</sup> Aux ang lhat ka krax pa songrhawm pui koeng Aux khankix, phan ang mawh nan pui koeng khankix tak koe krax pa yaw rangdi ka tokaux tix, phan ang mawh nan kix tak ah nin, riang rao plawng taix yix mawh pa ting lhaong mai inkix khawmuik ang mawh Simiang Siyiex pa yuh.<sup>28</sup> Mawh kheu kix mawh ceu pui pa ang koe krax keud krax tawng ceeix kawx.<sup>29</sup> Kieh kix mawh pa koe pingnya mai tawng ka ceu inkix, sonsang pon keud gau kix dee sidah tix khaix in sax.<sup>30</sup> Pui tix kaux sang pon pheet ka pui tix rheng yuh ka mawx, pui ra kaux sang pon kieh pui tix mheen to yuh ka mawx mai phan rang ting dee deuh kix rhawm tix ang coh ka kix mai phan Simiang Siyiex ang ap ka kix, ceu an tak lih koe yuh ka mawx?<sup>31</sup> Mawh kheu rang ting kix, angawm rang ting cieex, viangpuikoeng ex khankix kawx, tak pon krax prawngca.<sup>32</sup> Mawh kheu nhu plix siiet kix mawh simie plix siiet Sawdom mai 32:35 Ro 12:19, He 10:30. 32:43 Ro 15:10. 32:43 Jhi 19:2.

mawh pa kuah dauh haktiex Gawmawrax, plix siiet kix mawh pa song awm ghin, sigleem plix siiet kix mawh pa kied song tete.<sup>33</sup> Rawm plix siiet kix mawh pa koe jai siyawng mai jai siuing pa kied caox khankix.<sup>34</sup> In mawh pa priex ti deuh tau mai Aux mai mawh pa hoik tawk ti deuh cum ka dauh krao sinngao cie Aux ang mawh lie?<sup>35</sup> Pa pawk bix mai pa deeh plud khankix mawh cie Aux, caong kix tak cangkklad yam hoek bawgyam. Mawh kheu singaix pa sang lauxleeing kix hoik dex mai can pa sang hoek khankix hoik mawh pa kied phai son kix.<sup>36</sup> Mawh kheu Simiang Siyiex tak prawngca ka ceu pui Nawh Cao mai kleueh piang siliex Nawh Cao khankix, yam yax Nawh Cao ka hoik grai siawp sibrawm kix mai ang lai koe pa pon luan khaing pa phiawk laung tix kaux kawx.<sup>37</sup> Nawh Cao tak ah nin, Siyiex krub kix koe dee mawx mai rang ting pa sawg kix ti peung koe dee mawh?<sup>38</sup> Pui pa hoik ih ka pa appong kix mai pa hoik nyaux ka rawm plix siiet krax tan pa nyaux kix ot dee mawx? Kieh kix yaog ti kaoh mai teem ka pex mai kieh mawh dee peung pex.<sup>39</sup> Jhak ka krax pa mawh Aux, lheu khaing Aux Siyiex tang kaux ang lai koe, Aux pah ju mai Aux deeh kieh im ju, Aux tawx krax mat mai Aux deeh pai moi, pui pa pon taoh ti glawd khaing dauh tawm taix Aux ang koe tix kaux kawx.<sup>40</sup> Aux yaog taix Tix piang raoma mai tiextu ah nin, Aux mawh pa im ju leeing ju.<sup>41</sup> Aux tak klaing vaid Tix plang, taix Aux tak giex ka krax prawng krax ciyang, Aux tak deeh pawk bix ka pui koeng Aux khankix mai deeh viied ka can pui pa koeng ka Aux.<sup>42</sup> Aux tak kieh te Aux khankix yoek ka nham mai lawm vaid Aux ih nex tau mai nham pa hoik pah tix mai ka pui pa giexlaung Aux khankix tom hoek ka kaing cao kaing pui koeng Aux khankix.<sup>43</sup> Ceu pui tang ceu khankix eue, gauxrhawm tau mai ceu pui Nawh Cao, grawh grawng nawh, Nawh Cao tak deeh pawk bix ka son nham siliex Tix khankix mai Nawh tak deeh prawngca ka pui koeng Nawh Cao khankix, Nawh Cao tak sigrhah pa seeing brai khaing haktiex Nawh Cao mai khaing ceu pui Nawh Cao.<sup>44</sup> Mawh kheu nan, Mose hoek tau mai

Yawsux kawn simex Nun mai krai lox lairhax in sonsang mhong pui khankix. <sup>45</sup>Khaix hoik krai Mose gumlox in ka ceu pui Isarelaix khankix, <sup>46</sup>Nawh baoh ah nin ka kix, "Gumlox pa hoik kham Aux mhairug ka sinax pex daux in singaix, een ka rhawm pex mai tawm ka kawn praix tix, sonsang priex kix ti yuh awm lox pa krai aux pa koe ka daux lox pingnyap khawmuik. <sup>47</sup>Ankixangmawh ceu pa giexgoing ka son pex, mawh kheu mawh pa dexdawd mai ju pex, gumlox in tak kieh singaix im ju pex lang daux haktiex pa sang tiang pex plak toi rawm klawng Yawdan mai pon pex ti cie heue."

#### *Lox Krai Mose Sivoe Sang Yum*

<sup>48</sup>Ka daux singaix an Simiang Siyiex krai ah nin ka Mose, <sup>49</sup>"Haok ka gawng Abarim piang choek gawng Nebo pa koe ka daux haktiex Mawbax see veng Yerikho mai simi ti yaoh ka meung Khanan pa tawx Aux ka kawn praix Isarelaix awm pa sang pon kix ti cie, <sup>50</sup>maix tak yum piang gawng dee pa hoik haok maix mai deeh khrawm tau mai pui ceu maix khankix, awm pa hoikyum puxke maix Arun piang gawng Hawrax pa hoik deeh khrawm nawh tau mai pui ceu nawh khankix. <sup>51</sup>Mawh kheu hoik ludloe maix ti yuh ceu pa ang nabyam ka Aux, sivoe kawn praix Isarelaix khankix, hawt dee lih rawm Meribax ka yaong Kadesha daux tiag Zin. <sup>52</sup>Viang maix yaoh haktiex pa ah Aux ti sang tawx ka pui Isarelaix khankix ka ngai tix kawx, maix tak ang yaoh ti laig ka daux haktiex an heue."

## 33

#### *Mose Nawb Buan*

Mose pa mawh pui Siyiex nawb buan ka piang pui Isarelaix khankix sivoe sang yum nawh, <sup>2</sup>ah nin "Simiang Siyiex lih hoek khaing gawng Sina mai kieh singaix lih piang kix khaing gawng Sirax, Nawh Cao jhan riieng Tix khaing choek gawng Paran mai Nawh Cao lih hoek tau mai pui pa singax singeh tix mheen khaing ka plak taix khawn dawm Nawh Cao, ngu gumlox pingnyap hoik lih ka son pui Isarelaix. <sup>3</sup>Nawh Cao moh ka pui ceu ankix tete, pui pa singax singeh khawmuik **32:48-52** Si 27:12-14, Pi 3:23-27. **33:8** Lih 28:30. **33:8** Lih 17:7. **33:8** Lih 17:7, Si 20:13.

hoik koe ka daux tawm taix Nawh, kix ngawm hawt greem caong Nawh mai kix nghiet lox sikah Nawh Cao. <sup>4</sup>Mose tawm gumlox been pingnyap pa mawh sinngao ka son cub pui hun ceucad Yakop khankix. <sup>5</sup>Yam khrawm cao kaing pui inkix mai doeh ceu pui Isarelaix khankix paoh tix tau, Nawh Cao mawh simiang ka daux Yeshurun. <sup>6</sup>"Kieh ceucad Rubin khankix im ju, paw kieh hoek krax yum mai paw kieh pui nawh tux." <sup>7</sup>Nawh krai ah nin ka ceucad Yudax, "Simiang Siyiex eue, nghiet ka lox ceucad Yudax khankix liak! mai viex nawh hoek ka pui ceu nawh, kieh taix nawh mawh pa yuh naing son nawh liak, kieh Maix Cao mawh pa teem nawh mai yuh pui koeng nawh khankix laux." <sup>8</sup>Mai nawh ah nin ka pui Lewix khankix, Simiang Siyiex eue, "Kieh Tumin mai Urim mawh pa koe tau mai pui pa singax Maix pa hoik cheuk Maix ti yaoh hawt baoh Masa ka pui pa hoik tiehfeen ka Maix khankix ka dee lih rawm keut Neribax liak." <sup>9</sup>Nawh mawh pui pa ah nin ka miex keeing tix, angaux saxyaoh pex mai ang tawng ka puxaik tix mai ka kawn praix tix, viang mawh nan, kix hoik mawh pa hawt ti yuh awm gumlox Maix Cao mai hoik priexrien ka gumlox sijax mukheu Maix Cao. <sup>10</sup>Kix tak gau ceucad Yakop khankix ka lox tat jhawm prawng Maix Cao mai gau pui Isarelaix khankix ka gumlox pingnyap Maix Cao, kix tak deuh nyawng bhawng plak sivoe Maix Cao mai pa appong kix son krax tan pa gleeing piang khu dee tan Maix Cao. <sup>11</sup>Simiang Siyiex eue, nawb buan piang kraung khrai nawh liak! mai rieb ti teei kaing ceu pa yuh nawh ka taix ti khankix, raig ti tik nyoi pui pa yaog ti kaoh tiehfeen ka nawh khankix son ang kix lai baoh pon yaog ti kaoh. <sup>12</sup>Son ceucad Benjamin nawh ah nin, "Ceu pui pa moh Simiang Siyiex yaoh ti ot yiien yawg dex Nawh Cao, Nawh Cao tak priexrien nawh leeinglang singaix mai nawh tak deuh dee ot daux sinax klip Nawh Cao." <sup>13</sup>Son pui Yosiep nawh ah nin, kieh Simiang Siyiex nawb buan ka haktiex nawh, sinngao khaing raoma tau mai rawm ciex khankix mai can pa koe dee raux greem tiex, <sup>14</sup>plix ceu pa laohlie pa kaoh khaing singaix tau mai ceu pa laohlie pa kaoh khaing khix angah, <sup>15</sup>ceu pa nielheu

mhawm pa kaoh khaing dauw gawng ju dix tau mai ceu pa laohlie pa kaoh khaing gawng lua leeingju angah, <sup>16</sup> ceu pa laohlie, pa kaoh khaing dauw tiex mai ceu pa grumnaog mai buanson Nawh Cao pa koe ka dauw yeem khaox khankix angah, kieh lih hoek piang kaing Yosiep mai piang mhok khri nawh pa mawh cao kaing dauw puxaik tix. <sup>17</sup> Siawp sibrawm nawh, tak awm riang mawie mhaing Utapha mai rung nawh awm rung mawie praix, nawh tak teei ti tik ceu pui khankix tom hoek dee sidah haktiex, kix mawh pui kaing mheen khaing ceucad Epharim mai kix mawh pui kaing rheng khaing ceucad Manashe. <sup>18</sup> Son ceucad Zebulun nawh ah nin, "Ceucad Zebulun khankix eue, gauxrhawm ka dauw krax lih hu maix ka plak praix, ceucad Isakha eue, gauxrhawm ka dauw nyiex gox maix. <sup>19</sup> Kix tak kok ceu pui khankix hoek piang gawng mai tan krax tan ka dauw pa rahsee, kix tak peuex ceu pa naog ka dauw rawm sigrit sigra mai kraung khrai pa mox tix dauw mhaik khankix. <sup>20</sup> Son ceucad Gat nawh ah nin, "Kieh buanson koe piang cao pa kieh haktiex pui Gat nie vieh nie ting, pui ceu an ot awm sivai sangsi mai riah ti tik plawng taix mai mhok khri pa koe piang kaing. <sup>21</sup> Nawh hoik laug ti teei nyum son tokaux cao tix sivoie, mawh kheu Simiang cao pa rahsee hoik goih ti deuh tan, Nawh hoik hoek tau mai cao kaing pui khankix mai nawh kuang ka pa rahsee Simiang Siyiex mai khawm krax prawngca Nawh Cao tau mai ceu pui Isarelax khankix." <sup>22</sup> Son ceucad Dan nawh ah nin, pui Dan mawh kawn sivai sangsi, nawh tak phoh ti lih khaing haktiex Bashan." <sup>23</sup> Son pui Napthalix nawh ah nin, "O, ceucad Napthalix eue, kieh koe krax magmi tau mai pa nyawmrhawm mai pa grumnaog ka dauw buanson Simiang Siyiex mai teei ti cie haktiex plak klip mai plak jee khankix." <sup>24</sup> Son ceucad Asha nawh ah nin, "Pui Asha, kieh koe kawn praix mai koe buanson, kieh mawh pa khawrhawm puxaik nawh khankix mai kieh nawh cob caong tix dauw rawm bee. <sup>25</sup> Pang siviex maix khankix tak mawh pa

34:4 Yam 12:7, Yam 26:3, Yam 28:13.

yuh ka rhiem mai tawng, baux singaix im ju maix mai riang rao maix tak mawh pa koe awm an. <sup>26</sup> Pui pa awm Siyiex Yeshurun pa brug raoma hoek sonsang teem ka maix tau mai siawp sibrawm Tix piang paiawm ang lai koe tix kaux kawx, <sup>27</sup> Siyiex leeingju mawh dee een maix rhawm tix mai plawng taix leeingju Nawh, mawh pa teem ka maix, Nawh Cao tak grheu pui koeng khaing plak sivoie maix mai Nawh Cao kieh maix yuh kix lauxleeing. <sup>28</sup> Pui Isarelax khankix tak yaox ti ot dauw pa yiienyawg, ka dee lih rawm keut pui Yakop nongnong mai dauw haktiex pa koe nghox, khawm dee koe plix siiet pa khraox khankix, raoma tak kieh rawm ciex lih piang nawh. <sup>29</sup> O pui Isarelax khankix eue, kieh maix koe krax gauxrhawm, pui pa hoik taoh Simiang Siyiex pa awm maix tak ang lai koe, Siyiex mawh pa tiebtie mai pa teem ka maix mai mawh vaid lawm cie maix, pui koeng maix khankix tak som plak sivoie maix, maix tak dig dee pa kied ting lhaong kix khawmuik heue."

### 34 *Mose Yum Piang Gawng Nebo*

Mose lih khaing dauw lung Mawbax mai haok piang gawng Nebo, ka choek gawng Pisaga, pa koe see plak toi veng Yerikho, Simiang Siyiex jhi nawh yaox haktiex Gilat khawmuik tom hoek ka veng Dan, <sup>2</sup> tom hoek ka haktiex Napthalix mai haktiex Epharen khawm haktiex Manashe mai ka haktiex Yudax khawmuik, tom hoek ka rawm sigrit sigra plak klip <sup>3</sup> mai haktiex pa koe baoh plak jee, khawm dau lung dauw ngawd pa koe baoh veng Yerikho pa mawh veng khaox jhie yaong, tom hoek ka baoh Zawrax. <sup>4</sup> Simiang Siyiex ah nin ka nawh, "In mawh haktiex pa hoik tiextu Aux ti tawx ka Abraham, Icak mai Yakop mai Nawh baoh ah nin, "Aux tak sang tawx inkix ka doehru maix khankix, Aux hoik kieh maix yaox inkix ka ngai tix, viang mawh nan maix tak ang pon ti tiang plak an." <sup>5</sup> Mawh kheu nan, Mose pa mawh siliex Simiang Siyiex yum dauw haktiex Mawbax tan, awm gumlox pa tawm Simiang Siyiex. <sup>6</sup> Nawh Cao sipaung nawh ka dauw ngawd tix dahdah, dauw haktiex Mawbax, plak toi veng Bietpegurax, viang mawh nan, pui tix kaux

kawx ang tawng ka dahdee pa sipaung ka nawh tom in singaix. <sup>7</sup>Yam yum Mose ju nawh hoik koe tix yieh tixnga num, ngai nawh ang nyang bax vuvi mai riang rao nawh kawx ang nyang bax dieh. <sup>8</sup>Kawn praix pui Isarelaix khankix, dohkeud mai yiem doe son Mose ka daux lung Mawbax tixngoe ngaix, mawh kheu nan, singaix yiem doe kix mai singaix dohkeud kix hoik sidah tin. <sup>9</sup>Yawsux kawn simex Nun naog mai khuan pingnya cuyi, kheu hoik deuh Mose taix tix ka piangnawh, mawh kheu nan, pui Isarelaix khankix cu nghiet ka nawh mai hawt yuh awm pa tawm Simiang Siyiex ka Mose. <sup>10</sup>Viang mawh nan,

jah khaix singaix an, cao jhai pa awm Mose ang lai lih ti koe daux pui Isarelaix khankix tix kaux kawx, pa hoik yaox ka Simiang Siyiex plakngai taw plakngai, <sup>11</sup>mhairug mai khawm pa daoxdeng pa hoik ploi Simiang Siyiex nawh hu daux meung Ejiptux, plak sivoe Pharaw mai plak sivoe cao kaing greem nawh khankix mai daux haktiex nawh khawmuik <sup>12</sup>tau mai siawp sibrawm pa ting riang rao ankix khawmuik mai krax lhatgraung pa kied ting ankix khawmuik, pa hoik yuh Mose plak sivoe ngai ceu pui Isarelaix khankix heue.

